

NCHAA SÁ NĬ XINÍ TÉ JUÀÁ NDĬHI NCHAA SÁ NĬ TECÚ DÓHO-DE

Xítohó Jesucrístú xáhaⁿ-gã xii té Juàá nchaa nàcuáa cada-xi ñuyúú

¹ Te Yá Ndiõxí ní xáhaⁿ-gã xii Xítohó Jesucrístú nchaa sá tá cùyatni vií-nã cada-xi ñuyúú-a cuendá sá cũñaha-gã xii cue tée xìnu cuechi núú-gã, te Xítohó Jesucrístú ní tendaha-gã ìⁿ espíritú xínú cuèchi núú-gã ní quixi-xi ní cachí tnúhu-xi nchaa tnúhu-áⁿ xii yúhú té Juàá tée xìnu cuechi núú-gã, te nchaa tnúhu-áⁿ ndèé núú tütú-a.

² Te yúhú cächí tnúhu ndáá-í xii-ndo nàcuáa ní cáháⁿ Yá Ndiõxí, te cãháⁿ ndáá tucu-í cuendá Xítohó Jesucrístú, ndĭhi cuendá nchaa sá nĭ xiní-í.

³ Te váha táhú ñáyiú dàcuaha nchaa tnúhu ndèé núú tütú-a, te váha tucu táhú ñáyiú ndèdóho, te váha tucu táhú nchaa ñáyiú tnĭ nacuáa cãháⁿ-xi, chi sa ta cùyatni vií-nã nduu càda-xi nchaa nacuáa cãháⁿ-xi.

Té Juàá cãdũha-dé tutú quíhĭⁿ ndaha ndi ùsá xichi cue ñáyiú ndècu ichi Yá Ndiõxí

⁴ Te yúhú té Juàá cãdũha-í tutú daquixi-í ndi ùsá xichi núú ndécú nchòhó ñáyiú ndècu ichi Yá Ndiõxí ndécú dìstrítú Àsiá. Te mee-gã ná chĩndee chitúú ñaha-gã xii-ndo, te ío váha cuu iní-ndó cùndecu-ndo. Te cuēi ndéé sanaha dĭu-ni-gá ndécú, te dĭu-ni-gá ndécú cuēi vitna, te ducaⁿ-ni

cùndecu-gá cuěi ndéé núú cuàháⁿ núú vëxi, te ðiu-ni ducaⁿ ïo na chìndee chitúu ñaha ndì usá cue espíritú ndécú núú-gã xii-ndo, te ïo váha cuu iní-ndó cùndecu-ndo.

⁵ Te ðiu-ni ducaⁿ na càda tucu Xítóhó Jesucristú, te ðiu-gá cúú-gã Yaá càháⁿ ndáá, te ðiu-ni-gá ní xíhí-gá te díhna-gá ní ndoto, te dàtnùní ndéé cuéé-gá te ndoto cue ñáyiu ní xíhí, te ðiu-ni-gá táxí tnùní-gá nchaa cue téé yìndaha ñaha xii ñáyiu ndècu ñuyíú-a. Te ïo cùu iní ñáhá-gã xii-o, te mee-gã ní sati níñí-gã te ní xíhí-gá núú cùrúxí sá cuéndá nchaa sá cuèhé sá dúhá quìde-o, te ní ndada ndoo ní ndada nine-gá iní-ó,

⁶ te vitna ní quide ñaha-gã xii-o dàtná cue téé yìndaha ñáyiu, te ní quide ñaha tùcu-gá xii-o dàtná cue dútú xínú cuèchi-o núú Tátá-gã Dútú Ndiöxí. Te vitna nchaa-o chǐ ná càchí-ó sǎ ïo càhnu cuu Xítóhó Jesucristú, te ïo cùnuu-gá, te ducaⁿ-ni na cùnuu-gá ni caa ni quíhíⁿ. Te ducaⁿ na cùnduu.

⁷ ¡Te cundehe-ndo àndiu! Chi ichi xití vícò quixi Xítóhó Jesucristú, te nchaa ñáyiu ndècu ñuyíú-a quini ñáhã-yu xii-gá, te tnàhá nchaa ñáyiu ìⁿ-ni cùu ndihì ñáyiu ní dánìcuèhé ñáhá xii-gá quini ñáhã-yu, te nchaa ñáyiu xìndecu nihì ñuyíú, ñáyiu ñá túú cùu váha iní ñáhá xii-gá ndíhú iní-yu óré quini ñáhã-yu xii-gá, te ndáá sá dúcáⁿ càda-xi.

⁸ Te Yá Ndiöxí càchí-gá: “Yúhú ïo cùnuu-í chi ðiu-í sa ndècu ndéé cútnàhá ní ngáva ñuyíú, te ðiu-ni-í cundecu ndéé ná sáá nduu nàa-xi ndihì nchaa sá ìó, chi yúhú cundecu-í ni caa ni quíhíⁿ”, duha càchí Yá Ndiöxí Yaá ndácú quide nchaandi túhú sá vǎha. Chi ðiu-ni-gá sa ndècu ndéé cútnàhá

ní ngáva ñuyíú, te ðiu-ni-gá ndécú-gă vitna, te ducaⁿ-ni cùndecu-gá ni caa ni quíhíⁿ.

Té Juàá ní xiní-dé Xítóhó Jesucrístú Yáá ío cùnuu

⁹ Te yúhú té Juàá téé ndècu ndihi-ndo ichi Xítóhó Jesucrístú, tnàhá-í ndóhò-í cuèndá-gá dàtná ndóhó-ndó, te tnàhá-í nduu táhù-í cundecu ndihi ñaha-í xii-ndo núú ndécú Yá Ndiöxí táxí tnùní-gá. Te ío quide cahnu iní-ó cuèi nándi yáha-o ndècu-o sá cuèndá Xítóhó Jesucrístú. Te yúhú ní ngava-í vecaá ìⁿ ñúú nání Pătmós, te ñúú-áⁿ cáá xití ndute làmár. Te ducaⁿ ní cuu cuèndá sá càháⁿ-í tnúhu Yá Ndiöxí, te càháⁿ váha-í cuèndá Xítóhó Jesucrístú.

¹⁰ Te ìⁿ nduu ndumìngú nduu nàtacá-ó chĩñuhu-o Yá Ndiöxí ní quide ñaha Espíritú-gá xii-í nàcuáa càchí iní-xi, te ní tecú dóho-í níhi ní cáháⁿ ìⁿ sá ñí cáháⁿ ndàa sàtá-í te dàtná níhi càháⁿ ìⁿ cútú ducaⁿ ñihi ní cáháⁿ-xi.

¹¹ Te càchí sá càháⁿ-áⁿ:

—Yúhú sa ndècu-í ndéé cùtnàhá ní ngáva ñuyíú, te ðiu-ni-í cundecu-í ndéé ná sàá nduu nàa-xi ndihi nchaa sá ío, te chido tnùní-n ìⁿ núú tütú sá ná dànehé núú ñáhà-í xii-n, te daquìhíⁿ-n tütú-áⁿ ndi úsá xichi núú xĩndecu cue ñáyiu ndècu ichi Yá Ndiöxí xĩndecu distritú Àsiá, ndaha ñáyiu ñúú Éfesú, ndaha ñáyiu ñúú Èsmirná, ndaha ñáyiu ñúú Pěrgamú, ndaha ñáyiu ñúú Tiàtirá, ndaha ñáyiu ñúú Sărdís, ndaha ñáyiu ñúú Filàdelfiá, ndaha ñáyiu ñúú Laodiceá, nchaa ñáyiu ñúú-áⁿ daquìhíⁿ-n tütú-áⁿ ndahá-yu —càchí sá càháⁿ-áⁿ.

¹² Te ní nchócuìhnu-í ndéhè-í nùu ná cúú sá càháⁿ-áⁿ, te ní xiní-í xĩnutnì úsá tnàhá sá ñí

cuáha mee-ni dǐhúⁿ cuàáⁿ sá ndèé dité-xi, te núú dité-xi-áⁿ yǐndòdo ìⁿ caa candíl.

13 Te cuádava tnuú nchaa xǐáⁿ ní xiní-í nútnǐ Yaá cáá dàtná cáá nchàa nchoo ñáyiú ndècu ñuyíú-a, te nihnu-gá ìⁿ dóó cání càa-xi ndéé núú sàhá-gá, te yìdúcúⁿnuu ìⁿ sìnychú ní cuáha mee-ni dǐhúⁿ cuàáⁿ pèchú-gá.

14 Te idi díquí-gǎ cuìxíⁿ quiyí dàtná cuìxíⁿ idi dava mbéé, àdi yúhá sǎ quéé òré quidé vǐxiⁿ-xi, te tinùu-gá quidé-xí dàtná quidé-xí òré sàá itá ñuhú.

15 Te sáhá-gǎ súúní dàtásaⁿ-xi dàtná dátásaⁿ sá nání bròncé òré càyú-xi ducaⁿ dàtásaⁿ-xi sáhá-gǎ, te dóndahà tnúhu càháⁿ-gá quidé-xí dàtná quidé-xí dǒndahà titní víhí yǔte.

16 Te xio ndaha cùha-gá núndàha-gá úsá tnàhá chódíní, te mei yùhu-gá quéné ìⁿ yuchí cáhnú ndéé úú xio núú-xi, te núú-gǎ quidé-xí dàtná quidé-xí núú nchǐcanchii òré súúní ngòyo cahni.

17 Te sá dúcáⁿ càa Yaá-áⁿ ñǐ xiní-í nǔu xǐáⁿ ní yùhú-í ní nduá-í núú-gǎ, te ní cuu-í dàtná ìⁿ téé ní xíhí sá dúcáⁿ ìo ní yùhú-í, dico mee-gǎ ní sacáⁿ ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chi ñiu-ni yùhú sa ndècu-í ndéé cútnàhá ní ngáva ñuyíú, te ñiu-ni yùhú cundecu-í ndéé ná sàá nduu nàa-xi ndìhì nchaa sá ìó.

18 Te yùhú cùú-í Yaá ní xíhí te ní ndoto-í, te vitna ndècu vívù-í, te ducaⁿ-ni cùndecu-í ñi caa ñi quíhíⁿ. Te yùhú cúnùu-í núú nchàa ñáyiú ní xíhí te ñiu-ni-í cúnùu-í núú ndécǔ-yu.

19 Te chido tnùní-n nchàa sá ñǐ xiní-n-áⁿ ìⁿ núú tütú, ndìhì nchaa nàcuáa cùu vitna, ndìhì nchaa sá

cadá-xí ndèé núú cuàháⁿ núú vëxi-gá.

²⁰ Te na càchí tnúhu-í xii-n nàcuáa quèe-xi ndi usá chódíní nǐ xiní-n yòtnǐ-í xio ndaha cùha-í, ndihì nàcuáa quèe-xi ndi usá sá nǐ cuáha mee-ni dǐhúⁿ cuááⁿ, sá ndèé dité-xi te yìndodo ñⁿ caa candíl núú dité-xi-áⁿ. Te ndi ùsá chódíní-áⁿ, xiáⁿ cúú-xí sǎ cútnùníní iní-ó sǎ ndécú ùsá cue téé xìnu cuechi núú Yá Ndiöxí, te ndi ùsá cue téé-áⁿ ndécú-güedè ndi ùsá xichi núú ndécú ñáyiu ndècu ichi Yá Ndiöxí. Te cuendá ndi ùsá sá ndèé dité-xi-áⁿ, xiáⁿ cúú-xí sǎ cútnùníní iní-ó sǎ ndécú ùsá xichi ñáyiu ndècu ichi Yá Ndiöxí —duha càchí Yaá càháⁿ-áⁿ.

2

Tnúhu sá cúú-xí ñáyiu xǐndecu ichi Yá Ndiöxí ndécú ñùú Éfesú

¹ Te ní cachí tucu Yaá càháⁿ-áⁿ xii-í sá chídó tnùníní-í nchaa tnúhu sá vítná càháⁿ-gá ñⁿ núú tùtú, te tendaha-í quíhíⁿ ndaha téé xìnu cuechi núú Yá Ndiöxí ndécú ñùú Éfesú sá cúú-xí cuè ñáyiu xǐndecu ichi-gá ndécú ñùú-áⁿ, te duha ní cachí-gá: “Yúhú cúú-í Yaá núndàha úsá chódíní xio ndaha cùha-í, te xìca cuu-í núú ndécú ndi usá sá nǐ cuáha mee-ni dǐhúⁿ cuááⁿ, sá ndèé dité-xi te yìndodo ñⁿ caa candíl núú dité-xi.

² Te yúhú xìní-í nchaa nàcuáa quide nchohó ñáyiu xǐndecu ichi Yá Ndiöxí ndécú ñùú Éfesú, te xìní-í sá ío ndècu ndee-ndo quide chiuⁿ-ndo cuendá-gá, te ío quide cahnu iní-ndó ndècu-ndo quide-ndo chiuⁿ-gá. Te xìní-í sá ñà túú tnàhí tnàhá iní-ndó nàcuáa quide nchaa ñáyiu ndècu ichi cuehé ichi duha. Te xìní tucu-í sá xító ndèé-ndó cuè téé càchí sá nǐ tendaha-í véxi càháⁿ tnúhu-í te ñá ndàá sá

càháⁿ-güedé tnúhu-í, te ducaⁿ te cùtnuní iní-ndó sã ñã ndáá sá càháⁿ-güedé tnúhu-í.

³ Te xìní tucu-í sá ïo ndòho-ndo quide-ndo chiuⁿ cuendá-í, te ducaⁿ ïo quide cahnu iní-ndó cuèi nándi yãha-ndo, te ñá túú cùu dusaⁿ-ndo quide-ndo chiuⁿ-áⁿ.

⁴ Dico ñá túú cùu váha iní-í chi nchòhó ñá túú-gã quidé-ndó dàtná ní xóo cada-ndo cùtnàhá vitna cùu víi-ni ní sándáá iní ñáhá-ndó xii-í, chi vitna ñá túú-gã cúú iní ñáhá vïhi-ndo datná ní xóo cada-ndo dàvá-áⁿ.

⁵ Te chí dándàcu iní nàcuáa ní xóo cada-ndo cùtnàhá vitna cùu saa ní sándáá iní ñáhá-ndó xii-í, te ndixi cuèchi iní-ndó sã ñà túú-gã quidé vãha-ndo ndècu-ndo vitna, te nucuíta saa tùcu-ndo cada-ndo datná ní xóo cada-ndo ndéé díhna. Te nchòhó cada iní-ndó sã ndécú ndïhi-ndo ìⁿ sá ní cuáha mee-ni díhúⁿ cuááⁿ, sá ndéé dité-xi te yìndodo ìⁿ caa candíl núú dité-xi. Te núu vá ndíxí cuèchi iní-ndó nàcuáa quide-ndo ndecu-ndo ña, te quixi-í xocàni-í xíãⁿ, te ducaⁿ sãtnahá-xi cada ñaha-í xii-ndo te núu vá ndíxí cuèchi iní-ndó nàcuáa quide-ndo ndecu-ndo, te ducaⁿ te vá yòo-gá nàtacá chiñuhu ñaha xii-í ñuú-ndó.

⁶ Dico quide váha-ndo ìⁿ xichi chi dàquee tíhú-ndó nchàa sá quidé cuè ñáyiu cùu nicolaitás, te yúhú tnàhá-í dáquèe tíhù-í nchaa sá quidé ñáyiu-áⁿ.

⁷ Te nchòhó cada cuendá váha-ndo nàcuáa xãhaⁿ-í xii Espíritú Yã Ndiõxí xãhaⁿ-xi xii cue ñáyiu ndècu ichi-gá xìndecu nchaa xichi. Te duha ndùu tnúhu xãhaⁿ-í xii Espíritú-gá xãhaⁿ-xi xii-yu: Cúñaha-n xii nchaa ñáyiu sá núu na càda ndee iní-yu yáha-yu nándi sá ná yãha-yu sá cuendá-í, te yúhú cada-í te nduu táhũ-yu cundecu váha-yu núú ndécú Yã

Ndiöxí, duha xăhaⁿ-ĩ xii Espíritú-gá cúu-xi ñăyiu”, duha cächí Yaá cáháⁿ-áⁿ. Te nchaa tnúhu-áⁿ ñí chídó tnùn-í sá cúu-xí ñăyiu xĩndecu ichi Yá Ndiöxí ndécú ñùú Éfesú.

Tnúhu sá cúu-xí ñăyiu xĩndecu ichi Yá Ndiöxí ndécú ñùú Èsmirná

⁸ Te ní cachí tucu Yaá cáháⁿ-áⁿ xii-í sá chídó tnùn-í nchaa tnúhu sá vítná cáháⁿ-gá ñⁿ núú tùtú, te tendaha-ĩ quíhíⁿ ndaha téé xínu cuechi núú Yá Ndiöxí ndécú ñùú Èsmirná sá cúu-xí cuè ñăyiu xĩndecu ichi-gá ndécú ñùú-áⁿ, te duha cächí-gá: “Yúhú ndécú-í ndéé cútnàhá ní ngáva ñuyíú, te ñu-ni-í cundecu-í ndéé ná sáá nduu nàa-xi ndihí nchaa sá íó, te ñu-ni-í ní xíhí te ní ndoto-í ndécú-í vítna.

⁹ Te yúhú xìn-í nchaa nàcuáa quide nchohó ñăyiu ndècu ichi Yá Ndiöxí ndécú ñùú Èsmirná. Te xìn-í sá ío ndòho-ndo ndecu-ndo sá cuendá-í, te xínu tucu-í sá ío ndàhú-ndó dico cùu-ndo ñăyiu xĩndecu váha núú Yá Ndiöxí. Te xínu tucu-í sá ío cáháⁿ cuèhé ñăyiu isràél cuendá-ndó, dico ñá túú quidé-yu nàcuáa tàú-yu cadá-yu sá cúú-yu ñăyiu isràél, chí cùú-yu ñăyiu xínu cuechi mee-ni núú sàcuíhná.

¹⁰ Dico nchòhó vá yùhú-ndó cuèi nándi cùu nchaa sá ná ndòho-ndo cuendá-í, chí sàcuíhná cada-xi te ngava dava-ndo vècaá, te ducaⁿ càda-xi chí cuín-í coto ndéé ñáhá-xí xii-ndo núu ndisa sá vā ná túhú iní-ndó sá ñchícúⁿ nihnu-ndo ichi Yá Ndiöxí. Te ndoho-ndo ùxí nduu dico vá dáñá ndéé-ndó cànchicúⁿ nihnu-ni-ndo ichi-gá cuèi na cùú-ndó sá cuendá-gá, te yúhú cada-í te nduu táhú-ndó cùndecu-ndo ndihí-gá ñí caa ñí quíhíⁿ.

11 Te nchaa nchòhó cada cuèndá váha-ndo nàcuáa xǎha^{n-í} xii Espíritú Yǎ Ndiǒxí xǎha^{n-xi} xii cue ñáyiú ndècu ichi-gá xǐndecu nchaa xichi, te duha ndùu tnúhu xǎha^{n-í} xii Espíritú-gá xǎha^{n-xi} xii-yu: Cúñaha-n xii nchaa ñáyiú sá nùu na cùndee iní-yu yáha-yu nándi sá ná yáha-yu sá cuèndá-í te vá cuíta nihnú-yu na sàá nduu cuíta nihnu nchaa dava-gá ñáyiú, duha xǎha^{n-í} xii Espíritú-gá cúu-xi ñáyiú”, duha ní cachí Yaá càhá^{n-áⁿ}. Te nchaa tnúhu-áⁿ nǐ chídó tnùn-í sá cúu-xí ñáyiú xǐndecu ichi Yá Ndiǒxí ndécú ñùú Èsmirná.

Tnúhu sá cúu-xí ñáyiú xǐndecu ichi Yá Ndiǒxí ndécú ñùú Pěrgamú

12 Te ní cachí tucu Yaá càhá^{n-áⁿ} xii-í sá chídó tnùn-í nchaa tnúhu sá vítná càhá^{n-gá} ñⁿ núú tùtú, te tendaha-í quíhíⁿ ndaha tée xínu cuechi núú Yǎ Ndiǒxí ndécú ñùú Pěrgamú sá cúu-xí cuè ñáyiú xǐndecu ichi-gá ndécú ñùú-áⁿ, te duha càchí-gá: “Yúhú cúu-í Yaá néhé ñⁿ yuchí cání te ndèe úú xio núú-xi.

13 Te yúhú xìn-í nchaa nàcuáa quide nchòhó cue ñáyiú xǐndecu ichi Yá Ndiǒxí ndécú ñùú Pěrgamú, te xìn-í tucu-í sá ndécú-ndó nùú ño cùnuu yucu ñáváha, te ñá túú dàña ndeé-ndó nchicúⁿ nihnu-ndo ìchi-í, te ducaⁿ ño sàndáá iní ñáhá-ní-ndó xii-í, te ñu-ni ducaⁿ nǐ quide-ndo cùtnàhá ní sahní-güedé té Àntipás núú ndécú-ndó ñu-ni núú dúcáⁿ ño cùnuu yucu ñáváha. Te ndí-áⁿ nǐ quide ndáá ndí ní xǐndecu ndí ichi-í chí ní cáháⁿ váha ndí cuèndá-í.

14 Dico ñá túú cúu váha iní-í cuèndá ñⁿ úú sá quidé-ndó, chí ndècu ndíhi-ndo ñáyiú nchicúⁿ nihnu-ni nchaa nàcuáa ní cáháⁿ ndí Balaám. Chí ndí-áⁿ ñà túú ní quide váha ndí chí ní dácáhu iní

ndíi ìngá téé ní xínani Bàlác nàcuáa cada-dé canu ichi-dé cue ñáyíu isràél ìngá ichi sá ñà túú vǎha, chi ní xáhaⁿ té Bàlác-áⁿ xií-yu sá cǎxí-yu nchaa sá ndúú tǎhú nchaa sá ñí cadúha cue téé ñuyíú-a dǎnani ñáyíu ndiǒxí te ñá ndàá sá ndiǒxí cúú-xí, te ní dácáhú ìní ñáhá-dě xií-yu sá cúndècú-yu ichi díí ìní.

¹⁵ Te ndècu ndihí tucu-ndo ñáyíu nchìcúⁿ nihnu sá dǎcuàha cue ñáyíu cùu nicolaitás. Te nchaa sá dǎcuàha ñáyíu-áⁿ dáquèe tíhù-í,

¹⁶ te nchòhó chí dǎndìxi cuéchi ìní sá ñà túú quide váha-ndo ndècu-ndo, chi núu ñáhá te quixi-í nàá-í ndihí cue ñáyíu-áⁿ ndihí yuchí cání sǎ quéné yùhu-í.

¹⁷ Te nchaa nchòhó cada cuendá váha-ndo nàcuáa xǎhaⁿ-í xii Espíritú Yǎ Ndiǒxí xǎhaⁿ-xi xii cue ñáyíu ndècu ichi-gá xǐndecu nchaa xichi. Te duha ndúu tnúhu xǎhaⁿ-í xii Espíritú-gá xǎhaⁿ-xi xii-yu: Cúñaha-n xii nchaa ñáyíu sá núu na càda ndee ìní-yu yáha-yu nándi sá ná yǎha-yu sá cuendá-í, te yúhú cuáñaha-í sá ndúú yùhu xií-yu caxí-yu ìⁿ sá vǎtá quíní-gá-yu caxí-yu. Te xǎⁿ cúú-xí mànáá sá ñí xóo caxi cue ñáyíu ní xíndecu ndéé sanaha, te cuáñaha tùcu-í ìⁿ caa yúú cuìxíⁿ xií-yu, te núu yúú-ǎⁿ cundeé ìⁿ dìu saa. Te dìu-áⁿ vǎ yǒo tnàhí xìní chi ìⁿdìi díí-ni ñáyíu na quèheⁿ cuendá dìu-áⁿ quíní-yu, duha xǎhaⁿ-í xii Espíritú-gá cúu-xi ñáyíu”, duha càchí Yaá càháⁿ-áⁿ. Te nchaa tnúhu-áⁿ ñí chídó tnùn-í sá cúú-xí ñáyíu xǐndecu ichi Yá Ndiǒxí ndécú ñúú Pèrgamú.

Tnúhu sá cúú-xí cuè ñáyíu xǐndecu ichi Yá Ndiǒxí ndécú ñúú Tiàtirá

18 Te ní cachí tucu Yaá cãhá^{n-án} xii-í sá chídó tñuní-í nchaa tñúhu sá vítná cãhá^{n-gá} ñⁿ núú tütú, te tendaha-ï quíhíⁿ ndaha tẽe xínu cuechi núú Yã Ndiõxí ndécú ñúú Tiàtirá sá cúú-xí cuè ñáyiu xíndecu ichi-gá ndécú ñúú-án, te duha cãchí-gá: “Yúhú cúú-í Déhe Yá Ndiõxí, te càa tĩnuu-í dàtná cáá itá ñuhú, te sáhà-í cáá dàtná cáá sã nání bròncé òré ñúhú-xí núú ñúhú càyú-xi.

19 Te yúhú xini-í nchaa nàcuáa quide nchohó ñáyiu xíndecu ichi Yá Ndiõxí ndécú ñúú Tiàtirá. Te xini tucu-í sá ïo cùu iní-ndó Yã Ndiõxí te sàndáá iní-ndó-gã. Te xini tucu-í nàcuáa nduu chiuⁿ quide-ndo sá cúú-xí-gã. Te xini tucu-í sá ïo quide cahnu iní-ndó cuèi nándi cùu sá yãha-ndo ndècu-ndo. Te xini tucu-í sá ïo-gá ndúcú ndè-ndo quide váha-ndo vitna dacúúxí cǔtnáhá vitna cùu saa ní sàndáá iní-ndó Yã Ndiõxí.

20 Dico ñá túú cùu váha iní-í cuendá ñⁿ sá quidé-ndó, chi ñá túú tñàhí ná sání iní-ndó ndècu ndihí-ni-ndo ñáyiu nchìcúⁿ nihnu nchaa nàcuáa dànehé ñáhá ñàha nani Jezabél. Te ñaha-án cãchí-aⁿ sá cãhá^{n-aⁿ} tñúhu Yá Ndiõxí dico ñá ndáá sá cãhá^{n-aⁿ} tñúhu-gá, te cuáhá^{n-aⁿ} dándahú-aⁿ nchaa ñáyiu xínu cuechi núú-í ndihí nchaa sá dánèhé ñáhá-án cuendá cundecú-yu ichi díí iní, te caxí-yu nchaa sá ndúú tãhú nchaa sá ñí cadúha cue tẽe ñuyíú-a dãnani ñáyiu ndiõxí te ñá ndáá sá ndiõxí cúú nchàa xíáⁿ.

21 Te ní cuu vài nduu ta dacaca-í ndécú-án cuendá ndixi cuéchi iní-aⁿ sá ñà túú quide váha-aⁿ ndècu-aⁿ, te cuèi ducaⁿ quide-í dico ñá túú cuini-aⁿ daña-aⁿ ni ñⁿ sá cuèhé sá dúhá quide-aⁿ.

22 Te vitna yúhú ío dandòho-í-aⁿ chi tñi ñaha cuèhé xii-aⁿ, te ñi-ni ducaⁿ ïo dandòho-í nchaa

ñáyiú quide datná quidé-áⁿ te núu vá ndíxí cuěchi iní-yu sá ñà túú quide váha-yu ndécú-yu, te dàñá-yu nchaa sá cuéhé sá dúhá quidé-yu.

²³ Te nchaa ñáyiú cùndihí ñaha xii ñaha-áⁿ cahni-í-yu, te ducaⁿ te nchòhó ndihí dava-gá nchaa ñáyiú xĩndecu ichi Yá Ndiõxí ndécú nchaa xichi cutnuní iní-ndó ndìhí-yu sá yǔhú cúu-í Yaá xìní ndáá nchaa nàcuáa sàni iní ñáyiú, ndihí nchaa nàcuáa quide-xi iní-yu. Te nchòhó nàcuáa ndùu sá quidé-ndó ìⁿ ìⁿ-ndo te ducaⁿ cùnduu sá táxì-í nduu táhú-ndó.

²⁴ Te dava nchòhó ñáyiú ndècu ñuu Tiàtirá, ñáyiú ñá túú nchìcúⁿ nihnu nàcuáa dànehé ñáhá ñaha nani Jezabél-áⁿ ñà túú xìní-ndó nã cúú sã càchí ñáyiú ndùu yuhu dachau iní ñáhá yùcu ñávãha. Te nchòhó, ñá túú nãgá cachí tnúhu-í xii-ndo càda-ndo

²⁵ diu-ná sá ïo nducu ndèe-ndo cada-ndo nchaa nacuáa càháⁿ tnúhu sá ndécú ndihí-ndo, te ducaⁿ-ni càda-ndo ndéé òré quixi tucu-í.

²⁶ Te nchaa nchòhó ñáyiú na càda ndee iní yáha nándi sá ná yãha sá cuendá-í, te núu na càda-ni-ndo nchaa nacuáa cuìní-í cada-ndo ndéé nduu vã cùndècu-gá-ndó ñùyíú-a, te yúhú taxi-í tnúhu ndee ìní xii-ndo sã táxí tnùnì-ndó nchaa ñáyiú ñuyíú

²⁷ dàtná ní quide mee Tãtà-í Dútú Ndiõxí ní taxi-gá tnúhu ndee ìní ndécú ndihí-í, te ducaⁿ càda ñaha-í xii-ndo tàxi-í tnúhu ndee ìní xii-ndo cuendá ïo taxi tnùnì-ndó, te cada iní-ndó sã cáda-ndó cuè ñáyiú dàtná quidé-xí ìⁿ quídi òré tàhú-xi càchi duuⁿ-xi, te ducaⁿ chi nchòhó cada-ndo sã ncháá ñáyiú ñá túú quide váha cuíta nihnú-yu.

²⁸ Te cada iní-ndó sã dàtná dáyèhé chódíní quiti

quène oré sa ta tũndaá-nă cuáháⁿ ducaⁿ càda-xi oré ná sàà nduu ngũĩta-xi cada váha-xi, te ducaⁿ chi yúhú cada-í nàcuáa nduu táhú-ndó cùndecu ndĩhi ñaha-ndo xii-í núú ïo váha càa ndecu-í.

²⁹ Te nchaa nchòhó cada cuèndá váha-ndo nàcuáa xáhaⁿ-ĩ xii Espíritú Yă Ndiõxí xáhaⁿ-xi xii cue ñáyiu ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ní chídó tnùní-í sá cúú-xí ñáyiu xĩndecu ichi Yá Ndiõxí ndécú ñùú Tiàtirá.

3

Tnúhu sá cúú-xí ñáyiu xĩndecu ichi Yá Ndiõxí ndécú ñùú Sărdís

¹ Te ní cachí tucu Yaá càháⁿ-áⁿ xii-í sá chídó tnùní-í nchaa tnúhu sá vítná càháⁿ-gá ìⁿ núú tùtú, te tendaha-ĩ quíhíⁿ ndaha tée xĩnu cuechi núú Yă Ndiõxí ndécú ñùú Sărdís sá cúú-xí cuè ñáyiu xĩndecu ichi-gá ndécú ñùú-áⁿ te duha càchí-gá: “Yúhú cúú-í Yaá ndécú ndĩhi ndi usá espíritú cúú cuèndá Yă Ndiõxí, te dũu-ni-í cúú-í Yaá ndécú ndĩhi ndi usá chódíní. Te yúhú xìní-í nchaa nàcuáa quide nchohó ñáyiu xĩndecu ichi Yá Ndiõxí ndécú ñùú Sărdís, te xìní-í sá cúú-ndó dàtná ñáyiu ní xíhí cuèi càchí ñáyiu sá ñáhá.

² Te chí cuăha cuèndá nàcuáa quide-ndo ndecu-ndo vitna, te nducu ndèe-ndo cada-ndo ìⁿ úú-gá nchaa sá văha nchícúⁿ nihnu-ndo vitna, chi sa ndètu vií-nă dañá-ndo nchàa-ndi túhú sá văha quide-ndo ni cuu, te quide cuèndá-í sá ñà túú quide-ndo nchaa nacuáa cùní Yă Ndiõxí cada-ndo.

³ Te chí dándacu iní nàcuáa càháⁿ tnúhu sá ñi xĩndedóho-ndo cũtnáhá ní tuha-ndo ichi Yá Ndiõxí, te canchicúⁿ nihnu-ndo càda-ndo nacuáa

càháⁿ tnúhu-áⁿ, te ndixi cuéchi iní-ndó sã ñã túú quide váha-ndo ndècu-ndo, te núu vá nácuãha-ndo cuendá nàcuáa quide-ndo ndecu-ndo ña, te cada-í dàtná quidé ñàdúhú, chi òré ñá túú nã yíhí iní-ndó quèxio-í núú ndécú-ndó.

⁴ Dico ndècu ndih-ndo ìⁿ úú ñáyiu cãndoo caa nine iní-xi, chi ñáyiu-áⁿ ñí nduu táhũ-yu cuihnú-yu dóó cuixíⁿ cuendá cundecu ndih-í-yu, te ducaⁿ chi cùdũ-yu núù-í.

⁵ Te nchaa ñáyiu na càda ndee iní-xi yáha nándi sá ná yáha sá cuendá-í, te ñáyiu-áⁿ nduu táhũ-yu cuihnú-yu dóó cuixíⁿ, te vá náquète-í diũ-yu núú tütú núú yódó tnùní cue ñáyiu ní nduu táhú cundecu ndih-í ní caa ní quíhíⁿ, te cúñaha-í xii Tãtà-í Dútú Ndiõxí ndih-í cue espíritú xínú cuèchi núù-í sá ñáyiu-áⁿ cúũ-yu ñáyiu cùu cuendá-í.

⁶ Te nchaa nchòhó cada cuendá váha-ndo nàcuáa xáhaⁿ-í xii Espíritú Yã Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ñí chídó tnùní-í sá cúú-xí ñáyiu xĩndecu ichi Yá Ndiõxí ndécú ñùú Sãrdís.

Tnúhu sá cúú-xí cuè ñáyiu xĩndecu ichi Yá Ndiõxí ndécú ñùú Filàdelfiá

⁷ Te ní cachí tucu Yaá càháⁿ-áⁿ xii-í sá chídó tnùní-í nchaa tnúhu sá vitná càháⁿ-gá ìⁿ núú tütú, te tendaha-í quíhíⁿ ndaha téé xĩnu cuechi núú Yã Ndiõxí ndécú ñùú Filàdelfiá sá cúú-xí cuè ñáyiu xĩndecu ichi-gá ndécú ñùú-áⁿ, te duha càchí-gá: “Yúhú cúù-í Yaá ío váha quide ndáá te ñã túú tnàhí cuèchi-í. Te díhna-gá ndíi Dàvíí ní taxi tnùní ndíi ñáyiu, te vitna yúhú táxí tnùní-í-yu, te yúhú

cáháⁿ-í te núu nděndida càa ñáyiu ndíhu ndaha-ĩ te nděndida càa ñáyiu vá ndíhu ndaha-ĩ.

⁸ Te yúhú xini-í nchaa nàcuáa quide nchohó ñáyiu xĩndecu ichi Yá Ndiõxí ndécú ñùú Filàdelfiá, te yúhú ní quide-í nàcuáa ní níhí-ndó ìⁿ ichi cahnu quide-ndo chiuⁿ-í, te vá yõo ìⁿ cada nàcuáa vá nihí-gá-ndó nàcuáa cada-ndo chiuⁿ-í. Te cuëi ñá túú ïo ñihí ndéé-ndó cùndecu-ndo ichi Yá Ndiõxí dico tñi-ndo nchaa tnúhu càháⁿ-í, te ni ìⁿ xito ñá túú càháⁿ-ndó sã ñà túú ndècu ndíhi ñaha-ndo xii-í.

⁹ Te nchaa ñáyiu quide nchaa nacuáa cuení yucu ñävãha, ñáyiu-áⁿ cúy-yu ñáyiu isràél, te cuëi cùú-yu ñáyiu isràél dico ñá túú quidé-yu nàcuáa tàú-yu cadá-yu, te yúhú cada-í sá ncháá ñáyiu-áⁿ canehé-yu sá yíñuhu núú-ndó, te cutnùní iní-yu sá yúhú ío cùu iní ñãhà-í xii-ndo.

¹⁰ Te ío quide ndee-ni iní-ndó nchìcúⁿ nihnu-ndo quide-ndo nchaa nacuáa ní càháⁿ-í, te xíãⁿ coto ñaha-ĩ xii-ndo ñà túú ñã tnahá-ndó ndùu na quixi nchaa tnúndòho tnúhu ndàhú ñuyíú-a. Te òré quexìo nchaa tnúndòho-áⁿ ñuyíú-a te dàvá-áⁿ cutnùní nàcuáa ndùu sá quidé ìⁿ ìⁿ ñáyiu.

¹¹ Te ío ndíhi quixi tucu-í. Te vá dáñá ndéé-ndó càda-ndo nchaa sá vãha nchìcúⁿ nihnu-ndo quide-ndo cuendá sá vã cuíta sá ñi cachí Yá Ndiõxí nduu táhú-ndó.

¹² Te nchaa nchòhó ñáyiu na càda ndee iní yáha nándi sá ná yãha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tãtà-í Dútú Ndiõxí, te vá ìⁿ ndùu-gá xocuiñi-ndó núú ndécú-gã. Te cada iní-ndó sã dàtná sá chídó tñi-í diu Tãtà-í Dútú Ndiõxí ñi-ndo chi ducaⁿ-ni cùndecu-ndo ndíhi-gá, te cada tucu iní-ndó sã

dàtná sá chídó tnùnì-í nàcuáa nàni ñuú-gá ñii-ndo, chi diu ñuú-gá-án cundecu-ndo, te ñuú-án nání-xí Jèrusalén Sáá, duha nàni ñuú-gá. Te ñuú-án quee-xi andiu núú ndécú Yá Ndiöxí Yaá cúú Tātà-í quée-xi ñuyíú. Te cada tucu iní-ndó sã dàtná sá chídó tnùnì-í diu mee-í ñii-ndo, te xíãⁿ cúú-xí ñⁿ diu saa, te ducaⁿ càda iní-ndó chi cundecu ndihi ñaha-ndo xì-í.

13 Te nchaa nchòhó cada cuendá váha-ndo nàcuáa xãhaⁿ-í xii Espiritú Yá Ndiöxí xãhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yaá càháⁿ-án. Te nchaa tnúhu-án nì chídó tnùnì-í sá cúú-xí ñáyiú xĩndecu ichi Yá Ndiöxí ndécú ñùú Filàdelfiá.

Tnúhu sá cúú-xí ñáyiú xĩndecu ichi Yá Ndiöxí ndécú ñùú Laodiceá

14 Te càchí tucu Yaá càháⁿ-án xii-í sá chídó tnùnì-í nchaa tnúhu sá vítná cãháⁿ-gá ñⁿ núú tütú, te tendaha-í quíhíⁿ ndaha téé xìnu cuechi núú Yá Ndiöxí ndécú ñùú Laodiceá sá cúú-xí cuè ñáyiú xĩndecu ichi-gá ndécú ñùú-án, te duha càchí-gá: “Yúhú cúú-í Yaá quidé núú Yá Ndiöxí, te cùu-í Yaá quidé ndáá chi càháⁿ ndáá cuiti-í nàcuáa càháⁿ Yá Ndiöxí, Te yúhú cúú-í Yaá ní quide ní ngúndecu nchaa sá ñí cadúha Yá Ndiöxí.

15 Te yúhú xìnì-í nchaa nàcuáa quide nchohó ñáyiú xĩndecu ichi Yá Ndiöxí ndécú ñùú Laodiceá, te xìnì-í sá ñà túú cuìnì-ndó cànchicúⁿ nihnu-ndo nchàa nacuáa càháⁿ-í, te ni ñà túú cuìnì-ndó dàña duuⁿ-ndo. Te váha-gá sá dúúⁿ dùuⁿ cada-ndo nchaa nacuáa càháⁿ-í àdi núu ñáhá te duuⁿ duuⁿ dañ-ndo.

16 Te sá dúcáⁿ quide-ndo ñá túú cuìnì-ndó dùuⁿ duuⁿ-ni cada-ndo nàcuáa càháⁿ-í, te ni ñà túú

cuiní-ndó dùuⁿ duuⁿ-ni dañ-ndo te sáá nduu vă cùndèe-gá iní-í cuendá nchaa sá quidé-ndó-ăⁿ, te daquèe tihú ñáhà-í xii-ndo.

¹⁷ Te cächí-ndó sã cuicá-ndó, te ío váha ta yãha-ndo nchàa nduu cuáháⁿ, te ñá túú tnàhí ná cúmăní xii-ndo, te ñá túú cùtnuní iní-ndó sã cúú-ndó dàtná cue ñáyiú ío ndàhú yãha, te cùu-ndo datná ñáyiú ndàhú, ñáyiú ío cùndahú iní ñáhá tnàha ñáyiú-xi, te cùu-ndo datná cue ñáyiú cuàá, te cùu tucu-ndo datná cue ñáyiú ndàhú ñá túú tnàhí dóó-xi.

¹⁸ Te na cächí tnúhu-í xii-ndo sã cadá-ndó dàtná xiquide cue ñáyiú sàaⁿ ìⁿ sá nì cuáha mee-ni dǐhúⁿ cuàáⁿ sá ío váha càa, te ducaⁿ quidé-yu te ío-gá cúú cuicá-yu. Te cada tucu-ndo dàtná xiquide cue ñáyiú sàaⁿ dóó cuixíⁿ sácũlhnú-yu cuendá sá vă cúú-yu dàtná ñáyiú ndàhú ñá túú dǒó-xi, te cada tucu-ndo dàtná quidé cuè ñáyiú sàaⁿ yúcu quèe núú-xi nàcuáa cutnùní váha núú-yu, te duha cãháⁿ-í xãhaⁿ-ǐ xii-ndo chi cuiní-í sá nàtuha ñaha-ndo xii-í, te ío váha cundecu-ndo sã cúú-xí Yă Ndiǒxí.

¹⁹ Te cãháⁿ-í dóho nchaa ñáyiú cùu iní-í òré ñá túú quide ndáá-yu, te dândoho-í-yu, núu xǐăⁿ cuiní-í sá nchòhó ndixi cuéchi iní-ndó sã ñà túú quide váha-ndo ndècu-ndo.

²⁰ Te na cächí tnúhu-í xii-ndo sã yǔhú cúú-í dàtná ìⁿ tée nùtnǐ yuyèhe ndaa quehé te cãháⁿ-í ñáyiú yìhì xití vehe, te núu na càda cuendá-yu sá cãháⁿ-í te nacaáⁿ-yu yuyèhe te quíhu-í xití vehe cudini-í ndihí-yu, te duha cãháⁿ-í chi cuiní-í cundecu ndihì ñaha-ǐ xii-ndo.

²¹ Te nchaa nchòhó ñáyiú na càda ndee iní-xi yáha nándì sá ná yãha sá cuendá-í, te yúhú taxi-í

xii-ndo ìíⁿ xichi núú ndécù-í cundecu-ndo te cunuu-ndo tnàhá-ndó dàtná cúnùu-í, chi yúhú ducaⁿ ñí quide ndee ìní-í ní yáha-í nándi sá ñí yáha-í te vitna ní nduu táhù-í ndécù-í núú ndécú Tàtà-í Dútú Ndiöxí cúnùu-í.

²² Te nchaa nchòhó cada cuendá váha-ndo nàcuáa càháⁿ Espíritú Yá Ndiöxí xáhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ñí chídó tnùn-í sá cúu-xí ñáyiú xĩndecu ichi Yá Ndiöxí ndécú ñùú Laodiceá.

4

Nàcuáa chĩñuhu ñáyiú Yá Ndiöxí andiu

¹ Te sátá ñí yáha ducaⁿ ñí cuu te ní xiní-í nchì andiu, te ní càháⁿ tucu Yaá ní càháⁿ ndihi ñaha xii-í díhna, te Yaá-áⁿ ñí càháⁿ níhi-gá dàtná càháⁿ níhi ìíⁿ cútú, te ní cachí-gá xii-í:

—Taquène iha te na dànehé ñáhà-í xii-n nchàa nacuáa cada-xi ndéé núú cuàháⁿ núú vèxi — càchí-gá.

² Te òré-ni-áⁿ ñí quide ñaha tùcu Espíritú Yá Ndiöxí xii-í nàcuáa càchí iní-xi, te ñu-ni òré-áⁿ ñí xiní-í nútñí ìíⁿ xilé váha andiu te cà datná cáá xilé sácóo nchihí cue ñáyiú ío cúnuu, te núú xilé váha-áⁿ núcóo Yaá táxí tnùn-í.

³ Te Yaá-áⁿ cáá-gá dàtná cáá yúú chàhnhí yúú vaha sá nání jaspé, te cà tucu-gá dàtná cáá yúú vaha sá nání còrnalíná, te ñuhu doco ñaha ìíⁿ cóo yáhnchí xii-gá, te tásaⁿ-di dàtná tásaⁿ ìíⁿ yúú vaha sá nání èsmeraldá.

⁴ Te ní xiní tucu-í nútñí ócó cúmí xilé váha ñí càndéé núú núcóo-gá, te núú xilé-áⁿ xĩnucóo ócó cúmí cue téé cùu sacuéhé te xixíhnu-güedé mee-ni

dǒó cuèxíⁿ, te ìⁿ caa coròná sá nì cuáha mee-ni dǐhúⁿ cuàáⁿ xǐxúhuⁿ díquí-güedě.

⁵ Te núú núcǒo Yaá táxí tñùní-áⁿ sàá ndúté, te càháⁿ ñúhu te xica chíhi-xi dóndaha, te càyú úsá ití núú núcǒo-gá, te sá úsá ití-áⁿ xǐáⁿ cútñùní sá ndécú úsá espíritú cúú cuèndá-gá.

⁶ Te ndècu ìⁿ sá ndécú ndàa núú-gǎ te xǐáⁿ cáá dàtná cáá làmár, te dàtná cáá vǐdriú cáá ñìhí.

Te ñi càndéé dǐñi Yaá núcǒo-áⁿ xǐnutñi cùmí quiti te titní víhí tǐnuu-güedi ndeé ndàa sátá-güedi ndihi ndàa núú-güedi.

⁷ Te quiti dǐhna nuu càa-di datná cáá ndìcaha, te quiti cùu uú cáá-dí dàtná cáá ndìcutu, te quiti cùu uní néhé-dí nǔú tǎe, te quiti cùu cumí cáá-dí dàtná cáá yàcolo oré cuáháⁿ-dí núú tàchí.

⁸ Te ndi cùmí quiti-áⁿ ndèé ìñú ndíxíⁿ-güedi ìⁿ ìⁿ-güedi, te ñìhí xití ndíxíⁿ-güedi ndihi ndàa sátá ndíxíⁿ-güedi ndèé tǐnùu-güedi, te nduu niú chíñùhu-güedi Yá Ndiǒxí, te xǎhaⁿ-güedi xii-gá:

Yòhó Dútú Ndiǒxí ducaⁿ-ni ta quide ndáá-n vǎxi, te ducaⁿ-ni quide ndáá-n cuèi vitna, te ñiu-ni ducaⁿ càda ndáá-n nǔú cuáháⁿ núú vǎxi, te cùu-n Yaá quidé nchàa-ndi túhú sá vǎha, te ñiu-ni-n sà ndecu-n ndéé cútñàhá ní cuáha ñuyíú,

te ñiu-ni-n ndècu-n cuèi vitna, te ñiu-ni-n cùndecu-n cuèi ndéé núú cuáháⁿ núú vǎxi. Duha xǎhaⁿ cuè quiti-áⁿ xii Yaá núcǒo núú xilé váha-áⁿ chíñùhu ñaha-güedi.

⁹ Te cue quiti-áⁿ ìo ndàcáⁿ táhú-güedi núú Yáá núcǒo núú xilé váha-áⁿ cuèndá nchaa sá quidé-gǎ. Te Yaá-áⁿ cúú-gǎ Yaá ndécú nchàa nduu nchaa

quíú. Te cue quiti-áⁿ càchí-güedi sá ïo càhnu cuu-gá te nèhe-güedi sá yíñùhu núú-gă. Te ndi tnahá òrè ducaⁿ càháⁿ-güedi,

¹⁰ te ndi òcò cúmí cue tée cùu sacuéhé xñucóo-áⁿ ngüñí xítí-güedě núú Yàá núcõo-áⁿ, chi diu-gá cúú-gă Yaá ndécú nchàa nduu nchaa quíú te chĩñuhu ñaha-güedé xii-gá, te tàva-güedé coróná ñuhú dǐquí-güedě te tàxi ndecu-güedé núú-gă, te xăhaⁿ-güedě xii-gá:

¹¹ Yòhó cúú-n Dütú Ndiõxí Yaá cúú cuendá ñáhá xì-ndí,

te ío càhnu cuu-n, te ío váha quède-n,

te nèhe-ndí sá yíñùhu núú-n, chi ducaⁿ tàú-xi cada-ndí,

chi yòhó cúú-n Yàá ní cadúha nchaandi túhú sá ìó, te ducaⁿ ñí ngúndecu nchaa xǎⁿ chi mee-n dùcaⁿ ní sani iní-n càda-n.

5

Cuendá Yaá cáá dàtná cáá ñⁿ mbéé quiti ní dánñcuèhé-güedé ndihí cuendá ñⁿ tutú

¹ Te ní xini tucu-í sá Yàá núcõo núú xilé váha-áⁿ núndàha-gá ñⁿ tutú ní nacaúnuu xio ndaha cùha-gá, te ndèè lètrá ndàa sátá-xi ndihí ndàa xítí-xi, te úsá tnahá tutú lìhli ñùhu seyú ndèè sátá tütú-áⁿ cuendá sá vǎ dáñá-xí nacaá.

² Te ní xini-í ñⁿ espíritú xínú cuèchi núú Yă Ndiõxí, te ndee vèhi-xi te níhi càháⁿ-xi, te càchí-xi:

—¿Yoo tàú-xi xocani nchaa tutú lìhli ñùhu seyú ndèè sátá tütú-a te nadacàá-xi? —càchí espíritú-áⁿ.

³ Dico ni àndi, te ni nũ ñuyú-a, te ni ndàa xítí ñuhu ñá túú ññáiyu tàú-xi nadacàá tutú-án te cundèhé-yu.

⁴ Te yúhú ní ngüíta-í ndàhyú víhì-í cuendá sá ñà túú ññáiyu tàú-xi nadacàá tutú-án cundèhé-yu.

⁵ Te ññáiyu cùu tée cùu sacuéhé xñucóo xián ññáiyu cachí-güedé xii-í:

—Vá ndàhyú-gá-n, te cada cuendá-n chi Yaá ío cùnuu cuu ndi mee cue ññáiyu cùu ññáiyu tñáhá ndí Jùdá, diu-ni Yaá cúu ññáiyu tñáhá ndí Dàví, Yaá-án cúu-gá Yaá ní ndacu ní yáha nchaa nándi sá ññáiyu, núu xián diu-gá tàú-gá xocàni-gá nchaa tutú líhli ññáiyu seyú ndéé sá tá tútú-án te nadacàá-gá —duha càchí tée cùu sacuéhé-án.

⁶ Te tnuú ndi ócú cùu cùu sacuéhé xñucóo-án, ndihi tnuú ndi cùu cùu sacuéhé xñucóo-án, ndihi núu núcúo Yaá táxi tñùn-í ññáiyu ní xini-í núu tñùn-í ññáiyu Yaá cáá dàtná cáá ññáiyu mbéé quiti ní dññáiyu-güedé te ní xihí-di ni cùu te ní ndoto-di, te ndéé úsá ndi qui-di, te ndéé úsá tñùn-di, te sá úsá tñùn-di-án cùu tñùn-í sá ndécú úsá espíritú cúu cuendá Yá Ndióxi, duca cáa Yaá-án ññáiyu ní xini-í. Te cue espíritú-án ññáiyu tendaha-gá xicá cùu-xi ni caa xico ññáiyu.

⁷ Te Yaá cáá dàtná cáá ññáiyu mbéé quiti ní dññáiyu-güedé-án ññáiyu sáhá-gá núu Yáá núcúo núu xilé váha-án.

⁸ Te òré ní quehe-gá tutú-án te ndi cùu cùu sacuéhé xñucóo-án, ndi dññáiyu núu-güedé xñucóo-án, te ndi dññáiyu núu-güedé xñucóo-án yaá sá náni àrpá, te xñucóo tucu-güedé ndi dññáiyu núu-güedé ññáiyu caa tñùn-í ní cuáha mee-ni dññáiyu

cuàáⁿ, te chitu dǔsa sá sàháⁿ tnámí. Te ñúhmá dǔsa sá sàháⁿ tnámí-ǎⁿ cúú-xí dàtná nchaa tnúhu càháⁿ nchaa ñáyiu ndècu ichi Yá Ndiǒxí òré càháⁿ ndihì ñàhá-yu xii-gá.

⁹ Te xìta-güedé ìⁿ ndudú sáá ndihì cue quitì-áⁿ chíñùhu ñaha-güedé xii-gá, te càchí-güedé ndihì cue quitì-áⁿ:

Yòhó tàú-n quèheⁿ-n tutú-a te xocàni-n nchaa tutú lìhli ñùhu seyú ndèé sátá-xi,

chi yòhó ní sati níñí-n te ní xíhí-n,

te cuèndá xíǎⁿ ní nduu cuèndá Yá Ndiǒxí cue ñáyiu ìⁿ ìⁿ nàción, ndihì ñáyiu xǐndecu ìⁿ ìⁿ ñuú, ndihì ñáyiu càháⁿ ndí dííⁿ ndí dííⁿ núú tnúhu, ndihì ñáyiu xǐndecu ìⁿ ìⁿ xichi.

¹⁰ Te ní quidé-n-yu dàtná cue téé yìndaha ñáyiu, te ní quide túcú-n-yu dàtná cue dútú sǎ cúú-xí Yá Ndiǒxí.

Te sáá nduu te taxi tnùnì-yu ñuyíú-a.

Duha càháⁿ cue téé-áⁿ ndihì cue quitì-áⁿ chíñùhu-güedé ndihì-güedé Yaá-áⁿ.

¹¹ Te sátá dúcáⁿ te ní tecú dóho-í ní cáháⁿ cuéhé víhí espíritú xínú cuèchi ñi candéé núú núcǒo Yaá táxí tnùnì-áⁿ, ndihì núú xǐnutnì ndí cùmí cue quitì-áⁿ, ndihì núú xǐnucóo cue téé cùu sacuéhé-ǎⁿ, te ní xiní-í sá sǔúní cuéhé víhí espíritú-áⁿ xǐndecu xíáⁿ,

¹² te níhi ní cáháⁿ cue espíritú-áⁿ, te càchí-xi:

Yòhó Yaá cáá dàtná cáá ìⁿ mbéé quitì ní dánñcuèhé-güedé te ní xíhí ní cùu te ní ndoto, te yòhó ío càhnu cuu-n, te ndècu ndihì-n nchaandi túhú,

te ío ndècu ndihì-n sá xìnì tnùnì-n,

te ndàcu-n quide-n nchaa sá cuíní-n,
 te nèhe-ndí sá yíñùhu núú-n, te ío váha quide-n,
 te chíñuhu ñaha-ndí xii-n, chi ducaⁿ tàú-ndí
 cada-ndí chi ío càhnu cuu-n.
 Duha càchí nchaa cue espíritú-áⁿ xãhaⁿ-xi xì-gá
 chíñùhu ñaha-xi.

¹³ Te ní tecú dóho-í ní cáháⁿ nchaandi túhú sá
 ñí cadúha Yá Ndiõxí ndécú àndiù, ndihi nchaa sá
 ndécú ñùyíú, ndihi nchaa sá ndécú xìtí ñuhu, ndihi
 nchaa sá ñúhú xìtí ndute làmár, te xíchí-xi:

Yòhó Yaá núcõo núú xilé váha, ndihi yòhó Yaá cáá
 dàtná cáá ñⁿ mbéé qui^{ti} ní dánicuèhé-güedé
 táxí tnùní-ndó, te nèhe-ndí sá yíñùhu
 núú-ndó,

te ducaⁿ ïo ndàcáⁿ táhú-ndí núú-ndó, chi ío váha
 quide-ndo te ío cùnuu-ndo,

te diu-ni duha cáháⁿ váha-ndí cuendá-ndó ñí caa ñí
 qui^{hi}.

Duha càchí nchaa sá ñí cadúha Yá Ndiõxí.

¹⁴ Te ndi cùmí cue qui^{ti} xĩnutnĩ-áⁿ càchí-güedi:

—Ducaⁿ na cùnduu! —cachí-güedi.

Te ndi òcó cùmí cue tée cùu sacuéhé xĩndecu-áⁿ ñí
 ngüñí xìtí-güedé chíñùhu-güedé Yaá ndécú nchaa
 nduu nchaa quiú.

6

Cuendá úsá tutú lĩhli ñùhu seyú

¹ Te sátá dúcáⁿ te ní xiní-í sá Yàá cáá dàtná cáá
 ñⁿ mbéé qui^{ti} ní dánicuèhé-güedé-áⁿ ñí xócání-gã ñⁿ
 tutú lĩhli ñùhu seyú ndèe sátá tütú sá ñí nadúcúⁿ
 nuu-áⁿ, te ní tecú dóho-í ní cáháⁿ ñⁿ qui^{ti} cùmí

xĩnutnĩ-áⁿ, te níhi ní cáháⁿ-dĩ dàtná càháⁿ ñúhu, te cächí-dĩ:

—¡Taquìxi cundehe-n! —cachí-dĩ.

² Te òré-ni-áⁿ ñĩ xiní-í ìⁿ cuàyú cuìxíⁿ yódó ñàha ìⁿ sá yódó ñàha xii-dĩ, te sá yódó ñàha xii-dĩ-áⁿ néhé-xí ìⁿ arcú sá cúú tnùxí-xi, te ní nduu táhú-xi ìⁿ coróná, te ní ndacu-xi ní cunuu-xi te ducaⁿ-ni ta cùnuu-xi cuáháⁿ.

³ Te òré ní xócání-gă tutú lĩhli cùu uú ñúhú sèyú ndèé sátá tütú sá ñĩ nadúcúⁿ nuu-áⁿ, te ní tecú dóho-í ní cáháⁿ tucu ingá quiti cùu uú xĩnutnĩ-áⁿ, te cächí-dĩ:

—¡Taquìxi cundehe-n! —cachí-dĩ.

⁴ Te òré-ni-áⁿ ñĩ xiní tucu-í ìⁿ cuàyú tícuèhé ní quee-dĩ cuáháⁿ-dĩ, te yòdo ñàha ìⁿ sá yódó ñàha xii-dĩ, te sá yódó ñàha xii-dĩ-áⁿ ñĩ níhí-xi tnúhu ndee ìní sá dátìcánuu-xi ñáyiu vá cùndècu ndĩhi tnaha váha-gá-yu, te ngüíta ñáyiu cahni tnàhá-yu, te ní nduu táhú-xi ìⁿ yuchí cáhnú vèhi.

⁵ Te òré ní xócání tucu Yaá-áⁿ ingá tutú lĩhli cùu uní ñúhú sèyú ndèé sátá tütú sá ñĩ nadúcúⁿ nuu-áⁿ, te ní tecú dóho-í ní cáháⁿ quiti cùu uní xĩnutnĩ xíáⁿ, te cächí-dĩ:

—¡Taquìxi cundehe-n! —cachí-dĩ.

Te òré-ni-áⁿ ñĩ xiní tucu-í ìⁿ cuàyú tnúú te yòdo ñàha tucu ìⁿ sá yódó ñàha xii-dĩ, te sá yódó ñàha-áⁿ núndàha-xi úú yaxiⁿ libré.

⁶ Te ní tecú dóho-í ní cáháⁿ ìⁿ sá ñĩ cáháⁿ tnuú cue quiti xĩnutnĩ-áⁿ, te cächí-xi:

—Ìⁿ cuàrtú-nă triú níhí-ndó să ìⁿ dĩhúⁿ denàriú, te uní cuàrtú-nă cebàdá níhí-ndó să ìⁿ tucu dĩhúⁿ denàriú, dico acití ndĩhi ndudí ndéhé yoho yàha stilé chi vá ndĩhí ñìhnu —duha cächí sá càháⁿ-áⁿ.

7 Te òré ní xócání tùcu Yaá-áⁿ tutú lǐhli cùu cumí ñúhú sèyú ndèé sátá tütú sá ñí nadúcúⁿ nuu-áⁿ, te ní tecú tucu dóho-í ní cáháⁿ tucu ìngá quiti cùu cumí xǐnutní-áⁿ, te cǎchí-dì:

—¡Taquìxi cundehe-n! —cachí-dì.

8 Te òré-ni-áⁿ ñí xíní tucu-í ìⁿ cuàyú yàhá, te yòdo ñaha tucu ìⁿ sá yódó ñaha xii-dì, te sá yódó ñaha xii-dì-áⁿ nání-xí Sǎ xìhí, te xǐáⁿ sáhní-xí ñǎyiu, te sátá xǐáⁿ nchicúⁿ sá nèhé núú ndécú ñǎyiu ní xíhí. Te cúmí xichi cùu ñuyíú, te sá sáhní ñaha xii ñáyiu-áⁿ ñí níhí-xi tnúhu ndee ìní danàa-xi ñáyiu ìⁿ xichi ñuyíú, te davá-yu cahni ñaha-xi ndìhi yuchí, te cada-xi sá cóo tnamá te cuú-yu, te cada tucu-xi sá cóo cuèhé cahni-xi ñáyiu, te diu-ni tucu-xi cada sá ncháá quiti dééⁿ cahni-dì ñáyiu.

9 Te òré ní xócání tùcu Yaá-áⁿ tutú lǐhli cùu uhúⁿ ñúhú sèyú ndèé sátá tütú sá ñí nadúcúⁿ nuu-áⁿ, te òré-áⁿ ñí xíní-í nútñí ìⁿ núú sácòdó sǎ ndúú tǎhú Yǎ Ndiǒxí, te ndàa caha xǐáⁿ ní xíní-í xǐndecu nchaa àlmá ñáyiu ní sahani-güedé núú ñuyíú sǎ cuendá tnúhu Yǎ Ndiǒxí, ndìhi sá cuendá sá ñí cáháⁿ váha-yu cuendá-gá.

10 Te nchaa àlmá-áⁿ ñíhi xǐcáháⁿ-xi, te xǎhaⁿ-xi xìi Yǎ Ndiǒxí:

—Yòhó Dútú Ndiǒxí cúú-n Yàá ñǎ túú tnahí cuéchi-xi, te ñǎ túú tnahí quée cáva-n quide-n ìⁿ sá cǎháⁿ-n. ¿Te ná ndéé ama dandòho-n ñáyiu ndècu ñuyíú nachinaa-n cuendá sá ñí quide ñahá-yu xii-ndí-i? —cǎchí cue àlmá-áⁿ xǎhaⁿ-xi xìi-gá.

11 Te sátá dúcáⁿ te nchaa cue àlmá ñáyiu-áⁿ ñí níhí-xi dóo cuixíⁿ ní quée cuíhnu-xi, te ní xítñúhu ñaha xii-xi sá ná ndètátú-xi te cundetü tnaa-xi ndéé ná xǐnu cava cuú ñáyiu nàcuáa ndèé tñuní dàtná

ní xíhí cue ñáyiú dii àlmá-xi cùu-xi. Te ñáyiú sa ní xíhí-áⁿ ìⁿ-ni cùú-yu ndihí ñáyiú vitna cuú-áⁿ chi mee-ni chiúⁿ Xítóhó Jesucristú quidě-yu, te ñu-ni ichi-gá ndécũ-yu.

12 Te òré ní xócání tucu Yaá-áⁿ tutú líhli cùu iñú ñúhú sèyú ndeé sátá tutú sá ñí nadúcúⁿ nuu-áⁿ, te ní xiní-í súúní ñihí ní quidí-xi ñuyíú, te ní cutnuu ñihí núú nchĩcanchii dàtná ìⁿ dóó tnuú, te ní cuu ticuèhé níñí ñihí núú yóó.

13 Te ní xiní-í ní ngoyo chódíní ñuyíú-a dàtná ngóyó ngũxí yíhí òré quéné tächí ñihí.

14 Te ní xiní-í ní nadúcúⁿnuu andiu dàtná nádúcúⁿnuu ìⁿ tutú te ní ndónúhú-xi, te nchaa tĩndúú ñí xica ndehe-xi núú ndécú-xi, te ducaⁿ ñí xica ndehe tucu nchaa tĩndúú yìchí ndécú xitĩ ndute làmár.

15 Te nchaa cue téé yìndaha ñáyiú ní nguívãha-güedé, ndihí nchaa dava-gá cue téé ío tàxi tñuní, ndihí nchaa ñáyiú cuica, ndihí nchaa cue téé tàxi tñuní sandàdú, ndihí cue sandàdú cue téé ío váha sàá díquí-xi nàcuáa cada-güedé nàá-güedé, ndihí nchaa ñáyiú ñá túú tñahí dàñá quee núú chíúⁿ patróóⁿ-xi, ndihí nchaa ñáyiú dàñá queé núú chiúⁿ patróóⁿ-xi. Te dava ñáyiú-áⁿ ñí nguívãha-yu xitĩ yaú, te davá-yu ní nguívãha-yu nchaa tnuú cava.

16 Te xãhãⁿ-yu nchaa tĩndúú ndihí nchaa cava:

—Chí tãcùuⁿ chiyáha ñaha-ndo xitĩ-ndí cuendá sá vã quíní ñáhá Yáá ío tàxi tñuní núcõo núú xilé váha, ndihí cuendá sá vã dándõho ñaha Yáá cáá dàtná cáá ìⁿ mbéé quitĩ ní dánĩcuèhé-güedé, chí Yáá-áⁿ ïo cùdééⁿ-gã núú-ndĩ —duha càchí nchaa ñáyiú-áⁿ

xăhăⁿ-yu xii nchaa tîndúú-ăⁿ ndîhi nchaa cava-áⁿ.

17 Te vitna ní sáá nduu ío cùu cahnu nduu tnúndòho tnúhu ndáhú, te vá yôo ìⁿ cundee ìní-xi yáha nchaa tnúndòho-a.

7

Ñáyu isràél ñáyu naníhí tàhú

1 Te sátá xǎⁿ te ní xiní-í cúmí tnàhá espíritú xínú cuèchi núú Yă Ndiôxí xǐnutnîi-xi ndi cùmí xio ñuyúú, te cue espíritú-áⁿ nǐ ngani-xi táchí cuendá sá vǎ cuícó-gǎ-xi ni làmár, te ni dǐquí yutnu, te ni ìⁿ xichi ñuyúú vǎ cuícó-gǎ-xi.

2 Te cue espíritú-áⁿ ndécú ndîhi-xi tnúhu ndee ìní danàa-xi sá ío làmár ndîhi sá ío ñuhu yìchí, te ní xiní tucu-í ìngá espíritú xínú cuèchi núú Yă Ndiôxí ní quee nchita-xi ndàa nacuáa quène nchícanhii, te nùndaha-xi seyú Yă Ndiôxí Yaá ndécú nchàa nduu nchaa quíú, te níhi ní cáháⁿ-xi xăhaⁿ-xi xìi ndi cumí cue espíritú-áⁿ:

3 —Vá dánàa-ndo sá ío làmár, te ni vǎ dánàa-ndo yutnu, te ni ìⁿ sá ío ñuyúú vǎ dánàa-ndo, chi cundetú-ndo ndèé ná tàxi ndecu-ndí ìⁿ sèñá tneé nchaa ñáyu xínu cuechi núú Tátá-ó Dútú Ndiôxí — duha càchí espíritú-áⁿ xăhaⁿ-xi xìi ndi cumí espíritú xǐnutnîi ndi cùmí xichi ñuyúú.

4 Te ní tecú dóho-í ní cáháⁿ ìⁿ sá nǐ cáháⁿ, te ní cachí-xi sá nǔú ndí ùxúú xichi cue ñáyu isràél te ní xínu ìⁿ cièndú údico cúmí mǐl-yu ní ngúndecu sèñá tneé-yu.

5 Te núú ìⁿ cièndú údico cúmí mǐl ñáyu-áⁿ, te ní xínu úxúú mǐl cue ñaní tnáhá ndíi Jùdá ní ngúndecu

sèñá tneé-yu, te úxúú mǐl cue ñaní tnáhá ndǐi Rùbén, te úxúú mǐl cue ñaní tnáhá ndǐi Gǎd,

6 te úxúú mǐl cue ñaní tnáhá ndǐi Àsér, te úxúú mǐl cue ñaní tnáhá ndǐi Nefçalí, te úxúú mǐl cue ñaní tnáhá ndǐi Manàsés,

7 te úxúú mǐl cue ñaní tnáhá ndǐi Mìó, te úxúú mǐl cue ñaní tnáhá ndǐi Lèví, te úxúú mǐl cue ñaní tnáhá ndǐi Isàcár,

8 te úxúú mǐl cue ñaní tnáhá ndǐi Zabùlón, te úxúú mǐl cue ñaní tnáhá ndǐi Chèé, te úxúú mǐl cue ñaní tnáhá ndǐi Benjàmín, nchaandi túhú ñáyiu-áⁿ nǐ ngúndecu sèñá tneé-yu.

Cuéhé víhí ñáyiu ñihnu dóó cuìxíⁿ

9 Te sátá xǐǎⁿ te ní xiní-í cuéhé víhí ñáyiu, ñáyiu ìⁿ ìⁿ nàcióⁿ, ndihí ñáyiu ìⁿ ìⁿ ñúú, ndihí ñáyiu càháⁿ ndi dǐíⁿ ndi dǐíⁿ núú tnǔhu, ndihí ñáyiu ní xíndecu ìⁿ ìⁿ xichi, te nchaa ñáyiu-áⁿ xǐnutní-yu ndàa núú Yàá táxí tnùní núcõo núú xilé váha, ndihí núú Yàá cáá dàtná cáá ìⁿ mbéé quiti ní dánicuèhé-güedé, te vá yõo ìⁿ ndàcu cahu ñaha xii-yu chi cuéhé víhí-yu, te nchaá-yu xǐxíhnu-yu mee-ni dóó cuìxíⁿ, te nùndahá-yu nchaá-yu ìⁿ caa ndàha yutnu ñúú.

10 Te nchaá-yu níhi xǐcáháⁿ-yu, te càchí-yu:

Yaá táxí tnùní núcõo núú xilé váha cùu-gá Ndiõxí-ó, te diu-gá ndihí Yaá cáá dàtná cáá ìⁿ mbéé quiti ní dánicuèhé-güedé ní dácãcu ñihnu ñaha-gǎ xii-o núú ùhú núú ndàhú.

Duha càchí nchaa ñáyiu-áⁿ.

11 Te nchaa espíritú xínú cuèchi núú Yǎ Ndiõxí ní nadúcúⁿndéé-xi xǐnutní-xi ni càndéé núú núcõo Yaá núcõo núú xilé váha, ndihí núú xínucõo cue téé cùu sacuéhé, ndihí cue ndi cùmí quiti xǐnutní-áⁿ, te

nchaa-xi ní ngüíñí xítí-xí te ní ngúnu ndeyi-xi núú
Yàá núcõo núú xilé váha-áⁿ, te nchaa-xi ní ngüíta-xi
chìñuhu ñaha-xi xii-gá,

¹² te cächí-xi:

Na cãháⁿ ndáá-ndí núú yòhó Tãtá-ndí Dútú Ndiõxí
sá ïo cãhnu cuu-n, te ndàcu-n quide-n nchaa
sá vãha cuìní-n, te ío váha quide-n, te ndècu
ndihí-n nchaa sá xìní tnùní-n,

te chìñuhu ñaha-ndí xii-n, te ducaⁿ ndàcãⁿ táhú-ndí
núú-n cuendá nchaa sá quidé-n, te nèhe-ndí
sá yíñùhu núú-n,

te tnúhu cãháⁿ-ndí-a cùu-xi tnúhu ndáá, te ñu-ni
duha cáháⁿ-ndí ndéé núú cuaháⁿ núú vëxi.

Duha cächí nchaa cue espíritú-áⁿ xáhaⁿ-xi xii Yáá
núcõo núú xilé váha-áⁿ.

¹³ Te ñⁿ cue tée cùu sacuéhé xĩndecu-áⁿ ñí xicãⁿ
tnúhú-dé núú-í, te cächí-dé:

—¿Yóndí cùu ñáyiú dácãⁿ xĩxíhnu dóo cuixíⁿ-ãⁿ, te
ndèé véxi-yu núú dácãⁿ xĩndáã-yu-i? —cächí-dé.

¹⁴ Te yúhú ní xáhaⁿ-í:

—Tãtá, ñá túú xìní-í, dico mee-n xìní-n —duha ní
xáhaⁿ-í xii-dé.

Te ñátnùní ní cachí tnúhu-dé xii-í ná cúú
ñáyiú-áⁿ, te cächí-dé:

—Nchaa ñáyiú-a cúú-yu ñáyiú ní quee núú ío
víhí tnúhu ndòho tnúhu ndàhú sá vã cùndèe iní-ó
te véxi-yu íha, te cúú-yu ñáyiú sa ní nduu ndoo
ní nduu nine iní-xi cuendá sá ñí satí ñíñí Yáá
cáá dàtná cáá ñⁿ mbéé quiti ní dánícuèhé-güedé,
cuendá xíãⁿ vitna ní ndihí-yu ní nduu cuixíⁿ dóo
xĩxíhnu-yu.

¹⁵ Te núú xíãⁿ vitna ní nduu táhú-yu ndécú-yu
núú ndécú Yã Ndiõxí Yáá táxí tnùní núcõo núú xilé

váha, te cuèi nduu cuèi niú xínú cuèhí-yu núú-gǎ vitna, te ðiu-gá xító ñàha-gá xií-yu.

¹⁶ Te vitna ní sáá-yu núú-gǎ cundecú-yu te vá ndóhó-gǎ-yu docó, te ni vǎ quìní-gá-yu ndohó-yu yíchí-yu ndute, te ni vǎ quìní-gá-yu ndohó-yu cahni nchíanchii, te ñá túú-gǎ ná cahni ndohó-yu.

¹⁷ Te ducaⁿ chi Yaá cáá dàtná cáá ìⁿ mbéé quiti ní dánicuèhé-güedé ndécú-gǎ núú nútnǎ xilé váha núcóo Yá Ndióxí Yaá táxí tnùní, Yaá-áⁿ coto ñaha-gǎ xií-yu dàtná quidé ìⁿ toli oré xító-dě mbéé-dě, te candeca ñaha-gǎ xií-yu quíhíⁿ núú tǎo ndute, te ndute-áⁿ cúú-xí ndüte candeca iní-yu, te Yá Ndióxí cada-gá sá vǎ quìní-gá-yu tnúhu ndàhyú —duha ní cachí tnúhu tée cùu sacuéhé-ǎⁿ xii-í.

8

Cuèndá tícuú sá ñí cuáha mee-ni ðíhúⁿ cuàáⁿ

¹ Te sátá dúcáⁿ te Yaá cáá dàtná cáá ìⁿ mbéé quiti ní dánicuèhé-güedé ní xócání-gǎ tutú líhli cùu usá ñúhú sèyú ndéé sátá tütú sá ñí nadúcúⁿnuu-áⁿ, te òré-áⁿ ñí cunahi sùúní nàvíí-nǎ ní cuu andiu dàtná cuádava òré.

² Te ní xiní-í úsá tnàhá espíritú xínú cuèchi núú Yá Ndióxí xǐnutnǎ-xi núú núcǎo-gá, te ní níhí-xi ìⁿ caa cütú xǐnehe-xi.

³ Te dàtnùní ní xiní tucu-í ingá espíritú xínú cuèchi núú-gǎ ní quexìo-xi nehe-xi ìⁿ tícuú ní cuáha mee-ni ðíhúⁿ cuàáⁿ te ñúhu vai dúsa sá sàháⁿ tnámí, te ní ngúnutnǎ espíritú-áⁿ núú ndécú sǎ ñí cuáha mee-ni ðíhúⁿ cuàáⁿ núú sácǎdó sǎ ndúú tǎhú Yá Ndióxí, te xiǎⁿ nútnǎ-xi ndàa núú-gǎ, te dúsa sá sàháⁿ tnámí-áⁿ cahmi espíritú-áⁿ núú sácǎdó sǎ

ndúú tǎhú-gǎ-áⁿ cuendá ñúhmá dǔsa-áⁿ cundìhi-xi nchaa tnúhu càháⁿ ñáyiú càháⁿ ndìhi ñaha xì-gá, nchaa ñáyiú cùu cuendá-gá.

⁴ Te nùndaha espíritú-áⁿ tǐcùú ñúhú dǔsa sá sàháⁿ tnámí càyú, te quène ñúhmá nútnǐ-xi núú Yǎ Ndiǒxí, te ñúhmá-ǎⁿ cundìhi-xi nchaa tnúhu càháⁿ ñáyiú càháⁿ ndìhi ñaha xì-gá, nchaa ñáyiú cùu cuendá-gá.

⁵ Te ní queheⁿ espíritú-áⁿ tǐcùú te ní dáchítú-xi ñuhú yódó nǔú sácódó sǎ ndúú tǎhú Yǎ Ndiǒxí, te ní xítenuu-xi ñuyíú, te òré ducaⁿ ñǐ quide-xi te ní cáháⁿ víhí ñǔhu, te ío dusaⁿ ñǐ quide-xi ñuyíú, te ní sáá ndúté, te níhi vìhi ní tnáa.

Ndi ùsá espíritú ní tiú-xi ñⁿ caa cǔtú xǐnehe-xi

⁶ Te ndi ùsá cue espíritú xǐnehe ñⁿ caa cǔtú-ǎⁿ ñǐ ngúndecu túha-xi cuendá tiú-xi.

⁷ Te espíritú díhna nuu ñǐ tiú-xi cǔtú néhé-xí, te ñuyíú-a ní ngoyo ñiñi dàcanuu-xi ndìhi ñuhú ndìhi níñí, te luha-ná te cuu dava ñuyíú ñǐ cáyú, te luha-ná te cuu dava tucu nchaa yutnu ío ñuyíú ñǐ cáyú, te luha-ná te cuu dava tucu nchaa cǔhú ío ñuyíú ñǐ cáyú.

⁸ Te espíritú cúú ùú ní tiú-xi cǔtú néhé-xí, te dàtná cáá ñⁿ tindúú cáá ñⁿ sá ñǐ ngava xití làmár te nchìcúⁿ ñuhú, te luha-ná te cuu dava ndute làmár-áⁿ ñǐ nduu-xi níñí.

⁹ Te luha-ná te cuu dava nchaa quiti xǐxúhuⁿ xití làmár-áⁿ ñǐ xíhí-güedi, te luha-ná te cuu dava nchaa bàrcú ní queé naa-xi xití ndute.

¹⁰ Te espíritú cúú ùní ní tiú-xi cǔtú néhé-xí, te ní ngava ñⁿ chódíní cáhnú ndèé andiú ñuyíú te

nchìcúⁿ ñuhú-di, te ñuhú-áⁿ cáá dàtná cáá ñùhú iti. Te luha-ná te cuu dava nchaa yúte ní ngava chódíní-ǎⁿ, te luha-ná te cuu dava tucu nchaa núú quènihni ndute ní ngava-di.

¹¹ Te chódíní-ǎⁿ nání-dí: Yǔcú Úá. Te ndute xica nchaa yúte-áⁿ ndihí nchaa ndute quènihni-áⁿ ñí cuu úá-xi dàtná yúcú úá, te ío cuéhé ñáyiú ní xihí sá dúcáⁿ ñí cuu úá ndute-áⁿ.

¹² Te espíritú cúú cùmí ní dácàháⁿ-xi cútú néhé-xí, te luha-ná te cuu dava nchíanchii ñá túú ní dàyehé-xi, te ducaⁿ lùha-ná tucu cuu dava yóó ñà túú ní dàyehé-di, te ducaⁿ lùha-ná te cuu dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchíanchii, te ducaⁿ lùha-ná te cuu dava niú ñá túú ní dàyehé yóó ndihí nchaa chódíní.

¹³ Te sátá dúcáⁿ te ní xiní-í xícó ìⁿ espíritú xínú cuèchi núú Yǎ Ndiöxí núú tàchí, te ní tecú dóho-í níhi càháⁿ-xi, te càchí-xi:

—Ío ndàhú ndoho nchaa ñáyiú xǐndecu ñuyíú òré ná dàcaháⁿ úní-gá cue espíritú cúmǎní cútú xǐnehe-xi, chi sa xǐndecu túha-ná-xi sá dácàháⁿ-xi!— duha càchí espíritú-áⁿ.

9

¹ Te espíritú cúú ùhúⁿ ní tíú-xi cútú néhé-xí, te òré-áⁿ ñí xiní-í ní quee ìⁿ espíritú andíu te càa-xi datná cáá ìⁿ chódíní, te ní ngava-xi ñuyíú, te ní níhí-xi ìⁿ ndacaá néhé-xí cuèndá nacaáⁿ-xi yuyèhe yaú cùnú víhí.

² Te ní nacaáⁿ-xi yaú-áⁿ te ní ngúíta-xi ní quene ñúhmá dàtná quéné ñúhmá ìⁿ xítnú cáhnú víhi, te

ní quene táchí nǐ xítenuu-xi ñúhmá-ǎⁿ te ní sadí-xi núú nchǐcanchii, te ní cunee ñuyíú.

³ Te xítí ñúhmá-ǎⁿ nǐ quene tíca làngóstá, te ní xítenuu-di ñuyíú, te dééⁿ-güedi dàtná dééⁿ nchacua.

⁴ Te ní ngúndecu ndìhi-güedi tnúhu ndee ìní cuendá sá dándòho-güedi mee-ni ñáyiu ñá túú ndéé sèñá Yà Ndiöxí tneé-xi, te ñá túú nǎ cada-di nchaa yutnu ndìhi nchaa cúhú.

⁵ Te ñá túú tnúhu ndee ìní ndécú ndìhi-güedi sá cáhni-güedi ñáyiu, chi mee-ni sǎ dándòho ñaha-güedi xií-yu úhúⁿ yóó. Te òré ní ngüíta-güedi dàndòho ñaha-güedi xií-yu te tàhú tnùhú núú dáquëe-güedi iñu-güedi dàtná quidé-xí núú dáquëe nchacua iñu-güedi.

⁶ Te ñáyiu-áⁿ xìcáⁿ táhǔ-yu sá ndìhi cuú-yu cuendá sá ïo ndòhó-yu dàquëe ñaha nchaa quití-áⁿ iñu-di xií-yu te ñá cuìní-xi cuú-yu, te ìⁿ nduu ìⁿ nduu sàni iní-yu cuú-yu te ñá túú cuìní-xi cuú-yu chi ñá túú tnúhu xihí sá cúú-xí-yu.

⁷ Te nchaa tíca làngóstá-áⁿ xǐndáa-güedi dàtná ndǎa nchaa cuáyú cue tée cuáháⁿ nǎa, te díquí-güedi ñùhu ìⁿ sá cáá dàtná cáá còroná ní cuáha mee-ni dǐhúⁿ cuááⁿ, te núú-güedi càa datná cáá núú cuè tée.

⁸ Te idi díquí-güedi càa datná cáá ìdi díquí ñáyiu dǐhí, te núhu-güedi càa datná cáá núhu ndicaha.

⁹ Te yídúcúⁿnuu-güedi ìⁿ sá cáá dàtná cáá càá, te ndíxíⁿ-güedi quide-xi datná quidé-xí núú vëxi cuéhé víhí càrretá sá táñùhu cuáyú cuáháⁿ-güedé ndìhi-güedi núú nǎa-güedé.

¹⁰ Te ndéé iñu núú lùhmá-güedi dàtná ndéé iñu núú lùhmá nchacua, te iñu núú lùhmá-güedi-áⁿ

dáquëe-güedi ñáyiú dándoho ñaha-güedi xií-yu, te ducaⁿ-ní càda-güedi dándoho ñaha-güedi xií-yu ndéé xínu úhúⁿ yóó.

11 Te nchaa tíca làngóstá-áⁿ táxí tnùnì ñáhá espíritú sá táxí tnùnì yaú cùnú víhí, te espíritú-áⁿ nání-xí Àbadón tnúhu hèbreú, te tnúhu griégú nání-xí Àpoliún, te ndi ndùú tnúhu-áⁿ quée-xí: Sá dánàa ñáyiú.

12 Te tnúndòho-a cuu-xi tnúndòho díhna nuu, te vitna cùmání úú-gá.

13 Te espíritú cúú ìñú ní tiú-xi cútú néhé-xí. Te núú Yá Ndiõxí nútñi ìⁿ sá ñi cuáha mee-ni díhúⁿ cuááⁿ núú sácódó sá ndúú tãhú-gã, te ndi cùmí xíquí-xi xíndecu ìⁿ caa ndiqui, te ní tecú dóho-í ní cáháⁿ ìⁿ sá ñi cáháⁿ nihnu ndi cùmí ndiqui-áⁿ.

14 Te sá càháⁿ nihnu ndiqui-áⁿ xãhaⁿ-xi xìi espíritú cúú ìñú sá ñi tiú cútú-áⁿ:

—Cuaháⁿ nandaxi-n ndi cumí espíritú ndútú ndècu yúte càhnu nani Eúfratés —càhí sá càháⁿ-áⁿ xãhaⁿ-xi xìi espíritú-áⁿ.

15 Te sátá dúcáⁿ te ní nandáxí ndi cùmí cue espíritú-áⁿ cuendá cahni-xi cuéhé víhí ñáyiú, te sa yatni dàtná cuádava ñáyiú xíndecu ñuyú cahni-xi, te ducaⁿ chi sa ndècu túha tnàhí cue espíritú-áⁿ ndétú-xí sàá òré, àdi nduu, àdi yóó, àdi cuiá ducaⁿ càda-xi cahni-xi ñáyiú.

16 Te ní xiní-í nchaa cue sandàdú cùndihi-xi xixódó-güedè cuàyú, te ní níhí-í tnúhu sá xínu úú cièndú millón-güedè.

17 Te duha xíndáa cue cuàyú-áⁿ ndihi cue téé yòdo ñaha-áⁿ ñi xiní-í: Te cue téé-áⁿ yídúcúⁿ nuu ìⁿ sá yídúcúⁿ nuu pèchú-güedé, te luha ticuèhé

te luha cuì datná cuì andiu, te luha cuàáⁿ, te nchaa cuàyú-áⁿ cáá dǐquí-güedi dàtná cáá dǐquí ndicaha, te yuhu-güedi quène ñuhú ndihì ñúhmá, ndihì àzufre nchicúⁿ ñuhú.

¹⁸ Te ío cuéhé ñǎyiu ñuyíú nǐ xíhí chi luha-ná te cudavá-yu ní xíhí sá cuèndá ñuhú-áⁿ ndihì ñúhmá-ǎⁿ ndihì àzufre-áⁿ.

¹⁹ Te ndihì núú lúhmá-güedi ndihì yuhu-güedi dàndoho-güedi ñǎyiu, te núú lúhmá-güedi nèhe-xi dǐquí cǒó, te ñiu-ni dàtná cáá cǒó cáá ñihí lúhmá-güedi.

²⁰ Te nchaa dava-gá ñǎyiu ní cácu ñá túú ni xíhí núú nchàa tnúndòho-áⁿ ñà túú ní cuìní-yu dàñá-yu ichi cuéhé ichi duha ndècú-yu, chi quide cahnu-ní-yu nchaa espíritú cúndihì yucu ñávǎha, ndihì nchaa sá càchí-yu cùu ndiǒxí ní cadúha cue tée ñuyíú-a, te dava xíǎⁿ ní cuáha mee-ni dǐhúⁿ cuàáⁿ, te dava ní cuáha mee-ni dǐhúⁿ cuixíⁿ, te dava ní cuáha sá nání bròncé, te dava ní cuáha mee-ni yúú, te dava ní cuáha mee-ni yùtnu, te nchaa xíǎⁿ ñá túú cùtnuní núú-xi, te ni ñà túú tècú dóho-xi, te ni ñǎ ndácú-xí càca-xi.

²¹ Te ni sǎ sáhní tnahá-yu, te ni sǎ sáhní ndùu tnahá-yu, te ni sǎ ndécü-yu ichi dǐí ñí, te ni sà dúhú ndàchiuⁿ tnahá-yu ñá túú ní cuìní-yu dàñá-yu.

10

Íⁿ espíritú xínú cuèchi núú Yǎ Ndiǒxí néhé-xí ìⁿ libré

¹ Te sátá dúcáⁿ te ní xiní tucu-í ìⁿ espíritú cúnùu xinu cuechi núú Yǎ Ndiǒxí ní quee-xi andiu, te yìhì-xi xítí vícò cuǎnguee-xi ñuyíú te ndàa

díquí-xi ndècu ìⁿ cóó yáhnchí, te núú-xi súúní chàhnchí dàtná chàhnchí núú nchĩcanchii, te ndi ndùú díhⁿ-xi càa datná cáá ítá ñuhu.

² Te nùndaha-xi ìⁿ librú líhli ní nandicá, te sáhá cùha-xi ní sani-xi núú ndute làmár, te sáhá dàtni-xi ní sani-xi núú ñuhu yìchí.

³ Te espíritú-áⁿ ñìhi vìhi ní cáháⁿ-xi, te ní quide-xi dàtná quidé ìⁿ ndicaha oré cánásàa-di, te oré ducaⁿ ñìhi vìhi ní cáháⁿ-xi te úsá xito ní cáháⁿ ñuhu.

⁴ Te sátá ñí yáha ní cáháⁿ ñuhu-áⁿ úsá xito, te chido tnùn-í ìⁿ núú tùtú nàcuáa ní cáháⁿ-xi ní cùu, te mei òré-áⁿ ñí tecú dóho-í ní cáháⁿ ìⁿ sá ñí cáháⁿ andiú te càchí-xi:

—Vá chídó tnùn-í-n nàcuáa ní cáháⁿ ñuhu-áⁿ, iní mée-ní-n ná cùhuⁿ —duha càchí sá ñí cáháⁿ-áⁿ.

⁵ Te espíritú sá nútñì ìⁿ xio sáhá-xi núú ndute làmár-áⁿ ndihì ingá xio sáhá-xi núú ñuhu yìchí-áⁿ ñí xiní-í ní ndonehe-xi ndaha cùha-xi,

⁶ te càchí-xi:

—Yá Ndiõxí Yaá ndécú nchàa nduu nchaa quíú Yaá ní cadúha ñuyíú, ndihì andiú, ndihì làmár, ndihì nchaa sá ió, Yaá-áⁿ náhá ndää-gá sá yùhú càháⁿ ndáá-í, te vá cùyàa vìhi

⁷ te cada-xi nchaa nàcuáa ndùu tnúhu ndùu yuhu ní cáháⁿ-gá, tnúhu ní xáhaⁿ-gá xii cue téé ní xinu cuechi núú-gã, cue téé ní xóo cáháⁿ tnúhu-gá ndéé sanaha, chi òré ná tiú espíritú cúú úsá cútú néhé-xí, te òré-áⁿ cada-xi nchaa nàcuáa ndùu tnúhu ndùu yuhu sá ñí xáhaⁿ-gá xii nchaa cue téé-áⁿ —duha càchí espíritú-áⁿ.

⁸ Te sátá dúcáⁿ te ní tecú tucu dóho-í ní cáháⁿ tucu sá ñí cáháⁿ andiú-áⁿ, te càchí-xi xii-í:

—Cuaháⁿ te queheⁿ-n librú líhli sá ñí nandicá nùndàha espíritú-áⁿ, espíritú sá nútñì ìⁿ xio sáhá-xi

núu ndute làmár, te ìⁿ xio sáhá-xi núu ñuhu yìchí — duha càchí sá ñí cáháⁿ-áⁿ.

⁹ Te yúhú ní sáháⁿ-í núu ndécú espíritú-áⁿ xìcáⁿ-í lìbrú lìhli nèhe-xi-áⁿ, te ní cachí-xi:

—Iha te caxi-n, te cuvídí yuhu-n dàtná cúvídí òré xíhí-n ndùdí ñúñú, dico xití-n chi cada úá-xi — càchí-xi.

¹⁰ Te ní queheⁿ-í lìbrú lìhli nùndaha espíritú-áⁿ ñí xexi-í, te yuhu-í ní quide vídí-xi dàtná vídí ndudí ñúñú, dico sátá ñí ngava-xi xití-í te ní quide úá-xi.

¹¹ Te ní cachí tucu espíritú-áⁿ xii-í:

—Dacuítí cǎháⁿ tucu-n nàcuáa càchí Yǎ Ndiǒxí cuèndá ñáyiu titní víhí nàcióⁿ, ndihí cuèndá ñáyiu titní víhí ñúú, ndihí cuèndá ñáyiu cǎháⁿ ndí ðííⁿ ndí ðííⁿ núú tnùhu, ndihí cuèndá cue téé yìndaha ñáyiu.

11

Cuèndá úú cue téé cǎháⁿ nàcuáa càchí Yǎ Ndiǒxí

¹ Te ní níhí-í ìⁿ tnuyoo nàcuáa chicùhá-í ìⁿ sá chicùhá-í, te ní cáháⁿ ìⁿ sá ñí cáháⁿ, te càchí-xi:

—Ndacuíñí te chicùhá-n vèhe Yá Ndiǒxí, te chicùhá tucu-n núú sácódó sǎ ndúú tǎhú-gǎ, te cahu-n nǎ daha tnàhá ñáyiu chìñuhu ñaha xii-gǎ xǐndecu.

² Dico vá chicùhá-n ndàa quehé vehe-gǎ, chi xíaⁿ ñí nduu cuèndá cue ñáyiu ñá túú cùu ñáyiu isràél, te ñáyiu-áⁿ nduu nuu-nǎ-yu núú ñí cuu ñúú-gǎ, te cadá-yu dàtná càchí iní méè-yu, te údico úú yóó ducaⁿ cadá-yu.

³ Te yúhú tendaha-í úú tnàhá cue téé cǎháⁿ yuhu-í nàcuáa càchí Yǎ Ndiǒxí, te úxúú cièndú únídico nduu ducaⁿ cǎháⁿ-güedé yuhu-í cada-güedé

nù-í, te cuihnu-güedé dóo tnúú sã sácuihnu cue ñáyiu ndìhú iní-xi —duha càchí sá cãháⁿ-áⁿ.

⁴ Te ndi ndùú cue tée-áⁿ cúu-güedé dàtná úú yutnu òlívú sá xĩnutnĩ nùú Yã Ndiöxí, ndihì dàtná úú sá ndèè dité-xi, sá yíndòdo ìⁿ caa candíl nùú dité-xi ndècu tucu nùú-gã, te diu-gá cúu-gã Yaá yíndàha ñuyíú.

⁵ Te ñáyiu na càni iní-xi ná cada ñaha xì-güedé te yuhu-güedé quene ñuhú cahmi ñaha-xi xì-yu, te ducaⁿ càda-güedé cahni-güedé nchaa ñáyiu na cùu úhú iní ñáhá xì-güedé.

⁶ Te ndi ndùú-güedé ndécú ndìhi-güedé tnúhu ndee ìní cada-güedé sá vã cúuⁿ dàú, te ducaⁿ càda-güedé nini cãháⁿ-güedé nàcuáa càchí Yã Ndiöxí, te ndacu-güedé nadatìu-güedé ndute nduu-xi níñí, te ndacu-güedé dandòho-güedé nchaa ñáyiu tĩtní nùú tnúhu ndòho, te ducaⁿ càda-güedé ná daha xito càchí iní mée-güedé.

⁷ Te nà yáha sá cãháⁿ-güedé nàcuáa ní cachí Yã Ndiöxí, te dàvá-áⁿ quene ìⁿ quitì dééⁿ yàú cùnú víhí sã ìo nèhé cáá, te quitì-áⁿ ngũita-di nàá-di ndihì ndi ndùú cue tée-áⁿ te cahni ñaha-di xì-güedé.

⁸ Te yiqui cùñú cue tée-áⁿ cautùu-xi ìⁿ tnuú ñuú cáhnú nùu ní sahani-güedé Xítóhó Jesucristú nùú cùrúxí, te diu Yaá-áⁿ cúu Xítóhó-ó ndìhi-güedé, te càchí ñáyiu sá ñuú-áⁿ cúu-xí dàtná ñuú Sòdomá ndihì nàcióⁿ Ègiptú.

⁹ Te úní nduu dava cautùu yiqui cùñú-güedé xíaⁿ, te ñáyiu nchaa nàcióⁿ, ndihì ñáyiu nchaa ñuú, ndihì ñáyiu cãháⁿ ndí díⁿ ndì díⁿ nùú tnúhu, ndihì ñáyiu xĩndecu nchaa xichi quiní-yu yiqui cùñú-güedé, te

vá dáñă-yu nguíndǔxi.

¹⁰ Te nchaa ñáyiú-án nduu vétú iní-yu sá dúcán cùú cue téé cáháⁿ nàcuáa càchí Yă Ndiöxí-án, te ío cudíí ìní-yu, te nándi sá cuăha táhú tnáhă-yu sá cúdǐí ìní-yu sá dúcán ñi xíhí-güedé, te ducaⁿ chi ðiu-güedé ní quide ío ní ndohó-yu.

¹¹ Te sátá ná yăhá úní nduu dava sá dúcán cùú-güedé te Yá Ndiöxí dandòto ñaha-gá xii-güedé, te ndacóo-güedé, te nchaa ñáyiú na quíní sá ndótó-güedé te yùhú víhǐ-yu.

¹² Te ndi ndúú cue téé-án tecú dóho-güedé cáháⁿ ñⁿ sá càháⁿ ndéé andiu, te cúñaha-xi xii-güedé:

—Chí táquène iha —duha cúñaha sǎ càháⁿ-án xii-güedé.

Te cue téé-án quǐhu-güedé ñⁿ xítí vícò caa-güedé andiu, te nchaa ñáyiú cùu úhú iní ñáhá xii-güedé quíní ñáhă-yu xii-güedé caa-güedé andiu.

¹³ Te òré-án ñíhi vìhi tnáa ñuyíú, te úxí xichi cùu-xi ñuú núú cùndècu-güedé-án te ñⁿ xichi ñuú-án naa, te cuú úsá mǐl ñáyiú, te nchaa dava-gá ñáyiú cácu vá cùú yùhú víhǐ-yu, te cachí-yu sá ío càhnu cuu Yá Ndiöxí Yaá ndécú àndiu.

¹⁴ Te tnúndòho-a cuu-xi tnúndòho cuu úú yáha, te vitna sa ndètu víí-nă tucu sáá tnúndòho cuu uní.

Espíritú cùú ùsá tíú-xi cútú néhé-xí

¹⁵ Te espíritú cùú ùsá ní tíú-xi cútú néhé-xí, te òré-án ñi tecú níhi ní cáháⁿ títní sá ñi cáháⁿ andiu, te càchí-xi:

Nchaa sá cùú cuèndá nchaa ñáyiú ñuyíú táxí
tnùní-yu ni cùu ní nduu cuèndá Tătá-ó Dǔtú
Ndiöxí táxí tnùní-gá,

Te tnàhá Yaá ní tendaha-gă ní sáháⁿ ñuyúú táxí
tnùní-gá nchaa xíăⁿ,

te ðiu-gá taxi tnùní-gá ni caa ni quíhíⁿ.

Duha ní cáháⁿ nchaa sá nǐ cáháⁿ-áⁿ.

¹⁶ Te ndi òcò cùmí cue téé sacuéhé x̄nucóo núú
xilé váha ní ngüíñí xítí-güedě núú Yă Ndiöxí, te ní
nuu núú-güedě ndàa núú ñúhú te ní ngüíta-güedé
chíñùhu ñaha-güedé xii-gá,

¹⁷ te càchí-güedé:

Ío ndàcáⁿ táhú-ndǐ núú yòhó Dútú Ndiöxí,

Yaá ndácú quide nchaandi túhú sá vâha,

te ðiu-ni-n ndècu-n ndéé cútnàhá ní ngáva ñuyúú,
te ðiu-ni-n ndècu-n vitna, te ðiu-ni-n
cùndecu-n ndéé núú cuàháⁿ núú vëxi,

te ío càhnu cuu-n te ní ngüíta-n ïo-gá táxí tnùní-n.

¹⁸ Te nchaa ñáyiu x̄ndecu ñuyúú x̄icuděⁿ-yu núú-n,
te vitna ní sáá nduu dândohó-n-yu chi ñá túú cùu
váha iní-n nũ-yu,

te cada ndáá-n cuèchi nchaa ñáyiu sa ní xíhí,

te ní sáá tucu nduu cuãñaha-n sã ndúú tãhú nchaa
ñáyiu ní xinu cuechi nũú-n nǐ cáháⁿ-yu
tnúhu-n, ndihí nchaa dava-gá ñáyiu cùu
cuendá-n, chi ñáyiu-áⁿ néhë-yu sá yíñùhu
núú-n,

te cuèi ñáyiu cùnuu ndihí ñáyiu ñá túú cùnuu
cuãñaha-n sã ndúú tãhũ-yu,

te ní sáá tucu nduu dànaa-n nchaa ñáyiu sàhni
tnaha ñáyiu-xi.

Duha càchí ndi òcò cùmí cue téé sacuéhé-ăⁿ
xãhaⁿ-güedě xii Yá Ndiöxí.

¹⁹ Te ní xiní-í ní nacaáⁿ yuyèhe vehe Yá Ndiöxí
andiu, te xítí vehe-gá-áⁿ nǐ xiní-í ndécú càjà ñúhú
sã yódó tnùní nàcuáa ní cundáá cada-gá sá cúú-xí

ñǎyiu, te òré-án ñǎ xiní-í ní sáá ndúté, te ní cáháⁿ ñúhu te ío dusaⁿ ñǎ quide-xi, te níhi vìhi ní tnáa, te súúní càhnu dáú ñǎíⁿ ñǎíⁿ ñǎíⁿ cuuⁿ.

12

Cuèndá ñⁿ ñadìhí ndìhi cuèndá ñⁿ quiti dééⁿ nání dràgón

¹ Te ío vìhi ní quide-xi ñⁿ sá ñǎ quide-xi andi^u, te ní xiní-í ñⁿ ñadìhí te dóó níhnú-án quide-xi datná quidé-xí nǔú nchĩcanchii, te ndàa núú sàhá-aⁿ quide-xi datná quidé-xí nǔú yóó, te ñúhu ñⁿ coroná díquí-aⁿ te ndèè úxúú chódíní.

² Te ñúhu déhe-aⁿ te càna saa-aⁿ sá quidé ùhú ñáhá-xí xii-aⁿ chi sa ndètu vií-nǎ cacu déhe-aⁿ.

³ Te dǎtnùní ní quide tucu-xi sá ñǎ quide-xi andi^u, te ní xiní-í ñⁿ quiti càhnu quiti ticuehé, quiti dééⁿ nání dràgón, te ndèè úsá díquí-di ndìhi úxí ndiqui-di, te ñⁿ caa coróná ñúhú ñⁿ caa díquí-di-án.

⁴ Te quiti-án luha-ná te cuu dava nchaa chódíní dǎngòyo-di ñuyíú ndìhi lúhmá-di, te quiti-án nì ngúnu tní-di núú ñaha ndètu vií-nǎ cacu déhe-xi-án cuèndá caxi-di déhe-aⁿ òré cacu ni cùu.

⁵ Te ñaha-án ñǎ cacu déhe-aⁿ te téé cùu-dé, te té lǎhli-án ío cunuu-dě taxi tnùní-dé nchaa ñáyiu ñuyíú, te mee Yǎ Ndiǒxí ní nacuaca ñaha-gǎ xii té lǎhli-án cuèndá cundecu ndìhi ñaha-dě xii-gǎ núú ndécú-gǎ táxí tnùní-gǎ.

⁶ Te ñadìhí-án ñǎ xinu-aⁿ cuáhá-aⁿ xití yucu núú ñǎ quide túha Yá Ndiǒxí cundecu-aⁿ cuèndá xíaⁿ ñhí-aⁿ caxi-aⁿ, te ducaⁿ ñhí-aⁿ sá cáxí-án ùxúú cìèndú únídico nduu chi ducaⁿ ndùu cundecu-aⁿ xíaⁿ.

⁷ Te sátá dúcáⁿ te andiú nǐ xiní-í espíritú cúnúu xinu cuechi núú Yă Ndiöxí nání Miguél, ndihi nchaa dava-gá espíritú cúndìhi-xi, te nchaa espíritú-áⁿ nàá-xi ndihi quitì dééⁿ nání dràgón ndihi nchaa espíritú cúndìhi-di.

⁸ Te quitì-áⁿ ñà túú ní ndàcu-di ndihi nchaa espíritú cúndìhi-di, te ñá túú ní ñhí-gă-di núú cúndècu-di andiú ndihi nchaa espíritú cúndìhi-di-áⁿ.

⁹ Te cue espíritú xínú cuèchi núú Yă Ndiöxí-áⁿ nǐ dǎngává-xí quitì dééⁿ nání dràgón-áⁿ ndihi nchaa espíritú cúndìhi-di ñuyíú, te quitì-áⁿ cúú-dí mèi sácuíhná àdi sá càchí-ó cùu yucu ñávăha, te diu xǎⁿ ní dándàhú-xi ñáyiu ñihí ñuyíú, te diu-ni xǎⁿ ní nduu-xi cóó nǐ dándàhú-xi ñáyiu ndéé sanaha.

¹⁰ Te ní tecú dóho-í níhi ní cáháⁿ tucu ìⁿ sá nǐ cáháⁿ andiú, te càchí-xi:

—Vitna te Yá Ndiöxí ní quide-gá ní ngúndecu ñáyiu ndihi-gá, te ío càhnu cuu-gá, te ío tàxi tnuní-gá, te tnàhá Crìstú Yaá ní tendaha Yă Ndiöxí ní quixi ñuyíú-a ío tàxi tnuní-gá, te ducaⁿ chi sa ní xócuíhí sácuíhná sǎ sǔúní núnúu sacáⁿ cuéchi núú Tátá-ó Dütú Ndiöxí cuèndá nchaa ñáyiu ndècu ndihi-o ichi-gá, te nduu niú ducaⁿ sàcáⁿ cuéchi-xi núú-gă cuèndá-yu ni cùu.

¹¹ Dico ní ndacú-yu ní cunúú-yu núú sácuíhná sǎ dúcáⁿ sàcáⁿ cuéchi cuèndá-yu-áⁿ ní cùu, te ducaⁿ nǐ cunúú-yu sá cuèndá Yaá cáá dàtná cáá ìⁿ mbéé quitì ní dǎnícuehé-güedé, chi Yaá-áⁿ nǐ sati níñí-gă te ní xíhí-gá sá cuèndá-yu, te ducaⁿ nǐ cunuu tucú-yu sá cuèndá sá sàndáá iní ñáhă-yu xii Yaá-áⁿ, te ñá túú ní yùhú-yu cuú-yu sá cuèndá-gá.

12 Te vitna ío chí cúdǎí ìní nchaa nchòhó espíritú xínú cuèchi núú Yă Ndiǒxí, ndìhi nchaa nchòhó ñáyiu ndècu andiù, dico jndàhú ní cuu nchaa ñáyiu xǐndecu nihí ñuyíú! Chí súúní cùdééⁿ sàcuíhná nǐ ngava-xi te nándi cada ñaha-xi xíi-yu, te ducaⁿ chí cùtnuní iní-xi sá sàcú duha-ná nduu cudíi-xi cundecu-xi —duha càchí sá nǐ cáháⁿ andiù.

13 Te sátá nǐ quee quiti dééⁿ nání dragón-áⁿ andiù nǐ ngava-di ñuyíú quiti cùu mei sàcuíhná-ǎⁿ, te quiti-áⁿ nǐ chinchícúⁿ-di ñadìhí ñaha ní cacu déhe téé-xi-áⁿ.

14 Te ñadìhí-áⁿ nǐ nduu táhú-aⁿ ní quene úú ndíxí-aⁿ, te càa datná cáá ndíxíⁿ ìⁿ yacòlo cahnu vihi cuendá ndava-aⁿ núhú-aⁿ yucu núú nǐ cachí Yă Ndiǒxí cundecu-aⁿ, te yàcáⁿ cundecu-aⁿ úní cuía dava cuendá sá vǎ nihí ñáhá quiti dééⁿ quiti nàni dragón-áⁿ te xíaⁿ nǐhí-aⁿ sá cáxí-áⁿ, te quiti-áⁿ cúú tùcu-di datná ìⁿ cóo dǎéⁿ.

15 Te quiti-áⁿ nǐ quene cuéhé ndute yuhu-di, te ndute ní quene yuhu-di-áⁿ nǐ cuu-xi ìⁿ yúte, te ducaⁿ nǐ quide-di cuendá ndute-áⁿ cuido-xi ñadìhí-áⁿ ní cùu.

16 Te ñuhu yìchí ní chindee-xi ñadìhí-áⁿ, chí ní ndátá te ní queé naa-ni ndute ní quene yuhu quiti-áⁿ.

17 Te sá dúcáⁿ nǐ quide-xi xǐǎⁿ ní cudééⁿ víhí quiti-áⁿ núú ñadìhí-áⁿ, te ní xica-di cuáháⁿ-di núú xǐndecu nchaa dava-gá cue déhe ñadìhí-áⁿ cuendá nàá ndìhi ñaha-di, te ñáyiu-áⁿ cúü-yu ñáyiu tñì nchaa tnúhu càháⁿ Yă Ndiǒxí, te nchìcúⁿ nihnú-yu nchaa tnúhu sá càháⁿ váha cuendá Xítóhó Jesu-crìstú.

13

Cuèndá úú quitì

¹ Te yúhú ní ngúnu tní-í yuhu làmár, te ní xiní-í ní quene ìⁿ quitì te ndèé úsá díquí-di te úxí ndiqui-di, te núú ìⁿ ìⁿ ndiqui-di-áⁿ ndécú ìⁿ caa coroná. Te ìⁿ ìⁿ díquí-di-áⁿ ndèé tnúhu sá càháⁿ úhú-xi cuèndá Yá Ndiǒxí.

² Te quitì-áⁿ cáá-dí dàtná cáá cuñí, te sáhá-di càa datná cáá sáhá ǒso, te yuhu-di càa datná cáá yùhu ndicaha. Te quitì dééⁿ nání dragón ní sáñaha-di tnúhu ndee ìní xii quitì-áⁿ cuèndá taxi tnùní víhí-dí, te dragón-áⁿ ñ sáñaha-di nùú ndécú-dí tàxi tnuní-di xii quitì ní quene xití làmár-áⁿ, te ducaⁿ ñ quide-di cuèndá sá ñhí ndéé quitì-áⁿ cunuu-di.

³ Te ìⁿ díquí quitì ní quene xití làmár-áⁿ càhú víhí càa ní nícuèhé, te sa ndètu vií-ñà cuú-di sànuu dico ní ndúha-di, te ñhí ñyúyú ñ níhí ñyiu tnúhu sá dúcáⁿ ñ cuu, te ío ní cuñúhu-yu te ní tuhá-yu quitì-áⁿ.

⁴ Te nchaa ñáyi-áⁿ ñ cachí-yu sá ño càhnu cuu quitì dééⁿ quitì nàni dragón-áⁿ cuèndá sá ñ sáñaha-di tnúhu ndee ìní sá táxí tnùní quitì ní quene xití làmár-áⁿ, te ní ngúíta-yu ní chiñuhú-yu quitì ní quene xití làmár-áⁿ, te càchí-yu:

—Vá yǒo ìⁿ nùtnahá ñáhá xii quitì-a, te ni vǎ yǒo ìⁿ ndacu nàá ndihí ñaha xii-di —cachí-yu.

⁵ Te ní níhí-di tnúhu ndee ìní sá càháⁿ úhú-di Yá Ndiǒxí, te cada càhnu-di mee-di, te údico úú yóo ducaⁿ ñ níhí-di tnúhu ndee ìní-áⁿ cunuu-di.

⁶ Te ducaⁿ ñ quide-di ní cáháⁿ úhú-di Yá Ndiǒxí ndihí cuèndá nchaa sá quidé-gǎ, te diu-ni ducaⁿ ñ

cáháⁿ úhú-di núú ndécú-gă, te ní cáháⁿ úhú tucu-di nchaa ñáyiú ndècu ndihí-gá andiú.

7 Te ducaⁿ ñí níhí-di tnúhu ndee ìní sá nàá-di ndihí nchaa ñáyiú cùu cuendá Yă Ndiöxí, te ducaⁿ nàá ndihí ñaha-di xii-yu ndéé òré vá ndácú-gă-yu nàá ndihí ñàhá-yu xii-di, te tnàhá ní ngúndecu ndihí-di tnúhu ndee ìní sá táxí tnùní-di ñáyiú nchaa nàcióⁿ, ndihí ñáyiú nchaa ñúú, ndihí nchaa ñáyiú cáháⁿ ndí dǎíⁿ ndí dǎíⁿ núú tnũhu, ndihí ñáyiú xĩndecu nchaa xichi.

8 Te cue ñáyiú ñihí ñuyíú ñí cachí-yu sá ïo cànhu cuu quití-áⁿ, te ñáyiú-áⁿ cúú-yu ñáyiú ñá túú yòdo tnuní núú tütú Yaá cáá dàtná cáá ìíⁿ mbéé quití ní dánicuèhé-güedé Yaá ní xíhí ní cùu te ní ndoto. Te ndéé cútnàhá ní ngáva ñuyíú sa yòdo tnuní ñáyiú naníhí tàhú, dico ñáyiú càhí sá ïo cànhu cuu quití-áⁿ ñà túú yòdo tnuní-yu núú tütú-gá.

9 Te nchaa nchòhó ñáyiú xĩndedóho chí cündedóho váha nchaa nàcuáa cuáháⁿ tnúhu-áⁿ.

10 Te nchaa ñáyiú na chihí taha ñáyiú-xi vecaá te sáá nduu te quíhíⁿ-yu tnàhá-yu vecaá, te nchaa ñáyiú sàhni taha ñáyiú-xi ndihí yuchí te diu-ni ndihí yuchí cuú-yu tnàhá-yu, te xǎⁿ núú ío xìni ñuhu-xi sá ncháá ñáyiú cùu cuendá Yă Ndiöxí cunduú cànhu ìní-yu, te quĩndáá ìní ñàhá-yu xii-gá.

11 Te ní xiní tucu-í ingá quití ní quene-di núú ñuhu yìchí, te ndéé úú ndiqui-di te càa datná cáá ndiqui canerú, te cáháⁿ-di dàtná cáháⁿ quití dééⁿ nání dràgón.

12 Te dàtná ndécú ndihí quití ní quene xití làmár-áⁿ tnũhu ndee ìní sá táxí tnùní-di ducaⁿ ndècu ndihí quití ní quene ñuhu yìchí-áⁿ tnũhu

ndee ìní taxi tnùní-dì cada-dì núú quitì ní quene xítí làmár-án, te quitì ní quene ñuhu yìchí-án nǐ quide yica-dì sǎ ncháá ñǎyiu xǐndecu ñihì ñuyíú chiñuhú-yu quitì ní quene xítí làmár-án, quitì càhú víhí nǐ tnahá ní nícuèhé te ní ndúha-dì.

13 Te quitì ní quene xítí ñuhu yìchí-án nǐ quide-dì titní núú sǎ vǎ yǎo tnahí ndàcu cada, te nchaa ñáyiu ní xiní-yu sá ndéè andiú nǐ dǎngóyó-dí ñùhú ñuyíú.

14 Te sá dúcáⁿ nǐ ngúndecu ndihí-dì tnúhu ndee ìní ní quide-dì nchaa xǐǎⁿ ní quide-dì núú quitì ní quene xítí làmár-án, te sá dúcáⁿ nǐ quide-dì te xǐǎⁿ ní dándàhú-dì nchaa ñáyiu xǐndecu ñihì ñuyíú, te ní xáhaⁿ-dì xíí-yu sá ndúcǔ-yu ñⁿ sá cǎdǔha-yu nàcuáa-ni cǎa nacuáa-ni ndúu quitì ní quene xítí làmár-án, quitì càhú víhí nǐ tnahá ní nícuèhé díquí-xi-án nǐ quée machití te ñá túú ní xǐhí-dì chi ní xǐndecu-ni-dì.

15 Te quitì ní quene xítí ñuhu yìchí ní ngúndecu ndihí tucu-dì tnúhu ndee ìní sá chíhí-dí ìní sá nǐ cadúha-yu-án, sá nǐ natavá-yu dàtná cáá quitì ní quene xítí làmár-án, te ducaⁿ nǐ quide quitì-án cuèndá cáháⁿ sá nǐ cadúha-yu-án, te xǐǎⁿ cada-xi cuú nchaa ñáyiu ñá túú ní cuìní chiñuhu ñaha xii-dì.

16 Te quitì ní quene xítí ñuhu-án quídé-dí sǎ ncháá ñáyiu ngúndéé ñⁿ tnuní ndaha cùhá-yu àdi tneé-yu, te ducaⁿ nǐ quide-dì cuèi ñáyiu cùnuu te cuèi ñáyiu ñá túú cùnuu, te cuèi ñáyiu cuica te cuèi ñáyiu ndàhú, te cuèi ñáyiu ñá túú dàñá quee núú chíúⁿ pàtróóⁿ-xi, te cuèi nchaa ñáyiu dàñá quée núú chíúⁿ pàtróóⁿ-xi ncháá-yu ducaⁿ nǐ ngúndéé tnuní ñíí-yu.

17 Te ní quide-di sá ncháá ñǎyiu ñá túú ndèé tñuní ñǎ-xí vá cúú cuááⁿ-yu sá càchí iní-yu te ni vǎ cúú dicó-yu ñⁿ sá cuíní-yu dicó-yu, te tñuní-áⁿ cúú-xí ðiù quiti ní quene xití làmár-áⁿ àdi númerú-di.

18 Te xini ñuhu-xi sá ncháá ñǎyiu ío váha cùnñuní iní-xi ío váha cuáha-yu cuendá nàcuáa quèe-xi númerú quiti-áⁿ, te númerú-áⁿ cúú-xí íñú ciendú únídico íñú, te cùu-xi cuendá ñⁿ ñáyiu ñuyíú.

14

Cuendá ñⁿ ciendú údico cúmí mǐl ñáyiu

1 Te sátá dúcáⁿ te ní xiní-í Yáá cáá ðàtná cáá ñⁿ mbéé quiti ní dánícuèhé-güedé nútní-gá ñⁿ yucu ñúú nání Sìon ndécú àndiù, te nutní-gá ndihi ñⁿ ciendú údico cúmí mǐl ñáyiu, te tneé-yu ndèé ðiù-gá ndihi ðiù tátá-gǎ Dútú Ndiöxí.

2 Te ní tecú dóho-í ní quide-xi andiù ðàtná quidé-xí núú xíca cuèhé víhí ndùte, te quide tucu-xi ðàtná quidé-xí òré níhi vìhi caháⁿ ñúhu, te quide tucu-xi ðàtná quidé-xí òré cuèhé víhí ñáyiu càní-yu àrpá.

3 Te ní tecú dóho-í xixita yuhu sǎ xítá yùhu núú Yáá núcõo núú xilé váha, ndihi núú ndi cùmí cue quiti xínutní-áⁿ, ndihi núú ncháa cue téé cùu sacuéhé xínucóo-áⁿ, te xixita-xi ñⁿ ndudú sáá. Te mee-ni cuè ñáyiu ñⁿ ciendú údico cúmí mǐl-áⁿ quèe díquí-yu ndudú-áⁿ, te ñáyiu-áⁿ cúú-yu ñáyiu ní dácăcu nihnu ñaha Yáá cáá ðàtná cáá ñⁿ mbéé quiti ní dánícuèhé-güedé núú ñáyiu ndècu ichi cuehé ichi duha xíndecu ñuyíú, te vá yõo ñⁿ-gá quèe díquí-xi

ndudú sáá-ǎⁿ chi mee-ni ñáyiú ní cácu nihnu-áⁿ quëe díquǐ-yu.

⁴ Te ñáyiú ní cácu nihnu-áⁿ cúǔ-yu ñáyiú ñá túú ní xǐndecu ichi díí ìní, te cùú-yu ñáyiú càndoo canine iní-xi, te ndéni ní cuu cuáháⁿ Yaá cáá dàtná cáá ìⁿ mbéé quiti ní nícuèhé-áⁿ, te ducaⁿ-ni ndëndaha ñàhá-yu xii-gá cuáháⁿ, te ñáyiú-áⁿ ñí cácu nihnú-yu núú ncháa ñáyiú ñuyíú, ñáyiú ndècu ichi cuehé ichi duha, te ñáyiú ní cácu nihnu-áⁿ cúǔ-yu ñáyiú díhna nuu ñí nduu táhú Yǎ Ndiǒxí cuu cuèndá-gá ndihí Yaá cáá dàtná cáá ìⁿ mbéé quiti ní dánícuèhé-güedé.

⁵ Te cùú-yu ñáyiú ñá túú càháⁿ ni ìⁿ tnúhu ndehnde, te càndoo canine iní-yu ndècú-yu núú núcõo Yá Ndiǒxí táxí tnùnì-gá.

Cuèndá úní cue espíritú xínú cuèchi núú Yǎ Ndiǒxí

⁶ Te sáta dúcáⁿ te ní xiní-í ìⁿ espíritú xínú cuèchi núú Yǎ Ndiǒxí xícó-xí cuǎdava andíu, te ndècu ndihí-xi tnúhu sá càháⁿ nàcuáa naníhí tàhú-ó, tnúhu sá ñà túú tnàhí ndihí nihnu te tnúhu-áⁿ danèhé espíritú-aⁿ ncháa ñáyiú ndècu ñuyíú, ñáyiú ncháa nàcióⁿ, ndihí ñáyiú ncháa ñuú, ndihí ncháa ñáyiú càháⁿ ndí dííⁿ ndí dííⁿ núú tnúhu, ndihí ñáyiú xǐndecu ncháa xichi.

⁷ Te níhi ní cáháⁿ-xi te càchí-xi:

—Ncháa nchòhó ñáyiú ndècu ñuyíú canehe-ndo sǎ yíñùhu núú Yǎ Ndiǒxí, te cachí-ndó sǎ ìo càhnu cuu-gá chi sa ní sáá nduu càda ndáá-gá ncháa cuèchi-ndo, te chiñuhu-ndo-gǎ chi ñu-gá ní cadúha-gá andíu, ndihí ñuhu yìchí, ndihí làmár, ndihí ncháa ndóhyo —duha càchí espíritú-áⁿ.

⁸ Te nchìcúⁿ tucu ìngá espíritú xínú cuèchi núú Yă Ndiöxí, te cächí-xi:

—Vitna ní naa ñúú Babiloniá ñúú ío cùnuu, te ducaⁿ ñí naa chi cue ñáyiú ñúú-áⁿ ñí quidé-yu ní xíta nihnu nchaa ñáyiú nihí ñuyíú, chi ní sanu ichi ñàhá-yu ichi cuèhé ichi duha —duha cächí espíritú-áⁿ.

⁹ Te nchìcúⁿ tucu ìngá espíritú xínú cuèchi núú Yă Ndiöxí te níhi cãháⁿ-xi, te cächí-xi:

—Nchaa ñáyiú chĩñuhu ñaha xii quiti ní quene xití lâmár, ndihí sá ñí natava ñàhá-yu nàcuáa càa-dí-áⁿ, ñáyiú ní dáñá mèe-xi ní ngúndeé tnuní ndahá-yu àdi tneé-yu,

¹⁰ ñáyiú-áⁿ sũúni dândoho ñaha Yá Ndiöxí xii-yu chi ío cùdééⁿ-gã, te ducaⁿ ío dândoho ñaha-gá xii-yu chi daquihíⁿ ñàhá-gã xii-yu núú ñùhú núú ñùhú àzufré càyú-xi, te núú cuè espíritú xínú cuèchi núú-gã ducaⁿ dândoho ñaha-gá xii-yu, ndihí núú Yáa cáa dàtná cáa ìⁿ mbéé quiti ní dánícuèhé-güedé.

¹¹ Te ni caa ni quíhíⁿ quene ñúhmá nũú dúcáⁿ cùndecú-yu ndohó-yu-áⁿ, te cuèi nduu cuèi níú ducaⁿ ndòhó-yu. Te ducaⁿ ndòho nchaa ñáyiú chĩñuhu ñaha xii quiti ní quene xití lâmár, ndihí sá ñí natava ñàhá-yu nàcuáa càa-dí-áⁿ, te diu-ni ñáyiú-áⁿ cúú-yu ñáyiú ní ngúndeé tnuní ndaha-xi àdi tneé-xi —duha cächí espíritú-áⁿ.

¹² Te xíⁿ xíní ñùhu-xi sá ncháá ñáyiú cùu cuendá Yă Ndiöxí cunduu càhnu iní-yu, chi diu-ní-yu cùú-yu ñáyiú tnèi nchaa tnúhu cãháⁿ-gá, te ni yùhu ni iní-yu sãndáá iní-yu Xítóhó Jesucrìstú.

13 Te sáta dúcáⁿ te ní tecú dóho-í ní cáháⁿ ìⁿ sá nǐ cáháⁿ andi^u, te càchí-xi:

—Chido tnùnì-n ìⁿ núú tùtú nàcuáa na càháⁿ-í-a, “Není vitna ío váha táhú nchaa ñáyi^u sàndáá ìní tnúhu Xítohó Jesucrístú te xihí-yu” —duha càchí sá nǐ cáháⁿ-áⁿ.

Te Espíritú Yă Ndiöxí ní cáháⁿ-xi, te càchí-xi:

—Ndáá, chi ndetatú-yu chi ñá túú-gă nágá chi^u ndohó-yu cadá-yu, te Yă Ndiöxí sa nàha-gá nchaa nàcuáa ndùu chi^u ní quidé-yu —duha càchí Espíritú-gá.

Nchaa sá cúú nǔú ñúhú

14 Te sáta dúcáⁿ te dătnùnì ní xiní-í ìⁿ vícò cuixíⁿ, te núú vícò-ăⁿ nǐ xiní-í núcôo ìⁿ Yaá, te càa-gá dătná cáá ìⁿ téé ñuyíú, te díquí-gă ñúhú ìⁿ coroná ní cuáha mee-ni dǐhúⁿ cuááⁿ, te nùndaha-gá ìⁿ yuchí ndíquí te súúni dǎéⁿ.

15 Te ní xiní-í ìⁿ espíritú xínú cuèchi núú Yă Ndiöxí ní quee-xi xití vehe-gá, te níhi ní cáháⁿ-xi xăhaⁿ-xi xì Yaá núcôo núú vícò-ăⁿ:

—Sa ní cuu nàquehdé-n nchàa sá nǐ cuu ñuyíú ndihí yuchí ndíquí-n, chi sa ní cuu nucôo tnàha-xi —duha càchí espíritú-áⁿ xăhaⁿ-xi xì Yaá-áⁿ.

16 Te Yaá núcôo núú vícò-ăⁿ nǐ dáyăha ndodo-gá yuchí ndíquí-gă núú ñùyíú nǐ nataxi tnàha-gá nchaa sá nǐ cuu.

17 Te ní xiní tucu-í ìngá espíritú xínú cuèchi núú Yă Ndiöxí ní quee-xi xití vehe-gá sá cáá àndi^u, te nùndaha-xi tnahá-xi ìⁿ yuchí ndíquí dǎéⁿ.

18 Te ní xiní tucu-í ní quee tucu ìngá espíritú xínú cuèchi núú Yă Ndiöxí núú nútñi núú sácódó sǎ ndúú táhú-gă, te ndècu ndihí-xi tnúhu ndee ìní

táxí tnùní-xi ñuhú, te espíritú-áⁿ ñihi ní cáháⁿ-xi xăhaⁿ-xi xìi espíritú néhé yùchí ndíquí dĕéⁿ-áⁿ:

—Ngüíta naquehndé-n ndìhi yuchí ndíquí-n ndĕhé yoho yàha stilé sá ió ñuyíú chi sa ní cuu nàtehndé —duha cāchí espíritú-áⁿ xăhaⁿ-xi xìi espíritú néhé yùchí ndíquí-ăⁿ.

¹⁹ Te espíritú néhé yùchí ndíquí-ăⁿ ñí dáyăha ndodo-xi yuchí ndíquí-xí núú ñuyíú ñí nàquehndé-xi nchaa ndéhé yoho yàha stilé, te ní chihi-xi ìⁿ xichi núú ñí chihi-xi cuëndá xíáⁿ quihni-xi quee ndudí-xi, te sá dúcáⁿ ñí quide-xi xíăⁿ cútnùní iní-ó să ïo cùdĕéⁿ Yă Ndiöxí núú ñăyiu ñuyíú.

²⁰ Te ndéhé yoho yàha stilé-áⁿ ñí quihni-xi ìⁿ xio yuhu ñùú, te ndudí ndéhé yoho yàha stilé-áⁿ ñí nduu-xi ñíñí te ní quee-xi núú quíhni ñihnu espíritú-áⁿ. Te úní ciëndú mĭl mĕtrú ní xica ñíñí-ăⁿ, te dàtná ìⁿ mĕtrú dava ní sáá cuehnu ñíñí-ăⁿ ñí xica-xi.

15

Úsá tnúndòho

¹ Te ío vĭhi ní quide-xi ìⁿ sá ñí quide-xi andiú te ní cuñúhu vĭhi-í, te ní xiní-í úsá tñàhá espíritú xínú cuèchi núú Yă Ndiöxí, te ìⁿ ìⁿ cue espíritú-áⁿ ndécú ndìhi-xi tnúhu ndee ìní dandòho-xi ñáyiu ñuyíú, te nà yàha nchaa tnúndòho-áⁿ, te vá cùdĕéⁿ-gă Yă Ndiöxí núú-yu dândoho ñaha-gá xií-yu.

² Te ní xiní-í ìⁿ làmár te ndute làmár-áⁿ cáá dàtná cáá vĭdriú, te dàcánuu-xi ndìhi ñuhú, te yuhu làmár-áⁿ xĭnutnĭi nchaa ñáyiu ní ndacu ní dáquĕé

tǐhú ñáhá xìi quiti ní quene xití làmár-án, te ducaⁿ ñí ndacú-yu ní dáquée tǐhũ-yu sá ñí natava ñáhá-yu nàcuáa càa-di-án, te ducaⁿ ñí ndacu tucú-yu ní dáquée tǐhú tucú-yu númerú-di sá cúú dàtná diu-di, te nchaa ñáyi-u-án ñí nduu táhũ-yu núú Yă Ndiõxí àrpá xǐnehé-yu cuendá caní-yu.

³ Te xǐxitá-yu ndudú sá ñí xita ndíi Moisés ndíi ní xinu cuechi núú Yă Ndiõxí ndée sanaha, te xita tucú-yu ndudú Yaá cáá dàtná cáá ñí mbée quiti ní dánicuèhé-güedé, te càchí-yu:

Yòhó Dútú Ndiõxí ío càhnu cuu-n, chi quide-n nchaa sá vǎ yõo tnàhí ndàcu cada, te cùu-n Yaá ndácú quide nchaandi túhú sá vǎha, te ío ndáá quidé-n te ío ndáá càháⁿ-n, te yìndaha-n nchaa ñáyi-u ñihí ñuyíú.

⁴ Te nchaa ñáyi-u nèhé-yu sá yíñùhu núú-n, te ncháá-yu càchí-yu sá ño càhnu cuu-n, chi ñí dǐi díi-ni yòhó cúú-n Yàá ío váha quide ndáá, te nchaa ñáyi-u ñihí ñuyíú nataká-yu chiñuhu ñáhá-yu xii-n, te ducaⁿ càdá-yu chi ndèhé-yu nchaa sá vǎha quide-n.

Duha càchí ñáyi-u-án xǐxitá-yu.

⁵ Te sátá dúcáⁿ te ní xiní-í ní nacaáⁿ yuyèhe vehe Yă Ndiõxí andi-u, te xití vehe-gá-án ndécú sǎ ndée tnúhu-gá.

⁶ Te xití vehe-gá-án ñí quee úsá tnàhá espíritú xínú cuèchi núú-gǎ, te ñí ñí-xi ndècu ndíhi-xi tnúhu ndee ìní dandòho-xi ñáyi-u, te xǐxíhnu-xi mee-ni dǒó vǎha, te sùúní vǎha càndoo, te chàhnchí, te

yìdúcúⁿnuu cìnchú ní cuáha mee-ni dǐhúⁿ cuàáⁿ pèchú ndi ùsá cue espíritú-áⁿ.

7 Te ìⁿ quiti cúmí xǐnutnǐⁿ núú nútnǐⁿ xilé váha ní sáñaha-di ìⁿ caa sá nàhá tícùú ní cuáha mee-ni dǐhúⁿ cuàáⁿ xii ìⁿ ìⁿ espíritú-áⁿ, te xití nchaa tícùú-áⁿ ñúhú ìⁿ sá ñúhú te xǐáⁿ cútnùní sá Yá Ndiǒxí dandòho-gá ñáyiú ñuyíú, te diu-gá cúú-gá Yaá ndécú nchàa nduu nchaa quíú.

8 Te xití vehe-gá-áⁿ ñǐ chítú ñǔhmá, te ducaⁿ ñǐ quide-gá cuendá cutnùní iní ñáyiú sá ìo càhnu cuu-gá táxí tnùnì-gá, te vá yǒo ìⁿ cuu quíhu xití vehe-gá-áⁿ ndèé ndihì ndi ùsá tnúndòho cada ndi usá cue espíritú-áⁿ ñuyíú.

16

Tnúndòho cada-xi ñuyíú

1 Te sátá dúcáⁿ te ní tecú dóho-í níhi ní cáháⁿ ìⁿ sá ñǐ cáháⁿ xití vehe Yá Ndiǒxí, te xǎhaⁿ-xi xii ndi usá cue espíritú-áⁿ:

—Chí cuàháⁿ coyo-ndo sǎ ñúhú xití nchaa tícùú néhé-ndó-ǎⁿ núú ñuyíú, chí sá ñúhú-ǎⁿ cúú-xí tnúndòho tendaha Yá Ndiǒxí sá cúú-xí nchàa ñáyiú ñuyíú —duha càchí sá càháⁿ-áⁿ.

2 Te espíritú díhna ní sáháⁿ-xi ní coyo-xi sá ñúhú xití tícùú néhé-xí-ǎⁿ ñuyíú, te nchaa ñáyiú ñùhu tnuní quiti ní quene xití làmár ñáyiú ní chiñuhu sá ñǐ natava ñàhá-yu xii-di, nchaa ñáyiú-áⁿ ñǐ quené-yu ndíhyi tèhyú te súúní dándòho ñaha-xi xii-yu.

3 Te espíritú cúú ùú ní coyo-xi sá ñúhú xití tícùú néhé-xí núú làmár, te ndute làmár-áⁿ ñǐ nduu-xi

níñí te càa-xi datná cáá nǐñí ñǎyiu sa ní xíhí, te nchaa quiti ñùhu xiti làmár-áⁿ nǐ xíhí-güedi.

⁴ Te espíritú cúú ùní ní coyo-xi sá ñúhú xiti tícúú néhé-xí nchàa yúte ndihi nchaa núú quènihni ndute, te ndute nchaa yúte-áⁿ ndihi nchaa ndute quènihni-áⁿ nǐ nduu-xi níñí.

⁵ Te sátá dúcáⁿ te ní tecú dóho-í ní cáháⁿ ñⁿ espíritú xínú cuèchi núú Yǎ Ndiöxí, espíritú yíndàha ndute, te xǎhaⁿ-xi xiti Yá Ndiöxí:

—Yòhó Dútú Ndiöxí cúú-n Yáá quidé ndǎá cuiti núu duha quide-n tendaha-n tnúndòho-a, te diu-ni-n cùu-n Yáá ndécú ndéé cútñàhá ní ngáva ñuyíú, te diu-ni-n cùu-n Yáá ndécú vitna te ñǎ túú tnǎhí cuèchi-n.

⁶ Chi cue ñáyiu ñuyíú nǐ dácácǎ-yu níñí nchaa ñáyiu ní cáháⁿ tnúhu-n ndihi nchaa dava-gá ñáyiu cùu cuendá-n, te ní sahní-yu nchaa ñáyiu-áⁿ, te vitna ní dátíú-n ndùte ní nduu-xi níñí te ducaⁿ-ni càa ndute-áⁿ xihí-yu, te ducaⁿ tàú-xi ndohó-yu cuendá sá nǐ sahní-yu cue ñáyiu cùu cuendá-n — duha càchí espíritú-áⁿ xǎhaⁿ-xi xiti-gá.

⁷ Te ní tecú tucu dóho-í ní cáháⁿ ñⁿ sá nǐ cáháⁿ núú nútñí núú sácódó sǎ ndúú tǎhú Yǎ Ndiöxí, te xǎhaⁿ-xi xiti-gá:

—Ndǎá sá yòhó Dútú Ndiöxí Yáá ndácú quide nchaandi túhú sá vǎha dǎndoho-n ñáyiu nǎcuáa tàú-xi cunduu —duha càchí sá càháⁿ-áⁿ xǎhaⁿ-xi xiti-gá.

⁸ Te espíritú cúú cùmí ní coyo-xi sá ñúhú xiti tícúú néhé-xí núú nchícanchii cuendá nchícanchii-áⁿ cahmí-xi nchaa ñáyiu ñuyíú.

9 Te nchaá-yu ní ndoho vihí-yu ní cáyú-yu, te cuèi ducaⁿ ñí ndohó-yu dico ñá túú ní cuení-yu ndixi cuéchi iní-yu cuendá nchaa sá ñà túú vǎha quidé-yu, te ni ñà túú ní cǎchí-yu sá ïo cǎhnu cuu Yá Ndiǒxí chi da ní cáháⁿ úhú-yu cuendá-gá, te ðiu-gá cúú-gǎ Yaá ducaⁿ ñí tendaha tnǔndòho-áⁿ sǎ cúú-xǐ-yu.

10 Te espíritú cúú ùhúⁿ ní coyo-xi sá ñúhú xìtí tícuú néhé-xí nǔú ndécú quèti ní quene xìtí lámár-áⁿ táxi tnùní-ði, te nchaa núú táxi tnùní-ði ní cuu nee, te nchaa ñáyiú ñuyíú ndéé yáá-ná-yu nàcaxi nihnú-yu sá ndóhǒ-yu.

11 Dico ni dùcaⁿ ñá túú ní cuení-yu dàñá-yu ni ïⁿ sá cuèhé sá dúhá quidé-yu, chi da ní cáháⁿ úhú-yu cuendá Yá Ndiǒxí Yaá ndécú àndiu sá cuendá sá dándòho ñaha ndíhyi tèhyú ndèé-yu-áⁿ ndihí nchaa dava-gá sá yǎha-yu.

12 Te espíritú cúú iñú ní coyo-xi sá ñúhú xìtí tícuú néhé-xí xìtí yúte cǎhnu nani Eúfratés, te ndute yúte-áⁿ ñí yíchí cuendá yǎha cue téé yǐndaha ñáyiú xǐndecu ndàa xio nacuáa quène nchíanchii.

13 Te ní xiní-í ní quee ïⁿ espíritú cúndìhi yucu ñávǎha yuhu quiti dééⁿ nání dràgón, te ní xiní tucu-í ní quee tucu ñngá espíritú cúndìhi yucu ñávǎha yuhu quiti ní quene xìtí lámár, te ní xiní tucu-í ní quee tucu ñngá espíritú cúndìhi yucu ñávǎha yuhu téé dándahú ñáyiú cǎchí sá cǎháⁿ tnúhu Yá Ndiǒxí te ñá ndàá, te ndi nùní espíritú-áⁿ xǐndáa-xi dàtná cáá làhvá.

14 Te ndi nùní espíritú-áⁿ quidé-xí sǎ vǎ yǒo tnàhí ndàcu cada, te xìca datacá-xi nchaa cue téé

yìndaha ñaha xii ñáyiu xĩndecu ñihí ñuyíú cuendá nàá-güedé mei ndùu cachí Yă Ndiõxí coo tnúndòho cahnu vihi-gá, te ñiu mee Yă Ndiõxí cúú-gă Yaá ío càhnu cuu.

15 Te Yaá cúú Xĩtohó-ó ñi cachí-gá: “Cunaha-ndo chi nduu ñà túú yìhi iní-ndó quìxi-í núú ndécú-ndó, te cada-í dàtná quidé ñàdúhú. Te váha táhú nchaa nchòhó ñáyiu xĩndecu túha, chi cùu-ndo datná cue ñáyiu xĩndecu túha xĩxĩhnu-ni dóó-xi cuendá sá vă cúcàhaⁿ núũ-yu dàtná cúcàhaⁿ núú cue ñáyiu ñá túú ñihnu dóó-xi, te duha càháⁿ-í cuendá sá nchòhó cundecu túha-ndo òré quexìo-í”, duha càchí-gá.

16 Te ñdi ñuní cue espíritú cùndìhi yucu ñávãha-áⁿ ñi dátacá-xi nchaa cue téé yìndaha ñaha xii ñáyiu, te ní taxi ndecu ñaha-xi ñⁿ xichi núú nání Àrmagedón, duha nàni xíaⁿ tnũhu hèbreú.

17 Te espíritú cúú ùsá ní coyo-xi sá ñúhú xití tícùú néhé-xí núú tàchí, te ní tecú dóho-í ñihí ní cáháⁿ Yaá núcõo núú xilé váha xití vehe-gá, te càchí-gá:

—Xéhé-ñă cúmăní te xínu cava nchaa tnúndòho tnúhu ndàhú —duha càchí-gá.

18 Te sátá dúcáⁿ te ní sáá ndúté te ní cáháⁿ ñúhu, te súuní dùsaⁿ ní quide-xi, te ñihí vihi ní tnáa ñuyíú, te ndéé cútnàhá ní ngúndecu ñáyiu ñuyíú te vátá ñⁿ xìto-gá ñihí tnáa dàtná ní quide-xi.

19 Te ñúú cáhnú ño cùnuu nani Babiloniá ní quée dava-xi ní cuu-xi úní xichi, te nchaa ñúú cáá ñihí ñuyíú ñi ngoyo nchaa vehe, chi Yă Ndiõxí ní ndacu iní-gá nchaa sá cuèhé sá dúhá quide nchaa ñáyiu ñúú Babiloniá-áⁿ, te ducaⁿ ñi quide ñaha-gă xii-yu chi ío cùdéeⁿ-gă núũ-yu.

20 Te nchaa tìndúú nǎ ndóñhú-xí cuèi nchaa tìndúú ñuhu yìchí ndécú xítí làmár.

21 Te ní xiní-í ní cuuⁿ ñiñi nàhnu vihi ní ngaundodo-xi cue ñáyiú ñuyíú, te nchaa ñiñi-áⁿ vée-xi dàtná údico kilú, te cue ñáyiú ñuyíú nǎ cáháⁿ úhú-yu cuendá Yă Ndiǒxí sá dúcáⁿ nǎ dácúúⁿ-gă ñiñi nàhnu vihi-áⁿ, chi ní cuu-xi ñⁿ tnúndòho cahnu vihi sá cúú-xí-yu.

17

Ñadìhí ndécú ìchi dǐí ìní

1 Te núú ùsá espíritú néhé tǐcùú-áⁿ, te ñⁿ-xi ní quixi-xi núú ndécú-í, te càchí-xi xii-í:

—Néhé ná quihíⁿ-ó dànehé ñàhà-í xii-n nchàa tnúndòho sá ndóhó ñadìhí ñaha ndècu ìchi dǐí ìní, te ñaha-áⁿ cúnùu-aⁿ nucóo-aⁿ núú ñúhú vihi ndute.

2 Te ñaha-áⁿ ndécú dǐí ìní-aⁿ ndihí nchaa cue téé yìndaha ñaha xii ñáyiú xìndecu nihí ñuyíú, te nchaa dava-gá ñáyiú ñuyíú ìó ìní-yu nchìcúⁿ nihnú-yu quidè-yu nchaa nàcuáa quidè ñaha-áⁿ —duha càchí espíritú-áⁿ.

3 Te òré ducaⁿ quidè ñaha Espíritú Yă Ndiǒxí xii-í nàcuáa càchí ìní-xi, te ñⁿ espíritú xínú cuèchi núú-gă ndécá ñàhà-xi xii-í cuáháⁿ ñⁿ xítí yucu, te xítí yucu-áⁿ nǎ xiní-í ñⁿ ñadìhí yódó-áⁿ ñⁿ quiti ticuehé, te ndèé úsá díquí-dì te úxí ndiquí-dì, te nihí-dì ndèé tnuní-dì mee-ni tnùhu sá cáháⁿ úhú cuendá Yă Ndiǒxí.

4 Te ñadìhí-áⁿ níhnú-áⁿ dǒó muràdú ndihí dóó tícuehé, te mee-ni sǎ nì cuáha díhúⁿ cuááⁿ, ndihí yúú vǎha sá nání pèrlá, ndihí nchaa dava-gá núú yúú vǎha, mee-ni nchàa xǎⁿ ní cuáha sá yíhí

lõho-aⁿ, ndihì sá ñúhú dǔcúⁿ-aⁿ, ndihì sá ñúhú dǔcúⁿ ndáhá-áⁿ, te nùndaha-aⁿ ìⁿ tícùú ní cuáha mee-nì dǐhúⁿ cuááⁿ te ñúhu mee-nì sá cuèhé sá dúhá, te xiáⁿ cútnùní iní-ó sǎ cúú-áⁿ ìⁿ ñadihí ñaha ndècu ichi cuèhé ichi duha.

⁵ Te tneé-aⁿ ndéé tnuní ìⁿ tnúhu, te càchí-xi: “Ñúú Babiloniá ñúú ío cùnuu, cada iní-ndó sà cúú-xí mèi ñadihí-a, te diu ñadihí-a cùu-aⁿ ñaha sanu ichi ñaha xii nchaa ñáyiu dǐhí ñáyiu ndècu ichi dǐí iní, te náandi-gá nchaa sá cuèhé sá dúhá sànu ichi-aⁿ nchaa ñáyiu cadá-yu”, duha càháⁿ tnúhu ndéé tnuní tneé ñadihí-áⁿ. Te vá yõo tècú tnùnì ná cuèndá ducaⁿ càháⁿ tnúhu-áⁿ.

⁶ Te ní cutnùnì iní-í sá dǐú ñàha-áⁿ ñǐ dácácá-áⁿ ñǐ ñáyiu cùu cuendá Yǎ Ndiǒxí ní sahani ñaha-aⁿ xii-yu, te ñáyiu ní xihí-áⁿ cúú-yu ñáyiu ní cáháⁿ váha cuèndá Xítóhó Jesucristú, te sá dúcáⁿ ñǐ quide-aⁿ te ní nduu-aⁿ dàtná ìⁿ ñáyiu quihu. Te ío ní cuñúhu-í sá dúcáⁿ ñǐ cuu ní xiní-í.

⁷ Te sátá dúcáⁿ te espíritú xínú cuèchi núú Yǎ Ndiǒxí-áⁿ càchí tucu-xi xii-í:

—Vá ndéé dúcáⁿ cùñúhu-n, chi vitna na càchí tnúhu-í xii-n nàcuáa quèe-xi cuendá quiⁿ ndéé úsá díquí-xi ndihì úxí ndiqui-xi-áⁿ, ndihì nàcuáa quèe-xi cuendá ñadihí ñaha yòdo ñaha xii-di-áⁿ.

⁸ Te quiⁿ ní xiní-n-ǎⁿ cúú-dí ìⁿ quiⁿ sa ní xíndecu te vitna ñá túú-gǎ-di ndècu, te sáá nduu te quene-di yaú cùnú víhí sǎ ìo nèhé cáá, te dàtnùnì sáá nduu te quíhíⁿ-di núú ùhú núú ndàhú ñǐ caa ñǐ quíhíⁿ, te cue ñáyiu xíndecu ñuyíú cuñúhu vǐhí-yu quiⁿ-áⁿ chi cùu-di ìⁿ quiⁿ sa ní xíndecu ñǐ cùu te sáá nduu cùndecu tucu-di, te ñáyiu ducaⁿ cùñúhu ñaha

xì-di-áⁿ ñà túú yòdo tnuní-yu núú tütú núú yódó tnùní cue ñáyiu naníhí tàhú, chi ndéé cútnàhá vátá ngăva-gá ñuyíú ducaⁿ sa yòdo tnuní cue ñáyiu naníhí tàhú.

⁹ Te nchaa ñáyiu tècú tnùní xìni ñuhu-xi cani váha iní-yu cuendá tnúhu-a. Te ndi ùsá díquí quiti-áⁿ cada iní-ó sã cúú-xí ùsá tĩndúú núú núcõo ñadìhí-áⁿ.

¹⁰ Te ndi ùsá díquí quiti-áⁿ cada iní-ó sã cúú-xí ùsá tnàhá cue téé yĩndaha ñaha xii ñáyiu, te úhúⁿ cue téé-áⁿ ñà túú-gă cúnùu-güedé vitna, te ìⁿ téé-áⁿ cúnùu-dé vitna te ìngá-dé vátá sàá-gá nduu cùnùu-dé, te na sàá nduu dùcaⁿ cunuu-dé te sacú-ni nduu cunuu-dě.

¹¹ Te quiti ní xĩndecu ni cùu te ñá túú-gă-di ndècu vitna, cùu-di datná téé cùu uná yĩndàha ñaha xii ñáyiu, te ìⁿ-ni cùu-di ndìhi cue téé úsá yĩndàha ñáyiu-áⁿ, te quiti-áⁿ sãá nduu cuíta ni-hnu-di quíhíⁿ-di núú ùhú núú ndàhú ni caa ni quíhíⁿ.

¹² Te ndi ùxí ndiqui quiti-áⁿ cada iní-n sã cúú-xí ùxí tnàhá cue téé quĩndaha ñaha xii ñáyiu, dico vátá sàá-gá nduu cùnùu-güedé quĩndaha ñaha-güedé xii-yu. Te cue téé-áⁿ ñhí-güedě tnúhu ndee ìní taxi tnùní-güedé ndìhi quiti-áⁿ, dico tnaa-ni taxi tnùní-güedé ndìhi quiti-áⁿ.

¹³ Te ndi ùxí cue téé-áⁿ cuu ìⁿnuu-güedě taxi tnùní-güedé, te chĩndee-güedě quiti-áⁿ cuendá cuu ìⁿnuu-güedě ndìhi-di cuendá taxi tnùní-gă-di.

¹⁴ Te cue téé-áⁿ nàá-güedé ndìhi Yaá cáá dàtná cáá ìⁿ mbéé quiti ní dánìcuèhé-güedé dico vá ndácú-güedě nàá-güedé ndìhi-gá chi cuíta-güedé.

Te diu-gá cúu-gă Yaá ío cùnuu taxi tnuní cuèi nchaa tée yìndaha ñaha xii ñáyiu, te ducaⁿ-ni tàxi tnuní-gá cuèi nchaa dava-gá-yu. Te mee Yă Ndiõxí ní cachí-gá nándi cùu nchaa ñáyiu cundecu ndihí Yaá cáá dàtná cáá ìⁿ mbéé quiti ní dánìcuèhé-güedé-áⁿ, te diu-ni ñáyiu-áⁿ cúu-yu ñáyiu ní cáháⁿ-gá te cùu-yu ñáyiu quide ndáá ndécú ìchi-gá —duha càchí espíritú xínú cuèchi núú-gă.

¹⁵ Te ní cachí tucu espíritú-áⁿ xii-í:

—Ndute ñùhu núú núcõo ñadhí ñaha ndècu ichi díí ìní-áⁿ, ndute-áⁿ cada iní-n sã cúu-xí ñáyiu nchaa nacióⁿ, ndihí ñáyiu nchaa ñuú, ndihí ñáyiu xíndecu nchaa xichi, ndihí ñáyiu càháⁿ ndí dííⁿ ndí dííⁿ núú tnùhu.

¹⁶ Te dàtná ní cachí-í sá ndí uxí ndiqui quiti ní xiní-n-ãⁿ cúu-xí ùxí tnàhá cue tée quindaha ñaha xii ñáyiu, te cue téé-áⁿ cuu úhú iní-güedé ñadhí ñaha ndècu ichi díí ìní-áⁿ, te ni vã cádá cuendá ñáhá-gă-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmi ñaha-güedé.

¹⁷ Te mee Yă Ndiõxí ducaⁿ dàcaháⁿ-gá iní cue téé-áⁿ cuendá cada-güedé nàcuáa cùní méé-gă, te xíãⁿ núu cuu ìⁿnuu-güedé cuendá cúñaha-güedé xii quiti-áⁿ cada-dí núú-güedé taxi tnùní-dí, te ducaⁿ-ni càda-dí núú-güedé taxi tnùní-dí ndéé ná sàá nduu càda Yá Ndiõxí nàcuáa ní cachí-gá.

¹⁸ Te ñadhí ñaha ní xiní-n-ãⁿ cada iní-n sã cúu-áⁿ ñuú cáhnú ñuú ío cùnuu, te ñuú-áⁿ ndécú tée ío-gá cúnùu taxi tnuní nchaa cue téé yìndaha ñaha xii ñáyiu xíndecu ñuyíú —duha ní cachí espíritú xínú cuèchi núú Yă Ndiõxí xii-í.

18

Ní naa ñuú Babiloniá

¹ Te ducaⁿ te dǎtnùní ní xiní tucu-í ingá espíritú xínú cuèchi núú Yǎ Ndiǒxí, te ndéé andiú nì dǎtǎsaⁿ-xi te ní dáyèhé-xi ñuyíú, te espíritú-áⁿ ïo cùnnuu-xi.

² Te níhi ní cáháⁿ-xi, te càchí-xi:

—Ní sǎá nduu nàa ñuú cáhnú ñuú cúnùu nani Babiloniá, te xiáⁿ-nǎ natacá nchaa núú espíritú cùndìhi yucu ñávǎha cundecu-xi, te vá quée-gǎ-xi xiáⁿ, te diu-ni xiáⁿ natacá nchaa quiti ndàva núú tàchí nchaa quiti ndehe quìde, quiti ñǎ túú tnàhá iní ñáyiu te xiáⁿ-nǎ cundecu-güedi.

³ Te ducaⁿ chi ñáyiu ñuú-áⁿ sánú ìchí-yu nchaa ñáyiu nihí ñuyíú ichi cuèhé ichi duha, te ducaⁿ-ni xǐnchícúⁿ nihnu nchaa ñáyiu ñuyíú xǐliquidé-yu, te nchaa cue téé cùnnuu yǐndaha ñaha xii ñáyiu, cue téé-áⁿ cúú ìnⁿnuu-güedé ndihi nchaa ñáyiu ñuú-áⁿ quidé-güedě ndihí-yu nándi sá cuèhé sá dúhá. Te nchaa ñáyiu dīco nándi sá dīcó quèheⁿ ñáyiu ñuú-áⁿ ïo cùu cuicá-yu, te ducaⁿ quèheⁿ nchaa ñáyiu ñuú Babiloniá-áⁿ nchaa sá dīcó ñáyiu-áⁿ cuendá xiáⁿ cǎnehé-yu ndécú-yu ichi cuèhé ichi duha —duha càchí espíritú-áⁿ.

⁴ Te sǎtá dúcáⁿ te ní tecú dóho-í ní cáháⁿ ìⁿ sá ñǎ cáháⁿ andiú, te càchí-xi:

—Nchaa nchòhó ñáyiu cùu cuendá-í quee-ndo ñuú Babiloniá cuendá sá vǎ cùndècu-ndo tnàhá-ndó ìchi cuehé ichi duha dǎtnǎ ndécú ñáyiu ñuú-áⁿ, te ducaⁿ te vá quìní-ndó tnǔndòho tnúhu ndàhú sá quíxí cùu xii ñáyiu-áⁿ.

5 Chi ío cuéhé cuěchi-yu ní cuu ndècu núú Yă Ndiǒxí, te mee-gă náhá-gă nàcuáa ndùu nchaa sá quidě-yu.

6 Te nchòhó ñáyiú cùu cuendá-í, chí nánchòcáva dandòho-ndo ñáyiú-áⁿ dàtná quidé mèé-yu dándohó-yu cue ñáyiú, te úú xito nanchòcáva-ndo dándohó-ndó-yu, te ducaⁿ càda-ndo cuendá ío-gá ndohó-yu.

7 Te ío quide cahnú-yu mèé-yu, te ío cùdíí ìní-yu quidé-yu nchaa núú sá cuéhé sá dúhá, te sá dúcáⁿ xidó-yu quidé-yu nchaa sá cuéhé sá dúhá nùu xíáⁿ nchòhó ío dandòho-ndó-yu, te ducaⁿ chí ñáyiú ñuú-áⁿ sání ìní-yu, te càchí-yu: “Nchúhú cúú-ndí dàtná ìⁿ ñadìhí ñá túú quèé, ñaha ío cùnnuu yindaha ñaha xii ñáyiú. Te ducaⁿ sãtnahá-xi cùu-ndí chí nchaa-ni nduu ío váha cùu ìní-ndí ndécú-ndí, te ni vã sáá ìⁿ nduu te ndíhú ìní-ndí”, duha càchí ñáyiú ñuú-áⁿ.

8 Te sá cuendá nchaa sá quidě-yu-áⁿ nùu xíáⁿ ìⁿ-ni ndùu sáá tnúndòho sá cúú-xí-yu, te ío ndohó-yu chí ñuú-yu coo tnamá, te coo cuéhé cahni ñaha-xi xí-yu, te ío ndíhú ìní-yu, te cáyú ñuú-yu, te ducaⁿ ndòhó-yu chí Dútú Ndiǒxí ío cùnnuu-gá, te ñuú-gá ducaⁿ dándohó ñaha-gá xii-yu —duha càchí sá ní cáháⁿ àndiú-áⁿ.

9 Te nchaa cue téé cùnnuu yindaha ñaha xii ñáyiú ío ndáhyú-güedé sá ndíhú ìní-güedé òré ná quíní-güedé quene ñúhmá cáyú ñuú cue ñáyiú Babiloniá, chí ñuú cue téé-áⁿ cúú-güedé cue téé cùu ìⁿnuu ndíhí-yu quide-güedé nchaa núú sá cuéhé sá dúhá ndíhí-yu, te ducaⁿ chí ío tnàhá ìní-güedé

cundecu-güedé ndihí-yu ichi díí ìní.

¹⁰ Te cue téé-áⁿ xica-nă cundecu-güedé cundehe-güedé năcuáa ndoho nchaa ñáyiú ñuú-áⁿ sǎ yùhú-güedé nchaa tnúndòho-áⁿ, te cachí-güedé:

—¡Ndàhú nchòhó ñáyiú ñuú cáhnú ñúú cúnùu nani Babiloniá! Chi uuⁿni ní sáá nchaa tnúndòho tnúhu ndàhú sá cúú-xí-ndó —duha cachí-güedé.

¹¹ Te nchaa ñáyiú dìco nchaa sá nándǐhi ñáyiú ñuú Babiloniá tnàhá-yu ío ndáhyú-yu sá ndìhú iní-yu chi vá yǎo-gá cuaaⁿ nchaa sá dícǎ-yu.

¹² Te dícó-yu nchaa sá ñí cuáha mee-ni dǐhúⁿ cuááⁿ, ndihí nchaa sá ñí cuáha mee-ni dǐhúⁿ cuixíⁿ, te dìco tucú-yu sá ñí cuáha mee-ni yúú vǎha yúú nání pèrlá, ndihí nchaa dava-gá sá ñí cuáha dava-gá yúú vǎha, te dícó-yu tnàhá dóó sèdá, ndihí ingá núú dǎo vǎha sá nání lǐnú, ndihí dóó murádú, ndihí dóó tícuèhé te mee-ni dǎo vǎha cùu-xi, te dìco tucú-yu tnàhá yutnu sá sàháⁿ tnámí, te dìco tucú-yu sá ñí cuáha sá nání màrfíl, te dìco tucú-yu sá ñí cuáha mee-ni yùtnu vǎha sá ìo ndèyáhu, te dìco tucú-yu sá ñí cuáha mee-ni càá, ndihí sá ñí cuáha mee-ni sǎ nání bròncé, ndihí sá ñí cuáha mee-ni yúú vǎha yúú nání màrmól.

¹³ Te dìco tucú-yu canèlá, ndihí yúcu sǎ sàháⁿ tnámí, ndihí dúsa sá sàháⁿ tnámí, ndihí yúcu sǎ nání mǐrrá, te dìco tucú-yu ingá núú dǎsa sá sàháⁿ tnámí nàni olivánú, te dìco tucú-yu ndudí ndéhé yoho yàha stilé, ndihí acití yutnu nàni olívú, ndihí yuchi triú vǎha, te dìco tucú-yu nchaa dava-gá núú triú, te dícó-yu tnàhá mběé, ndihí cuàyú, ndihí nchaa dava-gá quití tatá, te dìco tucú-yu tnàhá carrètá, te dìco tucú-yu tnàhá ñáyiú xìnu cuechi, ñáyiú ñá túú

tnàhí dàñá quee núú chíúⁿ pàtróóⁿ-xi.

14 Te nchaa ñáyiú dìco-áⁿ cùñàhá-yu xii ñáyiú ñuú Babiloniá:

—¡Nchaa sá ïo cùdíí ìní-ndó cùndecu ndìhi-ndo ni cuu vá ndácú-gǎ-ndó ñhí-ndó vitna, te nchaa sá sání ìní-ndó sá ïo váha càa ndecu ndìhi-ndo ndìhi nchaa dava-gá sá ndécú ndìhi-ndo ní ndìhi nihnu-xi vitna, te ni ìⁿ nduu-gá vá ñhí-ndó ni ìⁿ xíáⁿ cundecu ndìhi-ndo! —duha cúñaha ñáyiú-áⁿ xii-yu.

15 Te nchaa ñáyiú ní cuu cuica ñí xóo dico nándi nchaa sá ñí xóo dico ñí queheⁿ cue ñáyiú ñuú Babiloniá, nchaa ñáyiú-áⁿ xica-ñǎ cundecú-yu cundèhé-yu sá yùhú-yu cuendá nchaa tnúndòho sá yǎha cue ñáyiú ñuú-áⁿ, te ío ndáhyú-yu sá ndìhú ìní-yu sá dúcáⁿ ndòho ñáyiú-áⁿ.

16 Te cúñaha tùcú-yu:

—¡Ndàhú nchòhó ñáyiú xíndecu ñuú cáhnú ñuú nání Babiloniá! Chi nchòhó cúú-ndó dàtná ìⁿ ñadìhí ñaha nihnu dóó vǎha dóó muradú, ndìhi dóó tícuèhé, te mee-ni sǎ ñí cuáha díhúⁿ cuàáⁿ, ndìhi mee-ni sǎ ñí cuáha yúú vǎha yúú nání pèrlá, ndìhi sá ñí cuáha dava-gá yúú vǎha sá ïo vii ndǎa mee-ni nchàa xíáⁿ ní cuáha sá yíhí lõho-aⁿ, ndìhi sá ñúhú dǔcúⁿ-aⁿ, ndìhi sá ñúhú dǔcúⁿ ndáhá-áⁿ.

17 ¡Te uuⁿni ní ndìhi nihnu nchaandi túhú sá ndécú ndìhi ñadìhí-áⁿ, te ducaⁿ sǎtnahá-xi cùu nchòhó ní cùu! —duha cúñàhá-yu xii cue ñáyiú ñuú Babiloniá.

Te nchaa cue tée dàcaca barcú ndìhi nchaa cue tée tàxi tnuní bàrcú-áⁿ, ndìhi nchaa ñáyiú ñuhu xití bàrcú-áⁿ, ndìhi nchaa dava-gá cue tée nándi

chìuⁿ quide ndecu lamár, nchaa ñáyi^u-áⁿ xica cùndecú-yu

18 te quini^u-yu òré quene ñúhmá cǎyú ñuú cue ñáyi^u Babiloniá, te níhi cáháⁿ-yu, te cachí-yu:

—Ni ìⁿ ñuú ñá túú nǔtnahá-xi ñuú Babiloniá — duha cáháⁿ-yu.

19 Te nchaa ñáyi^u-áⁿ chidó-yu ñuhu díquǐ-yu, te ngúita-yu ndáhí-yu sá ndìhú iní-yu, te níhi cáháⁿ-yu, te cachí tucú-yu:

—Ndàhú nchòhó ñáyi^u xǐndecu ñuú cáhnú ñuú nání Babiloniá! Chi ío cuica-ndo ni cùu, te ñu-ndo ní quide ní cuu cuica nchàa ñáyi^u ndècu ndìhi barcú, te vitna uuⁿni ní naa-ndo ndìhi ñuú-ndó — duha cachí-yu.

20 Te nchaa nchòhó ñáyi^u ndècu andi^u ío chí cúdǐ ìní sá dúcáⁿ dándoho Yá Ndiǒxí nchaa ñáyi^u ñuú Babiloniá-áⁿ, te ñu-ni ducaⁿ chǐ cúdǐ ìní nchaa nchòhó cue téé ní cachí Xítohó Jesucristú cáháⁿ tnúhu-gá, te ñu-ni ducaⁿ chǐ cúdǐ ìní nchaa nchòhó cue téé càháⁿ tnúhu Yá Ndiǒxí nàcuáa dàcahu iní ñáhá-gǎ xii-ndo, te ñu-ni ducaⁿ chǐ cúdǐ ìní nchaa dava-gá nchòhó ñáyi^u cùu cuendá-gá cuendá sá dúcáⁿ dándoho-gá nchaa ñáyi^u ñuú-áⁿ. Te ducaⁿ càda ñaha-gá xii cue ñáyi^u-áⁿ cuendá nchaa sá quidé ñáhá-yu xii-ndo.

21 Te sátá dúcáⁿ te ní xiní-í ìⁿ espíritú xínú cuèchi núú Yá Ndiǒxí, te espíritú-áⁿ ío ndee-xi te ní queheⁿ-xi ìⁿ yúú cáhnú dàtná càhnu yódó te ní dáquëe-xi xití ndute làmár, te càchí-xi:

—Dàtná ní quide-í ní dáquëe-í yúú xití ndute ducaⁿ càda-xi ñuú cáhnú ñuú Babiloniá, chi ñáyi^u

ñuú-án ïo ndĩhi naá-yu ndihi ñuú-yu, te vá ííⁿ ndùu ìíⁿ quíú-gă quiní ñáhá ñăyiu xií-yu.

²² Te ni ìíⁿ-gá ñăyiu cànì arpá, te ni ìíⁿ-gá ñăyiu tìú vīlu, te ni ìíⁿ-gá ñăyiu tìú cútú, te ni ìíⁿ-gá yaá vá cóó ñuú-án, te ni ìíⁿ-gá cue ñăyiu xìní cada ìíⁿ núú chiuⁿ vá cóó-gă, te ni vă yõo-gá canehe chiuⁿ yúú cúú yõdó mulínú.

²³ Te ni ìíⁿ-gá ñuhú vá cùndècu ñuú-án, te ni ìíⁿ nduu-gá vá cóó vico tnándaha, te ñăyiu ñuú-án ñăyiu quìde ndáhú cúú-yu ñăyiu ío-gá cuìcá-yu dàcúúxí ñăyiu quìde ndáhú xĩndecu nihí ñuyíú, dico nchaá-yu naá-yu chi quìde nduú-yu te ío dándahú-yu cue ñăyiu ñuyíú sã dúcáⁿ quidè-yu.

²⁴ Te ñuú-án ñuú-án ñi dácácă-yu níñí cue téé ní cáháⁿ tnúhu Yá Ndiõxí, te ñuú-án ducaⁿ ñi quidè-yu nchaa dava-gá cue ñăyiu cùu cuendá-gá, te ñuú-ní-yu quìde xísahni tnàha ñăyiu ñuyíú —duha càchí espíritú-án.

19

¹ Te sátá dúcáⁿ te ní tecú dóho-í níhi ní cáháⁿ cuéhé víhí ñăyiu andiú, te càchí-yu:

Ío càhnu cuu Yá Ndiõxí!, chi ñuú-gá cúú-gă Yaá ní dácăcu nihnu ñaha xì-o núú ùhú núú ndàhú, te ío cùnuu-gá, te mee-ni sã vâha quìde-gá,

² te mee-gă ío váha ndáá quidè-gă quidè ndăá-gá cuéchi nchaa ñăyiu,

chi ñuú-gá ní dáquihíⁿ-gá ñadìhí ñaha ndècu ichi díí ìní núú ùhú núú ndàhú,

chi ñuú-aⁿ ní sanu ichi-aⁿ ñăyiu ñuyíú ichi cuéhé ichi duha,

te ducaⁿ ñí dáquìhíⁿ ñáhá-gă xii-aⁿ núú ùhú núú
ndàhú chi nàchinaa-gá sá ñí sahní-aⁿ cue
ñáyíu ní xínu cuechi nǔú-gă.

Duha càchí-yu.

³ Te càchí tucú-yu:

—jÍo cànnu cuu Yá Ndiöxí!, chi nchaa nduu nchaa
quíú ducaⁿ-ni quène ñúhmá nǔú ñúhú ñàha-áⁿ
càyú-aⁿ —duha càchí-yu.

⁴ Te ndí òcò cúmí cue téé cùu sacuéhé xĩndecu-áⁿ
ñí ngüíñí xítí-güedě núú Yă Ndiöxí núú núcõo-gá
táxí tnùní-gá, te tnàhá cue quiti cúmí xĩnutnĩ-áⁿ ñí
ngüíñí xítí-güèdì núú-gă, te cue téé-áⁿ càchí-güedé
ndihí cue quiti-áⁿ:

—Sá ndáá sá ïo cànnu cuu Yá Ndiöxí —duha
càchí-güedé ndihí cue quiti-áⁿ.

⁵ Te sátá dúcáⁿ te ní tecú dóho-í ní cáháⁿ ĩⁿ sá ñí
cáháⁿ mei nǔú nútñĩ xilé váha núcóo Yá Ndiöxí, te
càchí sá cáháⁿ-áⁿ:

Nchaa nchòhó ñáyíu xínu cuechi núú Yă Ndiöxí,
diu-ni nchòhó ñáyíu nèhe sá yíñùhu núú-gă,
cáháⁿ-ndó să ïo cànnu cuu-gá cuěi cùnuu-ndo àdi ñá
túú cùnuu-ndo.

Duha càchí sá cáháⁿ-áⁿ.

Īⁿ vico cùu datná vico tnăndaha

⁶ Te sátá dúcáⁿ te ní tecú dóho-í ní cáháⁿ cuéhé
víhí ñáyíu andíu, te òré ducaⁿ ñí cáháⁿ-yu te ní
quide-xi dàtná quidé-xí nǔú xícá cuéhé víhí ndùte,
te ní quide tucu-xi dàtná quidé-xí òré cáháⁿ níhi
vìhi ñúhu, te càchí-yu:

jÍo cànnu cuu Dútú Ndiöxí Yaá cúú Tătá-ó! Te ío
cùnuu-gá táxí tnùní-gá, te quide-gá nchaandi
túhú sá vâha.

7 Te ío chí ná cùdíí ìní-ó, te chí ná càchí-ó sǎ ìo càhnu cuu Yá Ndiǒxí,

chi vitna ní sáá nduu càda Yaá cáá dàtná cáá ìⁿ mbéé quiti ní dánicuèhé-güedé ìⁿ vico, te cùu-xi datná vico tnǎndaha.

Te nchaa ñáyiú cùu cuendá-gá sa ní ndihí-yu sa ndècu túha-yu cundecú-yu vico-áⁿ, te cada iní-ó sǎ ñáyiú-áⁿ cúu-yu dàtná ìⁿ ñadìhí xíchí tnǎndaha ndihí-gá,

8 te ñáyiú-áⁿ ñi nduu táhǔ-yu cuihnú-yu dóó vǎha dóó chàhnchí sǎ ìo vǎha càndoo.

Duha càchí-yu.

Te sá dúcáⁿ ñi nduu táhǔ ñáyiú cùu cuendá Yǎ Ndiǒxí dóó vǎha ñihnú-yu, xíǎⁿ cútnùní iní-ó sǎ cúu-yu ñáyiú quide ndáá núú-gǎ.

9 Te ìⁿ espíritú xínú cuèchi núú Yǎ Ndiǒxí ní cachí tnúhu-xi xii-í, te càchí-xi:

—Chido tnùnín-n ìⁿ núú tütú nàcuáa na càháⁿ-í-a: “Vǎha táhǔ nchaa ñáyiú ní cáháⁿ ñáhá Yá cáá dàtná cáá ìⁿ mbéé quiti ní dánicuèhé-güedé cundecú-yu vico, te vico-áⁿ cúu-xi dàtná vico tnǎndaha cada-gá”, te duha chido tnùnín-n chi tnúhu-a cùu-xi tnúhu ndáá tnúhu Yá Ndiǒxí —duha càchí espíritú-áⁿ.

10 Te ní ngüíñí xítì-í núú espíritú-áⁿ cuendá chiñuhu-í-xi ñi cùu, te ní cachí-xi:

—Vá dúcáⁿ càda-n, chi tnàhá-í dìcò xínú cuèchi-í núú Yǎ Ndiǒxí dàtná quidé-n xínu cuechi-n núú-gǎ ndihí nchaa dava-gá ñáyiú ndècu ndihí-n ichi-gá, ñáyiú nchìcúⁿ nihnu quide ñi yuhu ñi iní nchaa nàcuáa càháⁿ Xítóhó Jesucrìstú, te núu xíǎⁿ càchí-í sǎ vǎ dúcáⁿ càda-n, chi mee Yǎ Ndiǒxí chiñuhu-n —duha càchí espíritú-áⁿ.

Te nchaa cue téè càháⁿ tnúhu Yá Ndiöxí càháⁿ-güedé nàcuáa ndùu tnúhu càháⁿ Xítóhó Jesucristú.

Cuèndá Yaa yódó ìⁿ cuayú cuixíⁿ

11 Te ní xiní-í nchìi andiu, te ní xiní-í ní quee ìⁿ Yaa yódó-gă ìⁿ cuayú cuixíⁿ. Te Yaa-áⁿ nání-gă Yaa quidé ndáá cuiti, duha nani-gá. Te quide-gá nchaa sá càháⁿ-gá, te ío váha quide ndáá-gá cuéchi nchaa ñáyiú, te nchaa ñáyiú nâá ndihî ñaha xîi-gá ío váha xîni-gá nàcuáa cada ñaha-gă xií-yu chí ío ndáá quidé-gă.

12 Te tinùu-gá dáyèhé-xi dàtná dáyèhé ñuhú, te titní coróná ñuhú dĩquí-gă, te nèhe-gá ìⁿ sá ndèè diu-gá, te vá yõ ìⁿ cùtnuní iní-xi nása cuáháⁿ tnúhu-áⁿ, chí ìⁿdìi díi-ni mee-gă nánhá-gă nàcuáa càháⁿ-xi.

13 Te Yaa-áⁿ níhnú-gă ìⁿ dóó nî cuu mee-ni ñíñí, te Yaa-áⁿ càchí tnúhu-gá nchaa nàcuáa sàni iní Yá Ndiöxí, núu xiáⁿ nání-gă Tnúhu Yá Ndiöxí.

14 Te sátá-gă nchìcúⁿ nchaa espíritú xínú cuéchi núu Yá Ndiöxí, te cue espíritú-áⁿ cúu-xí dàtná sandàdú, te xíxíhnu-xi dóó cuixíⁿ dóó vâha sá cándò, te xíxódó-xi cuayú cuixíⁿ.

15 Te yuhu Yaa yódónùu-áⁿ quéné ìⁿ yuchí cáhnú, te ndihî yuchí-áⁿ dànícüèhé-gá nchaa ñáyiú xĩndecu ñuyíú, te ío dandòho ñaha-gá xií-yu, te dàtná quidé tèè quihni ndéhé yoho yàha stilé ducaⁿ sãtnahá-xi cada ñaha-gă xií-yu, chí ío dandòho ñaha-gá xií-yu cuèndá sá ío cùdééⁿ-gă. Te mee-gă ío cùnùu-gá táxí tnùnì-gá, te quide-gá nchaandi túhú sá vâha.

16 Te sátá dõó níhnú Yaa-áⁿ ndihî núu tìcáácáⁿ-gă yódó tnùnì nàcuáa nani-gá, te duha càháⁿ-xi: “Téè

ío cùnuu taxi tnuní ñáhá xì nchaa cue tée yìndaha ñaha xii ñáyiú ndihì nchaa dava-gá ñáyiú”, duha ndèé tnuní sátá dǒó-gǎ-áⁿ ndihì tícácaⁿ-gǎ-áⁿ.

17 Te dǎtnùnì ní xiní-í ìⁿ espíritú xínú cuèchi núú Yǎ Ndiǒxí nútnǐ-xi núú nchìcanchii, te níhi ní cáháⁿ-xi, te xǎhaⁿ-xi xì nchaa quítì ndava núú tàchí:

—Nchaa nchòhó quítì ndàva, chí táquxì chi caxi-ndo nchàa sá ñǐ quide túha Yá Ndiǒxí,

18 chi caxi-ndo cùñú nchaa cue tée yìndaha ñaha xii ñáyiú, ndihì cuñú nchaa cue tée tàxi tnuní ñáhá xì cue sandadú, ndihì cuñú nchaa cue tée ío ñǐ xíndáa, ndihì cuñú nchaa cuàyu, ndihì cuñú nchaa cue tée ní xódó ñaha xii-güedi, ndihì cuñú nchaa dava-gá ñáyiú, ñáyiú ñá túú tnàhí ni dàñá quee núú chíúⁿ pàtróóⁿ-xi, ndihì cuñú nchaa ñáyiú ní dáñá ñǐ quee núú chíúⁿ pàtróóⁿ-xi, ndihì cuñú nchaa ñáyiú cùnuu, ndihì cuñú nchaa ñáyiú ñá túú cùnuu, te nchaa cuñú-áⁿ caxi-ndo —càchí espíritú-áⁿ xǎhaⁿ-xi xì nchaa quítì-áⁿ.

19 Te sátá dúcáⁿ te ní xiní tucu-í quítì ní quene xítì làmár, ndihì nchaa cue tée yìndaha ñaha xii ñáyiú, ndihì nchaa cue tée cù sandadú-güedé ní naníhí tnáhá-güedě ndihì quítì-áⁿ cuendá cuu ìⁿnuu-güedě ndihì-dì nàa-güedé ndihì Yaá yódó cuàyu-áⁿ, ndihì nchaa cue espíritú cúú sàndadú ndihì-gá.

20 Te cue espíritú cúú sàndadú ndihì Yaá-áⁿ ñǐ tnǐ-xi quítì-áⁿ, ndihì tée ío dándahú ñáhá xì ñáyiú càchí sá càháⁿ tnúhu Yá Ndiǒxí te ñá ndàá sá càháⁿ-dé tnúhu-gá, te diu-ni té-áⁿ ñǐ quide-dé tìtní núú sǎ vǎ yǒo tnàhí ndàcu cada núú quítì-áⁿ. Te sá dúcáⁿ ñǐ quide té-áⁿ xǐáⁿ ní dándahú-dé ñáyiú

ní sándáá iní-yu ní quée-yu tnuní quiti-áⁿ, te ní chiñùhú-yu sá ñí dándácú ñàhá-yu xii-di, te cue espíritú-áⁿ ñí dáquëe-xi quiti-áⁿ núú ñùhú núú ñùhú àzufre càyú-xi, ndihí téé ducaⁿ dándahú ñàhá xii ñáyiú-áⁿ, te xíaⁿ cuhuⁿ téé-áⁿ ndihí quiti-áⁿ, te ío ndoho-dé ndihí-di.

²¹ Te ndihí yuchí cáhnú sá quéné yùhu Yaá yódó cuàyú-áⁿ ñí sahani-gá nchaa dava-gá cue téé cùndihí quiti-áⁿ, te nchaa cue quiti ndàva ní chítú xìtí-güedi ní xexi-güedi cuñú nchaa cue téé-áⁿ.

20

Úxí cièndú cuía

¹ Te sátá dúcáⁿ te ní xiní-í ñⁿ espíritú xínu cuèchi núú Yá Ndiöxí ní quee-xi andiú, te nùndaha-xi ndacaá nacaáⁿ-xi yèhe ñⁿ yaú cùnú víhí núú cùndècu sàcuíhná, te nùndaha tucu-xi ñⁿ cadená cáhnú.

² Te espíritú-áⁿ ñí tnⁿ-xi quiti dééⁿ nání dràgón, te ñiú-ni quiti-áⁿ cúú-dí mèi yucu ñávãha sá nání sàcuíhná, te ñiú xíaⁿ ní nduu-xi cóó ndèé sanaha. Te espíritú-áⁿ ñí dácútú ñàha-xi xii-di, te ducaⁿ-ni cùndutu-di ndéé xínu úxí cièndú cuía.

³ Te sátá ñí dácútú ñàha espíritú-áⁿ xii-di te ní dáquëe ñàha-xi xii-di yaú-áⁿ chi ñiú yaú-áⁿ tàú-di quée-di cundecu-di. Te ní nacadí-xi yuyèhe yaú-áⁿ, te ní tee-xi sèyú yuyèhe-áⁿ cuèndá sá và quéné-gã-di dandàhú-di cue ñáyiú ñuyíú, te xíaⁿ cundedí nihnu-di ndéé xínu úxí cièndú cuía. Te sátá ná yãha úxí cièndú cuía-áⁿ te nandáxí-di te quene-di yaú núú ñùhú-dí-áⁿ caca cuu tnaa-di ñⁿ úú nduu.

4 Te dătnùní ní xiní-í x̣ñutn̄h̄i t̄itn̄i x̄ilè váha, te x̄iáⁿ x̄ñucóo nchaa ñáyiu ní ngúndecu ndih̄i t̄núhu ndee ìní cada ndáá cuéchi nchaa ñáyiu, te ní xiní-í x̄ñdecu t̄nàhá cue ñáyiu ní xehndé-güedé dúcúⁿ-xi cuendá sá ñí cáháⁿ-yu t̄núhu Yá Ndiöxí, ndih̄i cuendá sá ñí cáháⁿ váha-yu cuendá Xítóhó Jesucristú. Te ðiu-ni ñáyiu-áⁿ cúÿ-yu ñáyiu ñá túú ní ch̄iñuhú-yu qūit̄i ní quene xit̄i làmár-áⁿ, te ni ñà túú ní ch̄iñuhú-yu sá ñí dándácú ñáyiu ní natava ñàhá-yu xii-di, te ni ñà túú ní dàñá-yu mèe-yu quée-yu t̄nuní qūit̄i-áⁿ chi ni t̄nèe-yu te ni ndàhá-yu ñá túú ní dàñá-yu quée t̄nuní-di. Te ní xiní-í ní ndoto cue ñáyiu-áⁿ cuendá t̄nàhá-yu cunùú-yu taxi t̄nùní-yu ndih̄i Xítóhó Jesucristú úxí cièndú cuíá.

5 Te dava ñáyiu ní x̄ih̄i ñá túú ní ndòtó-yu, chi ndée yáha úxí cièndú cuíá te dătnùní ndotó-yu. Te ñáyiu ní xiní-í ní ndoto-áⁿ cúÿ-yu ñáyiu ní ndoto díhna nuu.

6 |Te ío váha ní t̄nahá nchaa ñáyiu ní nduu táhú ñí ndoto díhna nuu!, chi cue ñáyiu-áⁿ ío cùðiú-yu núú Yá Ndiöxí, te nchaa ñáyiu-áⁿ v̄ã qūih̄iⁿ-yu núú ùhú núú ndàhú, te ñáyiu-áⁿ cúÿ-yu dútú ndécÿ-yu núú Yá Ndiöxí ndih̄i núú Xítóhó Jesucristú, te ñáyiu-áⁿ cúnùú-yu dàtná cúnùu Xítóhó Jesucristú, te cunuu ndih̄i ñàhá-yu xii-gá úxí cièndú cuíá.

7 Te sátá ná yáha úxí cièndú cuíá-áⁿ te sácúihná quee-xi núú ȳindèdí nihnu-xi-áⁿ,

8 te ngúita tucu-xi dandàhú-xi nchaa ñáyiu x̄ñdecu nih̄i ñuyíú, te cuèi ñáyiu ñuu Gög, te cuèi ñáyiu ñuu Màgóg ducaⁿ qūih̄iⁿ-xi dandàhú ñàhá-xí x̄i-yu, te datàcá-xi nchaa ñáyiu cuendá nàá-yu, te

cuéhé víhǐ-yu dàtná cuéhé ñuhu cúchí làmár.

9 Te nchaa ñáyiu-án tñí-yu ichi quíhíⁿ-yu ñⁿ ichi sá cuáháⁿ núú cáá ñⁿ yodo cahnu vihi, te sáá-yu núú xĩndecu ñáyiu cùu cuendá Yă Ndiöxí, te ñáyiu-án chidòcò-yu cue ñáyiu cùu cuendá-gá-án ndihí ñuú-yu, te ñuú-án ïo cùu iní-gá, dico mee Yă Ndiöxí dangòyo-gá ñuhú cahmi-gá nchaa ñáyiu ducaⁿ chidoco ñaha xii ñáyiu cùu cuendá-gá-án, te nchaa ñáyiu-án cuú.

10 Te sácúíhná sã dúcáⁿ dándahú ñáhá xii ñáyiu chidoco ñaha xii ñáyiu cùu cuendá Yă Ndiöxí-án dàquée ñaha-gă xii-xi núú ñuhú núú ñuhú àzufré càyú-xi, te ñiu-ni xíaⁿ sa ñuhu quiti ní quene xití làmár, ndihí téé ní dándahú ñáyiu ní xáhaⁿ-dě xii-yu sá càháⁿ-dé tñúhu Yă Ndiöxí te ñã ndàá sá càháⁿ-dé tñúhu-gá, te xíaⁿ cuhuⁿ-xi ndoho-xi ni caa ni quíhíⁿ ndihí quiti ní quene xití làmár, ndihí téé càchí sá càháⁿ tñúhu Yă Ndiöxí te ñã ndàá sá càháⁿ-dé tñúhu-gá.

Cùndáá cuéchi ñáyiu

11 Te ní xiní-í nútñí ñⁿ xilé váha xilé cuixíⁿ, te núú xilé-án núcõo ñⁿ Yaá. Te ndèhe Yaá-án nì ndóñúhú àndiu ndihí ñuyú-a, te ducaⁿ nì ndóñúhú-xí chí vá cùndècu-gá-xi.

12 Te sátá dúcáⁿ te ní xiní-í nchaa ñáyiu ní xihí ní cùu, ñáyiu cùnuu ndihí ñáyiu ñá túú cùnuu xínutñí-yu núú Yàá núcõo núú xilé váha-án, te Yaá-án cúú-gă Yă Ndiöxí, te òré-án nì nandíca nchaa tutú núú yódó tñuní nchaa nàcuáa ndùu sá nì guide ñⁿ ñⁿ ñáyiu-án, te ní nandíca tucu ñngá tutú núú yódó tñuní nchaa ñáyiu ní naníhí tàhú, te nchaa

ñáyiú ní xíhí ní cùu xínutnǎi-yu núú Yă Ndiǒxí cundáá cuéchi-yu, te nchaa nàcuáa ndùu nchaa cuéchi-yu yòdo tnuní núú nchàa tutú-áⁿ ducaⁿ cùndáá.

¹³ Te nchaa ñáyiú ní xíhí xítí ndute làmár, ndihí nchaa ñáyiú ní xíhí núú ñuhu yìhí nchaa ñáyiú-áⁿ cundáá cuéchi-yu nàcuáa ní quidé-yu ìⁿ ìⁿ-yu.

¹⁴ Te vitna te vá cùú-gá ñáyiú chi ñá túú-gă tnùhu xihí, te nchaa ñáyiú ñuhu núú ñuhú núú càyú ñáyiú-áⁿ cúŭ-yu ñáyiú ní xíta nihnu ni caa ni quíhíⁿ.

¹⁵ Te ducaⁿ chi nchaa ñáyiú ñá túú yòdo tnuní núú tütú núú yódó tnùní nchaa ñáyiú naníhí tàhú ní dáquēe ñaha Yă Ndiǒxí xií-yu núú ñuhú núú càyú.

21

Andiú sàa ndihí ñuyíú sáá

¹ Te sátá dúcáⁿ te ní xiní-í andiú sàa ndihí ñuyíú sáá, te andiú sǎ ndécú dǐhna ndihí ñuyíú sà ndécú dǐhna ní ndóñúhú-xí, te tnàhá làmár ní ndóñúhú-xí.

² Te yúhú té Juáá ní xiní-í ñuú Jerusàlén sáá nǎ quee-xi núú ndécú Yă Ndiǒxí, te ñuú-áⁿ cúú-xí ñuú méé-gă, te ío vii càa chi càa datná cáá ìⁿ ñadihí xíchí tnǎndaha.

³ Te ní tecú dóho-í níhi ní cáháⁿ ìⁿ sá nǎ cáháⁿ andiú, te cǎchí-xi:

—Chí cùndèdóho ìⁿ tnùhu na cáháⁿ-í-a: Yă Ndiǒxí ndécú ndihí-gá cue ñáyiú vitna, te ducaⁿ-nǎ cundecu ndihí ñaha-gă xií-yu, te diú-yu cùú-yu ñáyiú cùu cuendá-gá, te vá ìⁿ ndùu ìⁿ quíú-gă te dañá ñaha-gá xií-yu.

⁴ Te mee Yă Ndiöxí cada-gá sá ñà túú tnàhí-gá ná cani iní-yu cundecú-yu, te ni vă quìní-gá-yu tnúhu xìhí, te ni vă quìní-gá-yu tnúhu ndàhyú, te ni vă quìní-gá-yu tnúhu ndìhú iní-xi, te ni vă quìní-gá-yu tnúhu cùhú, chi nchaa sá ñǎ xíní-yu ñuyíú dǐhna vá quìní-gá-yu vitna —duha càchí sá ñǎ cáháⁿ-áⁿ.

⁵ Te Yaá núcõo núú xilé váha-áⁿ ñǎ cachí tnúhu-gá xii-í, te càchí-gá:

—Yúhú quídè-í nàcuáa nduu saa nchàa sá cùndècu vitna. Te vitna chido tnùnì-n ìⁿ núú tùtú nchaa tnúhu sá ñǎ cáháⁿ-í-a, chi nchaa tnúhu-a cùu-xi tnúhu ndáá cuiti —duha càchí-gá.

⁶ Te dàtnùnì ní cachí tnúhu tucu-gá xii-í:

—Sa ní xínu cava nchaa chiuⁿ ní sani iní-í cada-í, te diu-ni yúhú cùu-í Yaá sa ndècu ndéé cútnàhá ní ngáva ñuyíú, te diu-ni-í cundecu-í ni caa ni quíhíⁿ. Te nchaa ñáyiu cuìnì tuha ñaha xii-í te cada iní-yu sá dàtná ndute cùu-xi sá cuãñaha tǎhù-í xii-yu candeca-xi iní-yu ni caa ni quíhíⁿ.

⁷ Te nchaa ñáyiu na cùndee iní yáha nándi sá ná yǎha-yu sá cuendá-í, te ñáyiu-áⁿ nduu táhǔ-yu cundecu váha-yu, te yúhú cuu-í Ndiöxí-yu, te ducaⁿ mée-yu cuú-yu déhe-í.

⁸ Te nchaa ñáyiu na yúhú ndoho cuendá-í quíhíⁿ-yu núú ñùhú núú càyú ndihi ñáyiu ñá túú sàndáá iní ñáhá xii-í, ndihi ñáyiu quide nándi nchaa sá cuèhé sá dúhá, ndihi ñáyiu sǎhni tnaha, ndihi ñáyiu ndècu ichi díí iní, ndihi ñáyiu quide nduu, ndihi ñáyiu chĩñuhu nchaa sá càchí-yu cùu ndióxí ní cadúha cue téé ñuyíú-a, ndihi ñáyiu dàcuandehnde, nchaa ñáyiu ducaⁿ xiquide-áⁿ cuíta nihnú-yu chi quíhíⁿ-yu núú ñùhú núú ñùhú àzufré

càyú-xi —duha ní cáháⁿ Yă Ndiöxí ní cachí tnúhu-gá xii-í.

Ñúú Jerusàlén sáá

⁹ Te núú ùsá espíritú xĩnehe tícùú ñúhú tnúhu ndòho, te ìⁿ-xi ní quixi-xi te cächí-xi:

—Taqùxi, te na dànehé ñáhà-í xii-n nchàa ñáyiu cùu cuendá Yaá cáá dàtná cáá ìⁿ mbéé quiti ní dánĩcuèhé-güedé, ñáyiu-áⁿ cada iní-n sã cúŷ-yu dàtná ìⁿ xíchí cuéchí v̄itna tnándaha, te ducaⁿ càda iní-n sã cúŷ-yu chi cundecú-yu ndihì-gá —duha ní cachí tnúhu espíritú-áⁿ xii-í.

¹⁰ Te òré quidé ñàha espíritú Yă Ndiöxí xii-í nàcuáa cächí iní-xi, te espíritú néhé tícùú-áⁿ ndécá ñàha-xi xii-í cuásaá ìⁿ t̄indúú dùcúⁿ, te xíaⁿ ñĩ dánèhé núú ñáhá-xí xii-í ñúú Jerusàlén te ñúú-áⁿ ñĩ quee-xi núú ndécú Yă Ndiöxí, te ñúú-áⁿ cúú-xí ñúú mée-gã.

¹¹ Te ñúú-áⁿ ìo càhnu cuu-xi chi ducaⁿ ìo càhnu cuu mee-gã, te dátásaⁿ-xi dàtná dátásaⁿ yúú v̄aha sá nání jãspé yúú cáá dàtná cáá v̄idriú sá t̄uu ingá xio ndàa sátá-xi.

¹² Te ñi càndéé yuhu ñúú-áⁿ s̄úúní dùcúⁿ nchaa sá ñúhú dòco, te nchii úxúú yuyèhe-xi, te ndi tnahá ìⁿ ìⁿ yuyèhe-áⁿ x̄ĩndecu ìⁿ caa espíritú xínú cuèchi núú Yă Ndiöxí. Te ndi tnahá ìⁿ ìⁿ yuyèhe-áⁿ yódó tnùnì d̄iù ìⁿ caa xichi cue ñáyiu isràél.

¹³ Te únì yuyèhe-xi nchii ndàa xio nacuáa quène nchícanhii, te únì tucu yuyèhe-xi nchii ndàa nacuáa quèe nchícanhii, te únì tucu yuyèhe-xi nchii ndàa xio cuha nacuáa quène nchícanhii, te únì tucu yuyèhe-xi nchii ndàa xio datni nacuáa quène tucu nchícanhii.

14 Te sá ñúhú dòco-áⁿ chi úxúú tnàhá yúú cúú cìmientú-xi, te ndi tnahá ìⁿ ìⁿ yúú-ǎⁿ ndèé ìⁿ caa ñú cue tée ní cáháⁿ tnúhu Yaá cáá dàtná cáá ìⁿ mbéé quiti ní dánícuèhé-güedé, te ñú mee-gǎ ní táúchíúⁿ-gǎ ní cáháⁿ-güedé tnúhu-gǎ.

15 Te espíritú sá càháⁿ ndihi ñaha xì-í-áⁿ néhé-xí ìⁿ sá cání ñí cuáha mee-ni ñíhúⁿ cuááⁿ, te ndihi xǎⁿ chícuhá-xi ñúú-áⁿ, ndihi sá ñúhú dòco ñúú-áⁿ, ndihi nchaa yuyèhe-xi.

16 Te ñúú-áⁿ ìⁿ-ni nèhe-xi cuendá quèhéⁿ-xi ndihi cuendá càni-xi, te espíritú-ǎⁿ ní chícuhá-xi ndihi sá néhé-xí-ǎⁿ ñúú-áⁿ, te nèhe-xi ócò úú ciendú mìl mètrú sá cání te ñú-ni ñúcaⁿ nèhe-xi cuendá quèhéⁿ-xi, te ñú-ni ñúcaⁿ nèhe-xi sá ñúcúⁿ nchaa vehe càa ñúú-áⁿ.

17 Te dàtnúⁿ ní chícuhá-xi sá ñúhú dòco ñúú-áⁿ, te xǎⁿ néhé-xí ùnídico cúmí mètrú sá ñúcúⁿ, te ní chícuhá-xi dàtná chícuhá cue ñáyíu ñuyíú-a.

18 Te sá ñúhú dòco-áⁿ ñí cuáha mee-ni yúú vǎha yúú sǎ nání jǎspé, te ñíhí ñúú-áⁿ cúú-xí mèe-ni ñíhúⁿ cuááⁿ, te càa dàtná cáá vídriú sá ño váha càndoo te túu ndàa ñngá xio.

19 Te ndi ùxúú yúú cúú cìmientú sá ñúhú dòco-áⁿ ndèé ndí ñíⁿ núú yúú vii càa sátá-xi, te yúú ñíhna ndèé mee-ni yúú vǎha sá nání jǎspé sátá-xi, te yúú cúú ùú ndèé tucu ñngá núú yúú vǎha sá nání zǎfirú sátá-xi, te yúú cúú ùní ndèé tucu ñngá núú yúú vǎha sá nání ǎgatá sátá-xi, te yúú cúú cùmí ndèé ñngá núú yúú vǎha sá nání èsmeraldá sátá-xi.

20 Te yúú cúú ùhúⁿ ndèé tucu ñngá núú yúú vǎha sá nání ònícé sátá-xi, te yúú cúú ñnú ndèé tucu ñngá núú yúú vǎha sá nání còrnalíná sátá-xi, te yúú cúú ùsá ndèé tucu ñngá núú yúú vǎha sá nání crìsólítú

sátá-xi, te yúú cúú ùná ndèé tucu ìngá núú yúú vǎha sá nání bèrilú sátá-xi, te yúú cúú ìⁿ ndèé tucu ìngá núú yúú vǎha sá nání tòpacíú sátá-xi, te yúú cúú ùxí ndèé tucu ìngá núú yúú vǎha sá nání crìsopásá sátá-xi, te yúú cúú ùxí ìⁿ ndèé tucu ìngá núú yúú vǎha sá nání jàcintú sátá-xi, te yúú cúú ùxúú ndèé tucu ìngá núú yúú vǎha sá nání àmatístá sátá-xi.

21 Te ndi ùxúú yuyèhe sá ñúhú dòco-áⁿ cúú-xí mèe-ni yúú vǎha sá nání pèrlá, te ndùu ñi yúú cúú ìⁿ ìⁿ yuyehe-áⁿ. Te tnuú cáhnú ndècu xití ñúú-áⁿ cúú-xí mèe-ni díhúⁿ cuááⁿ, te càa-xi datná cáá vidriú sá túu ndàa ìngá xio.

22 Te ní xiní-í sá ñà túú vèhe núú chíñùhu ñáyiú Dútú Ndiòxí cáá ñúú-áⁿ, chí mee-nǎ Dútú Ndiòxí Yaá quidé nchàa-ndi túhú sá vǎha ndècu ñúú-áⁿ, ndihí Yaá cáá dàtná cáá ìⁿ mbéé quiti ní dánìcuèhé-güedé.

23 Te ñúú-áⁿ ñà túú-gǎ xiní ñùhu-xi nchícanchii dayèhé-xi, te ni yóó ñà túú-gǎ xiní ñùhu-xi, chí mee-nǎ Yǎ Ndiòxí dáyèhé-gá ñúú-áⁿ ndihí Yaá cáá dàtná cáá ìⁿ mbéé quiti ní dánìcuèhé-güedé.

24 Te cue ñáyiú nchaa ñúú cáá ñùyíú, ñáyiú ní naníhí tàhú xíndecu ñúú-áⁿ dáyèhé-gá núú-yu, te nchaa cue téé yíndaha ñaha xií-yu nèhe-güedé sá yíñùhu sá cúú-xí ñúú-áⁿ, te quide cahnu ñaha-güedé xii-gá.

25 Te yuyèhe ñúú-áⁿ ñà túú tnàhí nàndedí, te ñúú-áⁿ ñà túú tnàhí cùndiquíⁿ.

26 Te nchaa ñáyiú nèhé-yu sá yíñùhu sá cúú-xí ñúú-áⁿ te quide cahnú-yu Yá Ndiòxí.

27 Te ñúú-áⁿ vǎ cúú cùndecu ni ìⁿ ñáyiú ndècu

ichi cuehé ichi duha, te ni ìḥⁿ ñáyiu ndehnde, te ni ìḥⁿ ñáyiu quide sá ñà túú cùu váha iní Yă Ndiõxí vá cúú cùndecú-yu ñuú-áⁿ, chi mee-ni ñáyiu naníhí tàhú ñáyiu yòdo tnuní núú tütú Yaá cáá dàtná cáá ìḥⁿ mbéé quiti ní dánĭcuèhé-güedé, mee-ni ñáyiu-áⁿ cundecú-yu ñuú-áⁿ.

22

¹ Te sátá dúcáⁿ te ðiu-ni espíritú-áⁿ ñí dánèhé núú ñáhá-xí xì-í yúte núú ñúhú ndùte candoo canine, te ndute-áⁿ candeca-xi iní ñáyiu ni caa ni quíhíⁿ, te ndute-áⁿ quée-xí mèi núú núcõo Yă Ndiõxí ndihí Yaá cáá dàtná cáá ìḥⁿ mbéé quiti ní dánĭcuèhé-güedé.

² Te cuádava tnuú cáhnú yăha xití ñuú-áⁿ cáá yŷte-áⁿ, te xio xio yuhu yŷte-áⁿ níhnú yùtnu cuuⁿ sávídí-xi, te sávídí nchaa yutnu-áⁿ cúú tùcu-xi sá cándèca iní ñáyiu ni caa ni quíhíⁿ, te nchaa yutnu-áⁿ cúúⁿ sávídí-xi úxúú xito ìḥⁿ cuíá chi ndi tnahá yóó cúúⁿ sávídí-xi, te nchaa ndaha-xi cùu-xi tátna sá cúú-xí nchaa ñáyiu.

³ Te vá yõo ìḥⁿ-gá cada ìḥⁿ sá ñà túú cùu váha iní Yă Ndiõxí ñuú-áⁿ. Chi ñuú-áⁿ núcõo mee Yă Ndiõxí ndihí Yaá cáá dàtná cáá ìḥⁿ mbéé quiti ní dánĭcuèhé-güedé xítaxi tnùní-gá, te nchaa ñáyiu xìnu cuechi núú-gă cada càhnu ñahá-yu xii-gá.

⁴ Te nchaa ñáyiu-áⁿ cundehe núú-yu Dútú Ndiõxí, te tneé-yu cundeé ðiu-gá.

⁵ Te ñuú-áⁿ vă quíní-gá-yu niú, te ni vă cánèhe chiuⁿ-gá-yu ñuhú cutnùní núú-yu, te ni nchĭcanchii ñá túú-gă xíní ñùhu-xi dayehé ñuú-áⁿ chi mee Dútú

Ndiöxí dáyèhé-gá, te ni caa ni quíhíⁿ cunùú-yu cundecú-yu ñuú-áⁿ.

Sa ta cùyatni nduu quixi tucu Xítohó Jesucrístú

⁶ Te sátá dúcáⁿ te ní cachí tnúhu espíritú xínú cuèchi núú Yă Ndiöxí-áⁿ xii-í:

—Nchaandi túhú tnúhu-a cùu-xi mee-ni tnúhu ndáá cuiti. Te Yá Ndiöxí Yaá dácàhu iní nchaa cue tée càháⁿ tnúhu-gá nàcuáa càháⁿ-güedé ní tendaha-gă ìⁿ espíritú xínú cuèchi núú-gă ní quixi-xi ní dánèhé-xi nchaa ñáyiu xínu cuechi núú-gă nchaa nàcuáa cada-gá, te vâ cùyàa-gá ducaⁿ càda-gá —duha càchí espíritú-áⁿ.

⁷ Te ní càháⁿ Xítohó Jesucrístú, te càchí-gá:

—Ío ndíhi quixi tucu-í!

’íTe ío váha tnahá nchaa ñáyiu tñì nchaa tnúhu càháⁿ Yă Ndiöxí yódó tñuní núú tütú-a! —duha càchí-gá.

⁸ Te yúhú té Juáá ní tecú dóho-í nchaa nàcuáa ní ngódó tñuní núú tütú-a, te ní xíní núú-í nchaa nàcuáa cada-xi ndéé cuèé-gá. Te sátá dúcáⁿ ní cuu te ní ngúíñí xítì-í núú espíritú sá ní dánèhé núú ñáhá nchàa xíăⁿ cuendá chiñuhu-í-xi ni cùu.

⁹ Te ní cachí-xi:

—Vá dúcáⁿ càda-n, chi yúhú dícó xínú cuèchi-í núú Yă Ndiöxí dàtná cúú yòhó ndíhi nchaa dava-gá ñáyiu ndècu ndíhi-n ichi-gá càháⁿ-ndó tñúhu-gá, ndíhi nchaa ñáyiu tñì nchaa tnúhu ndéé núú tütú-a, te xíăⁿ càchí-í sá vâ dúcáⁿ càda-n, chi mee Yă Ndiöxí ducaⁿ chiñuhu-n-gá —càchí espíritú-áⁿ xii-í.

¹⁰ Te ní cachí tnúhu tucu-xi xii-í, te càchí-xi:

—Vá chídăhu-n nì ìⁿ tnúhu Yá Ndiöxí ndéé núú tütú-a, chi sa ní cuyatni cada-xi nchaa nàcuáa ndéé tñuní.

11 Te dañá sǎ ncháá ñǎyiu ndècu ichi cuehé ichi duha na cùndecu-ní-yu ichi-án, te ducaⁿ-ni dàña-n nchaa ñáyiu quìde nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyiu quìde váha te ducaⁿ-ni na càda váha-yu cundecú-yu, te nchaa ñáyiu quìde nchaa nacúáa cùu váha iní Yǎ Ndiöxí te ñiu-ni ducaⁿ na càdá-yu cundecú-yu —duha càchí espíritú-án.

12 Te ní cachí Xítóhó Jesucrìstú:

—Cundedóho-n tnǎhu na càháⁿ-í-a. Ío ndǎhi quixi tucu-í, te canehe-í nchaa sá ndúú tǎhú ñáyiu quixi, te nàcuáa ndùu chiuⁿ ní quidé-yu ìⁿ ìⁿ-yu te ducaⁿ cùnduu sá cuǎñaha-í nduu tǎhú-yu.

13 Te yúhú cúu-í Yaa sa ndècu ndéé cútnàhá ní ngáva ñuyúú, te ñiu-ni-í cundecu-í ni caa ni quíhíⁿ —duha càchí-gá.

14 Te váha tǎhú nchaa ñáyiu sa ní nduu ndoo ní nduu nine iní-xi, chi ñáyiu-án ní nduu tǎhú-yu quíhu-yu xití ñuú-án, te caxí-yu sávìdí yutnu nùtní-án te xǎⁿ candeca-xi iní-yu ni caa ni quíhíⁿ.

15 Te ñuú-án vǎ cúú quíhu ni ìⁿ ñáyiu ndècu ichi cuehé ichi duha, ni cuè ñáyiu quìde nduu, te ni cuè ñáyiu ndècu ichi dǎí iní, te ni cuè ñáyiu sàhni tnaha ñáyiu-xi, te ni cuè ñáyiu chǎñuhu nchaa sá ní cadúha cue téé ñuyúú-a càchí-yu cùu ndióxí, te ni cuè ñáyiu tnàhá iní dacuàndehnde, te ni ìⁿ ñáyiu ducaⁿ xǎquide vá ndúú tǎhú-yu quíhu-yu xití ñuú-án.

16 Te ní cáháⁿ tucu Xítóhó Jesucrìstú, te càchí-gá:

—Yúhú Xítóhó Jesucrìstú ní tendaha-í espíritú xínú cuèchi núu-í cuèndá cachí tnúhu-xi xii-n

nàcuáa ndùu tnúhu cúñaha-n xii nchaa ñáyi ndècu ndihí-n ichi-í dácuaaha tnúhu-í ìⁿ ìⁿ ñuú. Te yúhú cúu-í mei ñàní tnáhá ndíi Dàví, te cada iní-n sá cúu-í dàtná ìⁿ chódíní quiṭi quène datneé —duha càchí-gá.

17 Te nchaa ñáyi cùu cuendá Xítoho Jesucristú Yaá cáá dàtná cáá ìⁿ mbéé quiṭi ní dánicuèhé-güedé, diu-ni ñáyi-áⁿ cúu-yu ñáyi cada iní-ó sá cúu-yu ìⁿ ñadìhí xíchí tnándaha ndihí ñaha xii-gá, te ñáyi-áⁿ ìⁿ-ni càháⁿ-yu ndihí Espiritú Yá Ndiöxí, te xäháⁿ-yu ndihí Espiritú-gá xii nchaa dava-gá ñáyi:

—Chí táquixi —cachí-yu xäháⁿ-yu ndihí Espiritú Yá Ndiöxí.

Te nchaa ñáyi ducaⁿ ndèdóho tnúhu-áⁿ vitna, te xini ñuhu-xi ducaⁿ cáháⁿ-yu tnáhá-yu cúñahá-yu xii nchaa dava-gá ñáyi-áⁿ, te nchaa ñáyi cui ní tuha ichi-gá te na quixí-yu, te dicó ducaⁿ cùu táhü-yu sá cándèca iní-yu ni caa ni quíhíⁿ.

18 Te nchaa nchòhó ñáyi ndèdóho nchaa nàcuáa càháⁿ tnúhu Yá Ndiöxí ndéé núú tütú-a càháⁿ-í dóho-ndo. Te núu ìⁿ ñáyi na còdo-gá tnúhu chido tnùní-yu núú tütú-a, te Yá Ndiöxí ío dandòho ñaha-gá xii-yu chi yáha-yu nchaa tnúndòho yodo tnùní núú tütú-a te núu ducaⁿ na càdá-yu.

19 Te núu ìⁿ ñáyi na chidáhu dava tnúhu Yá Ndiöxí ndéé núú tütú-a te ñáyi-áⁿ vã ndúú tãhü-yu cundecú-yu ñuú-gá, te ni vã ndúú tãhü-yu sá cándèca iní-yu ni caa ni quíhíⁿ dàtná yódó tnùní núú tütú-a.

20 Te Xítoho Jesucristú Yaá càháⁿ sá ncháá tnúhu-a cùu-xi tnúhu ndáá ní cáháⁿ-gá ní tecú

dóho-í, te càchí-gá:

—Ndáá sá ïo ndĩhi quixi tucu-í —duha càchí-gá.

Te yúhú ní xáhaⁿ-ĩ xii-gá:

—Ducaⁿ na cùnduu, taquìxi yohó Xítóhó Jesu-
crìstú —duha ní xáhaⁿ-ĩ xii-gá.

²¹ Te Xítóhó Jesucrìstú ío na chìndee chitúu
ñaha-gă xii-ndo nchàa-ndo. Te ducaⁿ na cùnduu. Te
íó chí cádá ndèe iní-nă vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

872f7754-0986-5ecd-a059-925a708a6939